

Uraat To Yes Mbanjoonja To Yesu Kresi Wok Bilong Ol Aposel—The Acts Of The Apostles

Paesiin to Lukas

¹⁻³O Teopilus, uraat naol to Yesu igham di muun, toman saveen isob to ye ipatoot tamtoghon pani, tauto inee ila rau to nambooda ilat tiom muun.* Saveen toman uraat toni tonowen inim inim le Maaron ighami imuul iza ila pa sambam. Yesu imaat ve imundig muul, ve mbonji tamoot ru to itaghoni, ye ila ivotvot to yes mbanjoonja toni to ye tau isia di tinim le, ve ipatoon tau padi ila ataam naol. Leso tiwatag kat tighaze ye imundig pa mateen, ve inee mata iyaryaar. Sawa tonenen, ila uraat to Avuvu Patabuan, ye ipaghazonan ngar todi pa tutuun toni pida. Ve isavsaav padi pa pooz to Maaron. *Lu 1:1+, 9:51, 24:13+; Yo 20:19+; 1Kor 15:5+*

Yesu isaav pa mbanjoonja toni ighaze mala maau pale Avuvu Patabuan izi inim

⁴Sawa eez, Yesu toman mbanjoonja toni tinep-nee, ve Yesu isaav padi ighaze: “Apul Yerusalem rikia malep. Anee ve asanan pa mbeb to Taman ighaze igham payam itaghon saveen mbuaan toni. Mbeb tonowen, you nasavia payam ve aloon saveenja wa. *Lu 24:49; Yo 14:16+; Mbanj 2:2+,33*

* **1:1-3:** Rau to Lukas imbooda muun, nene varu poia toni.

⁵ ‘Yoan, ye irughuuz tamtoghon pa ya. Eemoghon yam, mala maau pale Maaron igham Avuvu Patabuan payam.’ ” *Lu 3:16*

⁶ Ghoru mbanjoona toni to tinepneep tomani, tighasoni tighaze: “Tiina, vena? Sawa to ughaze ugharaat mulin nepoon to yei Israela lesu taumai ningin ndug tiei, tau tonene?” *Mika 4:8; Lu 24:21*

⁷ Yesu ipamuul alinadi ighaze: “Sawa to mbeb tovene, yam irau awatagi maau. Nene ineep to Tamañ moghon. Ye tauto ighur sawa pa mbeb tisob tivot.” *Mk 13:32+; 1Tes 5:1+*

⁸ Ve aloon. Sawa to Avuvu Patabuan izi inim ve izala poghomim, yam pale agham tapirimim tiina ila toni. Lesu ayoon ariana pa votiaan varug ve apariaan saveen tiou. Pale agham uraat tonene izi Yerusalem muun. Le isob, ghoru alaagh irau taan isob to Yudea, ve ala pa Samaria, ve alaagh irau taan dige to naol.” *Lu 24:47+; Mban 2:1+*

*Yesu imuul iza ila pa sambam
(Mk 16:19-20; Lu 24:50-53)*

⁹ Yesu isavsaav padi le isob, ghoru Maaron indaea ila matadi, ve imuul iza ila pa sambam, le yaghur tae ipoona ve tighita muul maau.

¹⁰ Matadi itaghoni ve izala, ve mala maau, ndiran ru tivot todi ve yesna tiyondyood. Nonogiina todi pisosoon moghon. Yesuru tisaav padi tighaze: *Lu 24:4*

¹¹ “Yam ndiran to Galilaia, pughu vena to ayondyood ve matamim izazala pa sambam? Aloon. Yesu tonowen, aazne Maaron ighami ipul gham, ve imuul iza ila pa sambam. Eemoghon muri, ye pale imuul izi inim raraate inimale aazne yam aghita iza ila.” *Mt 26:64; 1Tes 4:16; Syg 1:7*

Tighur Matias igham Yudas ina

¹² Ghoru taghoniina toni tipul lolooz Oliv, ve timuul tila pa Yerusalem. Lolooz tonowen ineep igharau Yerusalem, irau 1 kilomita ma venen. *Lu 24:52*

¹³⁻¹⁴ Yes tilaagh tila tivot Yerusalem, ve malmalidi tizala pa inadi to nepoonj to ineep ruum lolo sala. Ndiran tonowen, nene Petrus yesuru Yoan, Yakobus ve Andreas, Pilip yesuru Tomas, Patoromai ve Matayu, Yakobus ite to Alapai natu, Simon (ye to yes Selot), ve Yudas to Yakobus natu. Sawa isob, yesna Yesu tina Maria toman nditazi ve ndiliva pida, lolodi ee moghon ve tiluplup di pa sunjuunj.

¹⁵ Sawa eez, yes to tighur ila to Yesu tilup di. Yes irau tamoot liim avua tamoot ee (120) ma venen. Petrus imundig iyoon ila lolodi, ve isaav padi ighaze: ¹⁶⁻¹⁷ “Yam tonjetaz, muunj, Avuvu Patabuanj ipamundigin kinik David ve ivotia Maaron aliina to injarua mbeb to ivot pa Yudas. Saveenja ineep ila Maaron aliina to timbooda, ve aazne anonja ivot wa. Pasa, Maaron aliina isob pale ighur anonja ivot itaghon ye tau ngar toni. Yam awatag: Yesu igham Yudas inim taghoniina toni, ve itina taluplup ghiit ve tambesmbes pa uraat to Maaron. Eemoghon muri, Yudas ilaagh toman Yesu koia, ve ipatoonj di pani, tauto tikisi. *Mbo 41:9*

¹⁸ Ngar to Yudas ighami, denja maau. Eemoghon tigham le atia, ve ighol le taan pida eez pani. Eemoghon ila itap izala taan tonowen, le apo ivavaal ve kodkoda imalinj. ¹⁹ Mbeb tonenen varu ilaan irau tamtoghon tisob to Yerusalem ve tiloonja. Pughu tonene to tiwaat taan tonowen

ila taudi alinjadi tighaze: ‘Akeldama.’ (Akeldama pughu, nene vene: ‘Taan to sinj.’) *Mt 27:3+*

²⁰ “Saveenj waaro eez to ineep ila Mbouj To Yes Israela, isaav tovene:

‘Ina to nepoonj pale nginiņa.

Tamtoghon eta irau ineep tonowe muul maau.’ *Mbo 69:25*

“Ve Maaron alinja waaro ite isaav ighaze:

‘Tamtoghon ite irau igham ina, ve igham uraat toni to nginiinj.’ *Mbo 109:8*

²¹⁻²² “Tovenen tamtoghon eta irau igham Yudas ina. Leso yeiņa nipariaanj mundigiinj to Yesu saveeņa. Taghita tamtoghon toit eta to inepneep toman ghiit ve itiņa Yesu talaghlaagh pa sawa to Yoan ngeu rughuzaanja igham uraat toni, ve inim sawa to Maaron indae Yesu a ipul ghiit, ve imuul iza ila pa sambam.” *Lu 24:48+*

²³ Petrus isavsaav le isob, ghero tipayoon ndiran ru: Yosep Barsabas to iza ite Yastus, ve Matias. ²⁴⁻²⁵ Tipayoon yesuru, ve tisuņ pa Maaron tighaze: “O Tiina tiei, yom uwatag tamtoghon tisob lolodi. Tovenen ndiran ru tonene, upatoonj sei to yom ughaze ughuri igham Yudas ina. Leso inim mbanjoonja tiom ve igham uraat tiom tonene. Pasa, Yudas, ye ipul muri pa uraat tiom, ve imaat gha ila ndug to yom ughuri pani pataghaanj wa.” *Yo 2:25; Syg 2:23*

²⁶ Tisuņ le isob, ghero tiņgozņgooz le ipatoonj Matias. Tauto Matias igham Yudas ina, ve injal mbanjoonja saanjul ve eez le tinim saanjul ve ru muul.

2

Avuvu Patabuanj izi inim

¹ Tiza pa sawa to Pentekos,*
ve yes to tighur ila to Yesu, tilup di ila inadi ee
moghon ve tinepneep. ² Mala maau ve tiloonj
mbeb avolutu inimale yaghur tiina kat ipul sam-
bam ve izi inim le irau ruum lolo to tinepneep
pani. *Ezek 37:9+; Yo 3:8*

³ Ghoru tighita mbeb inimale yab yama ivot, ve
ivalagi le irau yes tisob poghodi. *Mt 3:11*

⁴ Ve Avuvu Patabuanj izeev di tisob, ve ipamundi-
gin di ve tisavsaav ila ndug ndug aliñadi. *Mk
16:17; Yo 7:37+, 14:16; Mbanj 4:31, 10:44+, 19:6*

⁵ Sawa tonenen, Yuda katindi to tineep irau
ndug ndug, tinim tilup di izi Yerusalem paam.
Ndiran tonowen matadi ingalngal Maaron, ve
titaghon ngar toni.

⁶ Mbeb to ivot ne, ival tiina tiloonj avolutu. Tove-
nen tiketkeet tinim tighaze tighita. Tiloonj saveenj
to yes to Avuvu Patabuanj izeev di, le runjadi iza
ve ngar todi isob. Pasa, yes enjaenja tisob tiloonj
saveenj ila taudi aliñadi kat. ⁷ Tauto avodi ikaak, ve
tikaal mbeb tonenen ngara tighaze: “Wai, ndiran
to tisavsaav ne, yes tisob to Galilaia. ⁸ Pughu
vena to iit enjaenja tasob taloonj di tisavsaav ila
tauud aliñaad kat. Aghita. Saveenj to tisasavia

* **2:1:** Pentekos, nene lupuunj tiina eez to yes Yuda. Ivotvot pa ndaman to naol (Igham 23:16). Nene sawa to yes Yuda tipakur Maaron pa taitainj to ivot padi. Yes tilup di pa Pasova le isob, ve mbonj tamoot ru saangul (50) inim ila, ghoru lupuunj to Pentekos ivot. Yes Grika tiwaat tamoot ru saangul (50) ila taudi aliñadi tighaze ‘pente.’ Tauto tiwaat lupuunj tonowen iza Pente-kos.

we, nene inimale tamtoghon to paanu toit kat tisavsaav. ⁹ Iit tonene, to ndug ee moghon maau. Iit pida to taan suruvu to Partia, Midia, ve Elam. Ve pida to Mesopotamia, Yudea, ve Kapadosia. Pida to Pontus ve Asia, ¹⁰⁻¹¹ ve pida to Pirigia, Pampilia, Isip, ve taan suruvu to Libia to ineep igharau Sairini, ve pida to mutu Krit, ve pida to taan suruvu to Arabia. Iit loomba pida taneep Rom ve tanim paam. Tamtoghon toit pida, yes Yuda kat. Ve iit pida, Yuda kat maau. Eemoghon tator ngar toit ila pa Maaron, ve tataghon yes Yuda pa sunuunj todi. Eemoghon saveenj to ndiran tonowen tisasavia pa uraat arianjadi to Maaron, nene iit enaenja tasob taloonja ila tauud alinjaad kat.”

¹² Tovenen yes ival tonenen tisob avodi ikaak, ve tigham ngar naol. Ve tiwaghasonin di tighaze: “Wai, mbep tonene, pughu vena?” ¹³ Eemoghon tamtoghon pida tinij ve tisaav tighaze: “Nowe avaat tighun vaen tiina, tauto tiwayoun avodi.”

Mos to Petrus ivotia pa sawa to Pentekos

¹⁴ Petrus iyondyood toman ndita saangul ve eez. Ye isaav pa ival tiina tonowen toman alinja tiina ighaze: “Yam tamtoghon to Yuda, ve yam pida to anim aneep izi Yerusalem paam, asob aghur talinamim payou pooi. Leso napaghazonan gham pa mbep to ivot ne pughu ve aghazonj pani. ¹⁵ Vena, yam aghaze tamtoghon tonene tighun tiina le ngar todi iwaghamgham? Maau. Aghita. Ngaramus mbonjmaagh. Ndag iza inim ngeeg sone. Sei ighunghun pa sawa tovene? ¹⁶ Aloonj. Mbep to ngaramus ivot ne, nene itaghon Maaron alinja to muunj ye ivotia ila propet Yoel avo. Ighaze:

17 ‘Maaron isaav tovene: “Sawa muri†
ighaze ivot, you pale narei Avuvug irau tam-
toghon tisob.

Ghoro ndinatumim nditamoot ve ndiliva
tinim propet, ve tivotia alinjag pa
tamtoghon.

Tovenen nditamoot tiam papaghu pale tighita
mbeb pida ila tandagiinj.

Ve ndolman watwaat tiam pale tighita mbeb
pida ila vibiiinj. *Is 44:3; Ezek 39:29*

18 You pale narei Avuvug irau mbesoonja tiou
tisob. Yes nditamoot ve ndiliva paam.
Leso tinim propet, ve tivotia alinjag pa tam-
toghon. *Mbanj
21:9*

19 Ve you pale naghama mbeb gharatoonjadi
tintina pida tivot ila sambam paronjania,
ve naghama mbeb gharatoonjadi tivot izi taan
paam tinim ghilaloon pa tamtoghon.

Sinj pale imalinj, ve yab ighan ndug ve mbuasa
tiina iza le ikau ndug.

20 Ndag pale ighaaz muul maau, ve ndug ndo-
room.

Ve kaiyo pale ikaviaanj.

Ghoro sawa tiina to Ngeu Tiina ivot, ve ipa-
toonj tapiri ve nguruba ivot ighazoonj. *Mt*

† 2:17: Saveenj waaro ‘sawa muri,’ injarua taan sawa moghon
maau. Nene sawa mala. Imundig pa sawa to Yesu imaat ve
imundig pa mateenj, ve ila ila le taan sawa. Ghilaloonj tiina to sawa
muri, nene uraat to Avuvu Patabuanj. Sawa munjina, nene sawa to
Maaron ipamundigin uraat toni ila iit tamtoghon sosood, ve igham
yes Israel tivot. Ve sawa muri (o ‘sawa paghu’ o ‘last days’), nene
sawa to ye ipasob uraat toni, ve saveenj mbuaanj toni to naol ne
tighur anonja.

24:29+, 27:45

²¹ Sawa tonenen ighaze ivot, tamtoghon tisob to titaŋ roran Maaron pa ulaaŋ, ye pale igham mulin di, ve tineep pooi.’ *Yoel 2:28+; Mbanj 4:12; Ro 10:13*

²² “Tovenen yam nditamoot to Israel, aghur talaŋamim pooi pa saveeŋ tiou tonene. Yam awatag: Yesu to Nasaret igham uraat arianaŋadi ve mbeb gharatoonjaŋadi tintina ila lolomim tinim ghilalooŋ payam, leso aghur ila aghaze Maaron ineep tomani pa uraat toni. Uraat naol to Maaron igham di tivot ila Yesu nima, nene ataam to Maaron ipaghazonjaŋani ighaze ye imbaaŋa to inim. *Yo 5:36*

²³ Ngar to ivot pa Yesu, Maaron igham ngar pani alok wa. Ye ighur Yesu ilat nimamim itaghon tau ngar toni. Tauto akisi ve aghuri ila yes Roma to tikankaan pa tutuuŋ toni ne nimadi, ve anadi tirabi izala ai pambarooŋ ve imaat. *Is 53:10; Mbanj 4:28*

²⁴ Eemoghon Maaron igham mulini pa yabyabuŋ to mateeŋ, ve ipamundigini. Pasa, mateeŋ irau ikisi ne maau. *Lu 24:5; Mbanj 3:15*

²⁵ Muuŋ, kinik David isavia saveeŋ pida to iza to Yesu. Ighaze:

‘Sawa isob, you naghita Maaron ineepneep naghog ne.

Ye ineepneep ila digeg waan ve ipapalot ghou. Tovenen mbeb eta irau igham ghou runjaŋ iza ne maau.

²⁶ Tauto lolog poia kat, ve napaiti ila avog toman tinig iza.

Lolog ru maau. Naneep ve naghur matag pa ulaaŋ tiom moghon.

27 Pasa, yom irau upul murim payou, ve upul ghou namaat nazila ndug to mateeja ne maau.

You tamtoghon tiom patabuan. Tovenen yom irau upul ghou namaat, ve patug imbuuz ila naal lolo maau.

28 Yom upatoon ghou pa ataam to nepoon poia.

Ighaze naneep toman ghom, yom pale ugham ghou lolog poia le poia kat.' *Mbo 16:8+*

29 "Yo, yam tonvetaz, you nasaav ghazoonja payam: Timbuud David, ye imaat ve titavia alok wa. Indeen sawa tonowen ve inim imuul aazne, naal toni inepneep toman ghiit izi ndug tonene. *1King 2:10; Mbanj 13:35+*

30 Eemoghon David, ye propet to Maaron. Ve ye iwatag ighaze Maaron imbua saveen tomani, ve ipariaanja le iyaryaan kat ighaze ye pale ighur paghu toni eta inim kinik. Leso ana igham pooz inimale ye tau. *2Sam 7:12+; Mbo 89:3+, 132:11*

31 Maaron ipaghazonan David pa mbeb pida to muri pale tivot. Tauto ye isavia mundigiinj to Mesia, ve ighaze Maaron irau ipul muri pani, ve ipuli imaat ve izila ndug to mateeja maau. Ve irau paatu imbuuz ila naal lolo ne maau. *Mbo 16:10*

32 "Yesu to aazne nasasavia ne, Maaron ipa-mundigini pa mateen wa. Ve yei nisob tonene nighita pa matamai. Tauto nipariaan saveen toni.

33 Ve Tama Maaron ighami iza ila pa sambam, ve ighuri ineep ila pa nima waan, ve igham Avuvu Patabuan pani. Tauto aazne, Yesu ana isakia Avuvu tonowen inim irau ghei itaghon saveen mbuaan to Maaron. Avuvu tonenen, tauto inim

pughu pa mbeb to aazne aghita ve alooņa. *Yo 14:26; Pil 2:9*

³⁴ Timbuud David, ye iza ila sambam inimale Yesu maau. Eemoghon ye isavia mbeb to muri ivot pa Yesu ighaze:

‘Maaron isaav pa Tiina tiou ighaze: “Unum mbolem izi ila pa nimag waan,

³⁵ le irau natatan koiamņa ve tapiridi isob kat, ve uvazag di ila aghem paronņa.” ’ *Mbo 110:1*

³⁶ Ghoru Petrus isaav ariņa padi ighaze: “Tovenen yam Israela asob irau awatag kat tovene: Yesu to yam arabi izala ai pambaroon ve imaat, tauto Maaron ighuri inim Tiina ve Mesia.”

Ival tiina tighur ila to Yesu

³⁷ Ival tiina tiloon saveen tonene le ingal di. Tovenen tighason Petrus toman mbanjoona pida tighaze: “Wai, nditoghamai, ighaze venen, pale nigham vena?” *Hib 4:12*

³⁸ Petrus ipamuul alinadi ighaze: “Yam asob apul ngar tiam samsamia, atoor ngar tiam ila pa Maaron, ve agham ya ila Yesu Krisi iza. Leso Maaron ireu sosor tiam ilale, ve irei Avuvu Patabuan payam. *Mk 16:16; Lu 24:47; Mbanj 3:19*

³⁹ Saveen mbuaan tonene ilat pa yam Israela toman ndinatumim, ve tamtoghon tisob to ndug ndug to tineep mala ne paam. Pasa, saveen tonene injarua tamtoghon tisob to Tiina toit Maaron ipoi di pa tinim le.” *Is 57:19; Yo 10:16; Mbanj 14:27; Ep 2:13+*

⁴⁰ Petrus isavia saveen tonene moghon maau. Ye isaav ariņa padi pa saveen pida paam. Pasa, ighaze igham di titoor ngar todi ila pa Maaron.

Tovenen isaav padi ighaze: “Atañ roran Maaron, leso igham mulin gham! Pa vene, alalemim toman ndiran samsamiadi to tinepneep pa sawa tonene.”

Ga 1:4

⁴¹ Sawa tonenen, tamtoghon irau ndinndin tol (3000) ma venen tighur ila Petrus aliña, ve tigham ya. Tovenen yes paam tiloon tila lupuuñ to Krisi.

Yes to tighur ila to Krisi muuñ ne gabuadi

⁴² Yes to tighur ila to Krisi, sawa naol, tighurghur taliñadi pa saveeñ to yes mbanjoona tipatoot di pani, ve tighamgham ñgar pani pooli. Ve tiwaulan di, ve tiluplup di pa sunuun toman ghanghaniin.

⁴³ Maaron igham mbeb gharatoonadi naol tivotvot ila yes mbanjoona nimadi tinim ghilaloon pa tamtoghon, leso tighur ila to Krisi. Tovenen tamtoghon tisob to tighita Maaron tapiri, matughezaan igham di. *Mbanj 5:12; 2Kor 12:12*

⁴⁴ Yes to tighur ila to Yesu, tisob lolodi ee moghon, ve tiwaulan di. Todi eta inguruut mbeb toni maau. Tighita mbeb todi tisob tighaze nene mbeb to ival tisob. ⁴⁵ Tovenen tigholgholia taan toman mbeb todi pida, ve tighamgham yaama pa yes to mbo-laañ igham di. Tauto yes tisob ledi mbeb le irau di. *Lu 12:33; Mbanj 4:32+; 2Kor 8:13*

⁴⁶⁻⁴⁷ Ndag to naol ne, lolodi ve ñgar todi ee moghon, ve tiluplup di ila Rumai Tiina nagho. Ve tiluplup di pa sunuun toman ghanghaniin ila ruum todi todi paam. Sawa to tilup di pa ghanghaniin, lolodi poia ve tipapait Maaron iza. Tauto tamtoghon tisob tighita di ve lolodi poia padi. Ve sawa isob, Tiina toit ighamgham uraat ila tamtoghon pida lolodi, leso igham mulin di. Tauto

tighur ila to Yesu, ve tingham yes to tighur ila muun ne, le tinim ival kat.

3

Petrus igharaat narape eez

¹ Sawa eez, ndag anunu igham tol, ve sunuun to rabrab ighaze ivot. Tovenen Petrus yesuru Yoan tizala pa Rumai Tiina. ² Yesuru tila le tivot to ngeu narape eez to timbaada tinim. Ngeu tonowen, tina ipooa aghe samia. Tovenen moghon moghon tighurghuri igharau sirsiir to Rumai Tiina ataama to tiwaata tighaze ‘Ataam Paghuna.’ Leso ineep tonowe, ve isun yes to tighaze tiloon tila sirsiir to Rumai Tiina lolo ne pa le mbeb. ³ Ye ighita Petrus yesuru Yoan tinim ve tighaze tiloon tila sirsiir to Rumai Tiina lolo. Ghoru isun yesuru ighaze tiuuli. ⁴ Yesuru matadi ila pani, ve Petrus isaav pani ighaze: “Matam inim!” ⁵ Tovenen ngeu tonowen ighur mata pa yesuru ighaze pale tigham le mbeb eta.

⁶ Eemoghon Petrus isaav pani ighaze: “You leg yaam silva ma gol eta maau. Eemoghon mbeb to ineep tiou ne, tauto pale naghama payom. You nasaav payom: Ila Yesu Krisi to Nasaret iza, umundig ve ulaagh!”

Mban 14:10

⁷⁻⁸ Ghoru ikis ngeu tonenen nima waan ighaze indaea imundig. Rikia moghon ve ngeu tonenen aghe senganja poia. Tovenen purukia imundig iyoona ve ilaagh. Ghoru iyatovtova toman tini iza, ve ipapait Maaron iza, ve itaghon Petrus yesuru Yoan, ve yesna tiloon tila sirsiir to Rumai Tiina lolo. ⁹ Tamtooghon tisob to tighita ngeu tonenen

ilaghlaagh ve ipapait Maaron iza, ¹⁰ yes tighi-laala tighaze ye to muun inepneep igharau Ataam Paghuna, ve isun̄sun̄ tamtoghon pa le mbeb. Tovenen ruŋadi iza pa mbeb gharatoon̄a to ivot pani, le avodi ikaak.

Mos to Petrus ivotia ila Rumai Tiina nagho

¹¹ Ngeu tonenen ikiskis Petrus yesuru Yoan, ve mala maau ival tiina tilaan tinim tivot todi izi ruum to nepoon̄ to Solomon ireii ila Rumai Tiina dige. Pasa, ruŋadi iza pa mbeb gharatoon̄a to ivot ne le avodi ikaak.

¹² Petrus ighita di, ve isaav padi ighaze: “O yam Israela, pughu vena to ruŋamim iza pa mbeb tonene, ve matamim den̄ia payei? Yam aghaze yeru lemai tapirimai tiina, ma nitaghon katin Maaron ŋgar toni, tauto nigham ngeu tonene ilaagh ne? Maau. ¹³ Maaron to nditimbuud, ye Maaron to Abaram, Isak ve Yakop. Ye to igham mbesoon̄a toni Yesu iza ila pa sambam, ve aazne igham mbeb tonene pa ipaghazonan Yesu ighaze ye iza tiina. Yam awatag: Taumim aghur Yesu ila Piladus nima. Ve sawa to Piladus iloon̄ saveeŋ toni ve ighaze ipuli ilat tiam, yam azuruni. *Igham 3:6; Lu 23:18+*

¹⁴ Aghita. Yesu, ye ngeu patabuan̄ ve den̄ia. Eemoghon lolomim pani maau, ve azuruni. Ve ngeu to irab tamtoghon imaat, tauto yam azoorn-dug aghaze le Piladus ipuli ilat tiam. ¹⁵ Tovenen ngeu to inim pughu pa nepoon̄ to mataad iyaryaar, tauto yam arabi imaat. Eemoghon Maaron ipamundigini pa mateeŋ, ve yei tonene nighita katini pa matamai. Tauto aazne, nipariaaŋ saveeŋ toni, leso aghur ila toni. *Lu 24:48; Mban̄ 1:8, 2:24,32+*

¹⁶ Itaad tonene, yam awatag patañani toni. Yesu iza ve tapiri, tauto igham ngeu tonene tapiri ivot ve tini poia. Mbeb ite paam maau. Yesu ipamundigin ghei ve nighur ila toni ariana. Ve ghurla tiei to injarua Yesu, tauto iuul ngeu tonene ve tini poia, ve aazne iyoon ila matamim. *Lu 17:19; Mban 4:10*

¹⁷ “Yam tonvetaz, you nawatag: Yamña daba tiam aghilaal Yesu maau, tauto agham ngar samia pani. *Lu 23:34; 1Kor 2:8*

¹⁸ Ve aloonj. Muunj, Maaron ivotia aliña ila propeta toni tisob avodi ighaze Mesia toni pale imbaad patañani ve iyamaan yabyabuunj tiina. Ngar to agham pa Yesu, nene ataam to Maaron aliña tonowen anona ivot. *Mbo 22; Is 53:5+; Lu 24:44; 1Pe 1:10+*

¹⁹⁻²⁰ Tovenen yam apul ngar tiam samsamia, ve atoor ngar tiam imuul ila pa Maaron. Leso Maaron ireu sosor tiam isob ilale, ve Tiina toit ineep toman gham ve ipariaanj gham pa tau tapiri. Ve ye pale imbaanj Yesu imuul inim. Ye Mesia to Maaron tau ighuri pa igham mulin gham. *Mban 1:11; 1Tes 4:16*

²¹ Ye irau ineep izi ndug sambam ve isasaan le irau sawa to Maaron igharaat mulin mbeb tisob, itaghon saveenj to muunj ye ivotia ila propeta toni patabuaña avodi. *2Pe 3:13*

²² Muunj, Mose imbood saveenj pida to iza to Yesu ighaze:

‘Tiina tiam Maaron pale ighur tamtoghon tiam eta inim propet, ve ivotia Maaron aliña payam inimale you. Tovenen sa saveenj to ighaze ye isavia, yam irau aloonja ve ataghooni. ²³ Ve ighaze tamtoghon eta iloonj

aliņa maau, ve izoor saveeņ toni, nene pale Maaron iwaghamuni ve ilale. Leso indiira ighau pa tamtoghon toni Israela.’ *Lo 18:15+; Mbanj 7:23*

²⁴ “Tovenen aghita. Sawa to propet Samuel ve inim, propeta tisob to Maaron tisavia mbeb to ivot pa sawa tonene. *Lu 24:27*

²⁵ Yam papaghu to yes propeta. Saveeņ todi, nene inarua gham. Ve saveeņ to Maaron im-bua toman nditimbud, tovene paam. Inarua gham. Matamim injal saveeņ to Maaron isavia pa Abaram ighaze:

‘Papaghu tiom pale tinim ataam pa poia tiou iza to ndug tisob to taan.’ *Mbnp 22:18; Ga 3:8*

²⁶ “Tovenen aghita. Sawa to Maaron ighur uraat ila mbesoonja toni Yesu nima, ye imbaanja ilat tiam muuņ. Leso igham gham atoor njar tiam, ve yam enjaeņa asob apul njar tiam samsamia, ve poia toni iza tiam.” *Mbanj 13:46, 22:21; Ro 1:16*

4

Tipayoon Petrus yesuru Yoan pa savsaveeņ

¹ Petrus yesuru Yoan tisavsaav pa tamtoghon sone, ve ndiran pida to watoonrau, ve daba to yes uraata to tinģin Rumai Tiina, toman Sadusi pida tinjarua di tinim. ² Yes tinim toman atedi yabyab pasa, yesuru tipatoot tamtoghon pa Maaron aliņa, ve tivovotia saveeņ padi tighaze yes to tinim Yesu

le ve tineep tunja ila toni, Maaron pale ipamundi-
gin di pa mateen.* *Mbanj 17:18,*

23:6

³ Sawa tonenen, rabrab izi wa. Tovenen tikis yesuru, ve tighur di tiloonj tila ruum to yabyabuunj. Leso tineep tonowe ve ndugizau, ghoru titiir saveenj todi. ⁴ Yes to tiloonj saveenj to yesuru, katindi titoor njar todi ve tighur ila to Yesu. Tovenen tinjal yes to munjinadi ne, le tinim ival kat. Nditamoot todi moghon irau ndinjinj liim (5000) ma venen.

⁵ Mboj ndugizau, ghoru pooza to yes Yuda, toman nginiinja todi ve ndiran njara pida to tutuunj tilup di izi Yerusalem. ⁶ Ve Anas to daba munjina to watoonjrau, toman Kaiapas to igham Anas ina, Yoan, Aleksander, ve Anas sinj toni pida, yes tisob tineep ila lupuunj tonowen paam.†

⁷ Tilup di ve tinepneep, ve tigham Petrus yesuru Yoan tinim, ve tipayoon di ila matadi, ve tighason di tighaze: “Ai, mbeb to noor ivot, yamru agham tapirimim vena, to agham mbeb tonenen ivot? Ve agham uraat tonenen ila sei iza?”

⁸ Avuvu Patabuanj izeev Petrus, ve ye isaav padi ighaze: “Yam pooza ve yam nginiinja, vena?”

⁹ Aazne, aghaze aghason ghei pa uraat poia to ivot pa ngeu narape tonene, ve ataam to ye tini poia

* **4:2:** Yes Sadusi tighur ila tighaze mateenja irau timundig muul maau (Mt 22:23). Tauto atedi yabyab pa saveenj to Petrus yesuru Yoan. † **4:6:** Anas inim daba to watoonjrau, ve muri ghoru, rawa Kaiapas igham ina. Tovenen sawa to tirab Yesu imaat, ve inim sawa to tipayoon Petrus yesuru Yoan pa savsaveenj, Kaipas ye daba to watoonjrau. Eemoghon Anas iza ‘daba to watoonjrau’ inepneep sone.

pani, tauto agham ghei ninim ne? ¹⁰ Poia. You nag-haze yamnja Israela asob awatag kat tovene: Yesu Kriisi to Nasaret to yam arabi izala ai pambaroon ve imaat, ve Maaron ipamundigini pa mateen, ila ye iza ve tapiri, ngeu to aazne iyondyood ila matamim ne tini poia. *Mbanj 3:13+*

¹¹ Yesu tonene to muun timbood saveen iza toni tighaze:

‘Yaam to yam ndiran to reinj ruum matamim velegini ve apiyaava ilale, tauto inim pughu pa ruum ve ipaloti. Leso ruum iyoon ariana izala pogho.’ ‡ *Mbo 118:22; Mt 21:42*

¹² “Yesu moghon to Maaron ighuri inim Volaanja pait. Tamtoghon ite paam to taan le iza pa uraat tovene maau. Ila ye iza moghon, tauto Maaron igham mulin ghiit pa patajani to sosor toit, ve taneep pooi.” *Mt 1:21; Mbanj 10:43; Ro 10:13*

¹³ Yes daba tonowen tiwatag: Petrus ve Yoan, yesuru tamtoghon to paanu moghon. Tila skul tiina eta maau. Eemoghon tighita yesuru timatughez maau, ve tiyoon ariana kat pa savaaveen. Tovenen tigham njar naol padi, ve tighilaal di tighaze muun, yesna Yesu tilaghlaagh.

¹⁴ Ve tighita narape to yesuru tighami aghe poia ne, yesna tiyondyood. Tovenen irau tisavia saveen eta maau. ¹⁵ Tauto tizurun Petrus yesuru Yoan pa lupuunj todi ve tivot tila pumuri, ve yes moghon tiwasavon di. ¹⁶ Tighaze: “Laak, pale tagham vena pa yesuru? Pasa, mbeb gharatoonja tiina to tighami, nene ipatoonj Maaron tapiri ivot

‡ **4:11:** Ruum to saveenj waaro tonene isavia, nene tamtoghon to Maaron lupuunj todi. Ve yaam to inim pughu pa ruum, nene Yesu tau.

ighazon, ve ival tiina to tineep Yerusalem ne, tisob tiwatagi wa. Tovenen ighaze tatoova pa tatatan saveen to yesuru taghaze kaarom, nene irau tamtoghon tiloon ghiit maau. *Yo 11:47*

¹⁷ Eemoghon iit irau tarab matin saveen tonene. Pa vene, varu ilaan ila ve tamtoghon tisob tiwatagi. Tovenen tanjalsekin di ariana. Leso tivotia saveen pa tamtoghon ila ngeu tonowen iza muul sob.”

¹⁸ Tiwasavon di le isob, ghoru tipoi mbanjoona ru tonenen tiloon tinim muul, ve tisaav ariana padi tighaze tisavia saveen eta pa tamtoghon ila Yesu iza malep, ve tipatoot di pani muul malep. *Mban 5:28,40*

¹⁹ Eemoghon yesuru tipamuul alinadi tighaze: “Yam taumim angabiiz: Ngar sine to denja ila Maaron mata? Pale niloon yam alinamim ve nitaghoni, ma nitaghon Maaron alina? *Mban 5:29*

²⁰ Pasa, mbeb tiina to yeru nighita ve niloona, nene irau neneenamai pani maau. Pale nisasavia moghon tovene.”

²¹⁻²² Yesuru tisaav tovene, ve yes daba tonenen tigham saveen matughezaan padi muul. Ghoru tipul di tila. Yes tighaze tingal yesuru matadi. Eemoghon tiraua maau. Pasa, narape to mbeb gharatooona tonowen ivot pani, ndaman toni ilib pa tamoot ru (40) wa. Tovenen mbeb to ivot, nene igham ival tiina tisob tipapait Maaron iza pa tapiri ve poia toni.

Yes to tighur ila to Yesu, tighason Maaron pa ipalot di, lesu tiyoon ariana

²³ Yes daba tonenen tipul Petrus yesuru Yoan tila, ve malmalidi tila to nditadi, ve tipaesia saveen to yes daba to watoonrau ve yes nginiina tisavia padi. ²⁴ Nditadi tiloon paesiin todi, ve tisob tilup lolodi inim ee moghon, ve titañ roran Maaron tighaze: “Tiina tiei, yom ughur sambam, taan, ve te, toman mbef tisob to tineep ila, ve ungin di. ²⁵ Muun, Avuvum Patabuan ipamundigin timbumai David to mbesoona tiom, ve isaav tovene:

‘Pughu vena to ndug ndug atedi yabyab ve tighaze tipamundigin malmal?’

Tamtoghon tikaal ataam pa tigham didiaan pasa? Ngar todi irau ighur maau. Tighami sorok.

²⁶ Yes kinik to taan tigham aghedi tighaze tigham malmal.

Yes pooza tilup di, ve tikaal ataam pa tizoor Maaron ve titatan Mesia toni.’ *Mbo 2:1+*

²⁷ “Saveen tonene, aazne anoona ivot wa. Pasa, yom taum ughur Yesu, to mbesoona tiom patabuan, inim Mesia. Eemoghon Erod yesuru Piladus toman yes to Yuda maau ne, ve ival tiina to Israel paam, tilup di izi ndug tiina tonene, ve tikaal ataam pa tizoor saveen toni ve titatani. Tauto tirabi imaat. *Lu 23:7+*

²⁸ Eemoghon ngar to tigham pani, nene itaghon taum ngar tiom. Matam ingal muun wa ughaze ila taum tapirim, yom pale ugham mbef tonene ivot. *Mban 2:23*

²⁹ O Maaron, saveen matughezaan to tighamgham payei ne, yom uwatagi wa. Tovenen yei to ninim mbesoona tiom ne, nitañ roran ghom nighaze

upalot ghei. Leso nimatughez sob, ve niyoon ariana pa votiaan saveen tiom. *Mban 13:46; Ep 6:19+; Pil 1:14*

³⁰ Upatoon tapirim ivot ighazoon, ve ugharaat yes moroghoona le tinidi popoia, ve ugham mbef gharatoonadi tintina tivot ila mbesoona tiom patabuan Yesu iza, lesa tinim ghilaloon pa tamtoghon, ve tighur ila toni.”

³¹ Tisun le isob, ghoru Maaron tapiri itok ndug to tilup di pani, le irur inimale yongyoog itok. Ve Avuvu Patabuan izeev di tisob. Tauto timatughez maau, ve tiyoon ariana pa votiaan Maaron aliya pa tamtoghon. *Mban 2:2+*

Yes to tighur ila to Yesu tiwaulan di

³² Yes to tighur ila to Yesu, tisob lolodi ve ngar todi ee moghon, ve tiwaulan di. Todi eta inguruut mbef toni ve isaav ighaze nene mbef to tau moghon ne maau. Tighita mbef todi tisob tighaze nene mbef to ival tisob. *Lu 12:33; Mban 2:44+*

³³ Ve yes mbanjoona tipariaan saveen pa mundigiin to Tiina toit Yesu, lesa tamtoghon tighur ila toni. Ve uraat todi ilandaad toman tapiri. Tauto Maaron poia toni tiina inepneep toman di tisob. ³⁴⁻³⁵ Tamtoghon todi eta imbool pa mbef eta maau. Pasa, yes to ledi taan ma ruum, tigholgholia mbef todi, ve tighamgham yaama ve tighurghuri ila to yes mbanjoona. Ghoru anadi tireii pa yes to mbolaan igham di. *2Kor 8:13+*

³⁶⁻³⁷ Tauto ngeu eez to mutu Saiprus, iza Yosep, ye paam igholia taan toni, ve igham yaama ve ighuri ila to yes mbanjoona. Yosep tonene, pughu toni ivot ila to Levi. Ve yes mbanjoona titoor iza, ve

tiwaata tighaze Banabas. (Pisis Banabas, pughu tovene: 'Ngeu to ipapalot tamtoghon.') *Mbanj 9:27, 11:22,30, 13:2*

5

Ananias yesuru azuwa Sapira tigham kaarom, ve Maaron irab di timaat

¹ Ngeu todi eez, iza Ananias. Ve azuwa iza Sapira. Yesuru paam tigholia taan todi eez.

² Eemoghon Ananias igham kaarom. Pasa, itatan taan tonowen yaama pida ineep, ve igham pida moghon ve ighuri ila to yes mbanjoonja. Eemoghon isaav padi ighaze taan toni yaama, tauto isob ila todi. Kaarom to ye ighami, azuwa Sapira iwatagi paam. *Yos 7:1-26*

³ Tovenen Petrus isaav pani ighaze: "Wai, Ananias, pughu vena to upul Ngeu Samia izeev ghom ve utatan yaam pida? Ngar to ughami ne, yom ugham kaarom pa Avuvu Patabuanj. *Lo 23:21+; Lu 22:3*

⁴ Sawa to ugholia taan tiom sone, nenen yom mbeb tiom. Ve sawa to ugholia, sa ngar to matam ingali ughaze upul yaam tonene pani, nene ineep to yom taum. Pughu vena to lolom ipazaagh ghom pa ngar samia tonene? Aazne, ugham kaarom pa yei tamtoghon maau. Yom ugham kaarom pa Maaron!" *Mt 23:27+*

⁵ Ananias iloonj saveenj tonene, ve itap izi le imaat kusia. Tovenen tamtoghon tisob to tiloonj mbeb tonenen varu, matughezaan tiina igham di.

⁶ Ghoron dipain pida tinim ve tikau Ananias paatu pa uli, ve timbaada tila titavia.

7 Tineep mala ris (irau aua tol ma venen), ghoru Ananias azuwa Sapira ana iloon ila todi. Eemoghon mbeb to ivot pa Ananias, ye iwatagi maau. 8 Ye iloon ila, ve Petrus ighasoni ighaze: “Yo, usaav ghazona payou. Taan to yamru azuwam agholia ne, atia tau tonene?”

Ye ipamuul aliya ighaze: “Vee, atia tauto nenen moghon.”

9 Tovenen Petrus isaav pani muul ighaze: “Pughu vena to yamru azuwam alup lolomim ve aghaze atoov Maaron Avuvu? Uloon. Yes to tila titavia azuwam, tauto ngaramus timuul tinim tiyondyood ataam avo. Ve yom paam, pale timbaad ghom uvot ula.”

10 Rikia moghon ve liva ana, itap izi Petrus aghe pughu, ve imaat kusia. Ndipain to titavia Ananias, tiloon tinim, ve tighita Sapira paam imaat ve ighengheen. Tovenen tisuri iza, ve timbaada tila titavia izi azuwa dige. 11 Mbeb tonenen ivot, le matughezaan tiina igham tamtoghon tisob to tineep ila lupuu to Krisi. Ve yes moghon maau. Tamtoghon tisob to tiloon yesuru varudi ne timatughez paam.

Yes mbanjoona tigham mbeb gharatoonadi tintina pida tivot

12 Sawa tonenen, Maaron igham mbeb gharatoonadi katindi tivotvot ila yes mbanjoona nimadi tinim ghilaloon pa tamtoghon, leso tighur ila to Yesu. Ve yes to tighur ila to Yesu, lolodi ee moghon, ve moghon moghon tiluplup di ila ruum to nepoon to Solomon ireii ila Rumai Tiina dige. *Mban 2:43; 2Kor 12:12*

¹³ Tamtoghon tila toman di sorok maau. Pasa, timatughez. Eemoghon ival tiina titandag padi, ve tipapait varudi. ¹⁴ Sawa tonenen, tamtoghon papaghu katindi tighur ila. Tauto tinim Tiina toit Yesu le, ve tinjal yes to munjinadi, le tinim ival le ival kat. Yes nditamoot ve ndiliva paam. ¹⁵ Mbeb gharatoojadi to yes mbanjoona tighamgham di ne, varudi ilaan irau ndug ndug. Tovenen sawa isob, tamtoghon timbadbaad moroghoona todi tilala, ve tighurghur di ila ataam dige, ve tisanajan. Pida tigheen izala ndiu, ve pida tigheen izala moogh. Pasa, tinumeer tighaze sawa to Petrus ilaagh inarua di inim, ve ighaze yavyaava rita izala poghodi, nene pale igham di tinidi popoia. *Mt 9:21, 14:36; Mbanj 19:12*

¹⁶ Ndug pida to tineep tigharau Yerusalem ne, paam. Tighamgham moroghoona todi toman tamtoghon todi pida to avuvu samsamiadi tiwaghamun di tilala Yerusalem, ve tinajarua yes mbanjoona. Ve yes mbanjoona tiuul di tisob tinidi popoia. *Mt 8:16*

Tighur yes mbanjoona tilooj tila ruum to yabyabuunj

¹⁷ Daba to watoonrau, toman yes Sadusi tisob to tiluplup tomani, tighita uraat to yes mbanjoona ilaan toman tapiri, le ireu lolodi ve atedi yabyab kat. ¹⁸ Tovenen tila tikis di, ve tizeev di tilooj tila ruum to yabyabuunj. *Mbanj 4:3*

¹⁹ Eemoghon mboj tonenen, ajela eez to Maaron ivot todi, ve ikaak ataam to ruum to yabyabuunj, ve igham di tivot tila pumuri. *Mbo 34:7, 146:7; Mbanj 12:7+, 16:26*

²⁰ Ghoru isaav padi ighaze: “Yam ala ayoon ila Rumai Tiina nagho, ve avotia nepoon paghu tonene ngara isob pa tamtoghon, leso tighazoon pani.”

²¹ Tovenen ndugizau ve titaghon anela aliya, ve tiloon tila sirsiir to Rumai Tiina lolo, ve tipamundigin uraat todi to patonjaan tamtoghon pa Maaron aliya.

Sawa ee moghon tonenen, daba to watoonrau toman ndita pida tipoi yes pooza to Israel tinim tilup di, ve timbaan uraata todi pida tila ruum to yabyabuun, leso tigham yes mbanjoonja tinim.

²² Eemoghon tiloon tila ruum to yabyabuun, ve tikaal di le maau. Tovenen timuul tila to yes pooza, ve tipaes padi tighaze: ²³ “Aloon. Sawa to nila peria ruum to yabyabuun, nighita ataam tisob, tipoon di le tunja kat. Ve ndiran to tingin ataam, tiyondyood. Eemoghon nikaak ataam ve niloon nila, le runamai iza pa ruum lolo nginiya. Tamtoghon eta ineep maau.” ²⁴ Daba to yes uraata to tingin Rumai Tiina, toman yes daba to watoonrau tiloon paesiin tonene, le ngar todi iwaghamgham ve tighaze: “Wai, ighaze venen, sa paam pale ivot?”

²⁵ Mala maau ve ngeu ite ana inim, ve ipaes padi ighaze: “Ou, yam anepneep? Ndiran to azeev di tiloon tila ruum to yabyabuun, tauto tiyondyood ila Rumai Tiina nagho, ve tipatoot tamtoghon we!”

²⁶ Daba to yes uraata to tingin Rumai Tiina, iloon saveen tonene, ve imundig iyou ndita, ve tila tighaze tikis di muul. Eemoghon sawa to tivot todi, tigham samin di maau. Tikis di pooi. Pasa, timatughez pa ival tiina tonowen pale timundig ve tirab di pa yaam.

²⁷ Tovenen tikis yes mbanjoonja, ve tigham di timuul tila, ve tipayoon di ila lupuun tiina tonenen matadi. Ghoru daba to watoonrau iyaan di ighaze: ²⁸ “Awaat ngeu tonowen iza iraua! Yam talinamim maau? Yei ningalsekin gham ariana wa: Apatoot tamtoghon pa Maaron aliña ila ngeu tonowen iza malep. Eemoghon yam asasavia varu le tamtoghon tisob to Yerusalem tiwatagi wa. Vena, yam aghaze asuk payei pa mateen toni?” *Mt 23:35, 27:25; Mbanj 4:18*

²⁹ Petrus yesña mbanjoonja pida tipamuul aliña tighaze: “Yei irau nitaghon sorokin saveen to tamtoghon eta to taan maau. Saveen to denja pa Maaron ngar toni, ghoru nitaghoni. *Mbanj 4:19; Ga 1:10; 1Tes 2:4*

³⁰ Aloon. Yesu to yam arabi izala ai pambaroon ve imaat, Maaron to nditimbuud ipamundigini pa mateen wa. *Ga 3:13*

³¹ Ve ighami iza ila pa sambam, ve ighuri ineep ila ye tau nima waan. Tauto ipaghazonani ighaze ye iza tiina. Tama Maaron ighuri inim Daba pait, ve ye Volaanja toit. Ye irau igham iit Israela tator ngar toit ila pa Maaron, ve ireu sosor toit isob ilale. *Mk 16:19; Mbanj 2:38, 3:19*

³² Mbeb naol to tivot pani, yei nighita di pa mata-mai. Tauto nipariaan saveen toni, leso tamtoghon tighur ila toni. Ve yei moghon maau. Avuvu Patabuan to Maaron igham pa tamtoghon tisob to titaghon ngar toni, ye paam ipariaan Yesu saveen toni.” *Lu 24:47+; Yo 15:26+*

Gamaliel ingalsekin lupuun tiina ighaze tigham samin yes mbanjoonja malep

³³ Yes to tineep ila lupuun tonowen, tiloon saveen tonene, le ipas atedi ve tighaze tirab di timaat pataghaan. ³⁴ Eemoghon ngeu tutuunja eez ineep ila lupuun tonenen lolo, iza Gamaliel. Ye patonjaan eez to tutuun, ve tamtoghon tisob titandag pani. Ye imundig iyoon, ve isaav padi ighaze: “Ai, agham ndiran tonene tivot tila pumuri o.”

³⁵ Tovenen tigham yes mbanjoona tivot tila pumuri le isob, ghoru Gamaliel isaav pa yes to tineep ila lupuun ighaze: “Yam tamtoghon to Israel, aloon. Agham mbeb eta pa ndiran tonowen rikia malep. Aneep ve agham ngar pooi. ³⁶ Matamim ingal ngar to muun ivot pa Teudas. Ye imundig, ve ipakur tau ighaze ye ngeu ariana eez. Ve iyou le tamtoghon 400 ve titaghoni. Eemoghon sawa to tirabi imaat, ndita tisob tighau tila, ve anoja eta ivot maau.

³⁷ Muri pa nenen, sawa to gavman to Rom tigham tamtoghon izadi, Yudas to Galilaia ana imundig iweu tamtoghon, ve titaghoni tighaze tizurun gavman to Rom tighau. Eemoghon ye paam, tirabi imaat, ve ndita tisob tighau. ³⁸ Tovenen aazne, you naghaze nauul ngar tiam. Ndiran tonowen, agham mbeb eta padi malep. Apul di tineep. Pasa, takankaan pa ngar todi ve uraat todi pughu. Ighaze ivot itaghon ngar to tamtoghon, nene pale le anoja maau. *Mt 15:13*

³⁹ Eemoghon ighaze Maaron inim pughu pani, ve yam atoova pa atatan di, nene pale araua maau. Tovenen apatum gham. Pa vene, aparab toman Maaron.” *Lu 21:15*

⁴⁰ Gamaliel saveen toni igham di atedi izi ris. Tovenen tipoi yes mbanjoona tiloon tinim muul, ve tilos di, ve tingalsekin di ariana tighaze tisaav

pa tamtoohon ila Yesu iza muul malep. Ghoru tipul di tila. ⁴¹ Yes mbanjoona tipul lupuun tiina tonenen, ve tila toman lolodi poia ve tinidi iza. Pasa, Maaron ighita di ighaze yes popoiadi irau to timbaad patanani ve mayanjiina pa Krisi iza. *Mt 5:10+; Mban 14:22; Pil 1:29; 1Pe 4:13*

⁴² Ndag to naol ne, yes mbanjoona tipatoot tamtoohon pa Maaron aliina ila Rumai Tiina nagho, ve ila ruum avo avo paam. Ve tivovotia Yesu varu pa tamtoohon tighaze ye Mesia. Uraat todi tonowen, tipuli maau.

6

Tighur tamtoohon liim ve ru pa tiuul yes mbanjoona

¹ Sawa tonenen, yes to titaghon Yesu tivot tinim ival. Eemoghon patanani eez ivot ila sosodi. Yes Yuda to tisavsaav ila Grika alinadi, tiyou avodi pa nditadi to tisavsaav ila saveen Hibu tighaze: Ndag to naol ne, sawa to rein ulaan pida pa yes mbolaana, nditadi to tisavsaav ila saveen Hibu, matadi ingal yes Grika ndinaara todi kat maau.

² Tovenen yes mbanjoona saangul ve ru tipoi tamtoohon tisob to titaghon Yesu tinim tilup di, ve tisaav padi tighaze: “Yam tonvetaz, aghita. Ighaze yei mbanjoona nigham uraat pa rein aniin, ve nipul uraat to votiaan Maaron aliina, nene denja maau.

³ Tovenen yam atiir taumim, ve aghur lemim tamtoohon liim ve ru to varudi toman ngar todi popoia, ve ngar to Avuvu Patabuan ivon ila lolodi. Leso nipul uraat to rein aniin ve ulaan pida ila nimadi. *1Tim 3:2+; Tit 1:6+*

⁴ Ve yei pale nineep pa sunuun moghon, ve uraat to patoona tamtoghon pa Maaron aliina.”

⁵ Ival tiina tiloon saveen todi tonene, ve tisob tiyok pani. Tovenen tighur Stepanus (ye ghurla toni iyaryaan kat, ve ngar to Avuvu Patabuan ivon ila lolo), ve Pilip yesuru Prokorus, Nikanor, Timon, Parmenas, ve Nikolas to ndug Antiok. Nikolas tonene, ye Yuda kat maau. Eemoghon itoor ngar toni ila pa Maaron, ve itaghon yes Yuda pa sunuun todi. ⁶ Tigham ndiran liim ve ru tonowen tinim tiyoon ila yes mbanjoona matadi, ghoron mbanjoona tighur nimadi izala poghodi, ve tighason Maaron pa ipalot di, ve tighur di pa uraat.*

Mban 13:3; 1Tim 4:14

⁷ Sawa tonenen, Maaron saveen toni ilaan toman tapiri irau ndug ndug. Tovenen Yesu taghoniina toni tivot tinim ival le ival kat izi Yerusalem. Yes ndiran to watoonrau paam, tamtoghon todi katindi titoor ngar todi, ve tighur ila to Krisi, ve titaghon ataam toni. *Mban 12:24, 19:20*

Tikis Stepanus

⁸ Stepanus, ye ngeu eez to Maaron tapiri ve poia toni ivon ila lolo kat. Tovenen ighamgham mbeg gharatoonadi tintina tivotvot ila tamtoghon matadi. Mbeg tonowen tinim ghilaloon pani tighaze Maaron ineep tomani pa uraat toni. *Mban 2:43*

* **6:6:** Yes to tisavsav ila Grika aliinadi, to tiyoo avodi pa uraat to rein aniin. Ndiran liim ve ru to tighur di pa uraat ne, izadi ipatoon di ighaze yes tinepneep toman Grika ve tiwatag Grika gabuadi. Tauto yes mbanjoona tighur di pa tingin uraat tonowen.

⁹ Yuda pida, muunj tinim mbesoonja sorok. Eemoghon tipas di pa uraat todi, ve ngaramus tinim mbesoonja pa tamtoghon muul maau. Tingin taudi. Yes tipamundigin lupuunj eez, ve tiwaat iza tighaze ‘Lupuunj to yes to tinim mbesoonja muul maau.’ Lupuunj tonowen tamtoghona pida timundig, ve yesnja Stepanus tiwazoran di pa savsaveen. Ndiran tonowen, pida to ndug Sairini, pida to Aleksandria, pida to taan to Silisia, ve pida to taan to Asia. ¹⁰ Eemoghon yes tirau Stepanus maau. Pasa, ye le ngar tiina, ve Avuvu Patabuanj ipapalot saveenj toni. *Lu 21:15*

¹¹ Tovenen tikaal ataam pani, ve tipazaagh tamtoghon pida ve tingal saveenj pani tighaze: “Yei niloonj ngeu tonene ipiyaav saveenj velegiinj pa Mose ve Maaron.” *Mt 26:59+*

¹² Tisaav tovene, le tipazaagh ival tiina to yes Yuda, toman nginiinja todi ve yes ngara to tutuunj. Tovenen timundig tila tikis Stepanus, ve tiweua iloonj ila lupuunj to yes daba to yes Yuda, ve tipayoonda ila matadi. ¹³ Ghoru tiyou ndiran kaaromnja pida tinim, ve tipayoon di ila lupuunj tonowen matadi paam, ve yes kaaromnja tonowen tingal saveenj pa Stepanus tighaze: “Ngeu tonene, sawa isob, isasavia saveenj velegiinj injarua rumai patabuanj to Maaron ve tutuunj to Mose. ¹⁴ Yei niloonja ighaze Yesu to Nasaret pale ireu Rumai Tiina tonene izi. Ve tutuunj to Mose igham pait ve tataghoni to muunj ve inim ne paam, ye pale itoora.” *Mt 5:17; Mk 14:57+; Yo 2:20+*

¹⁵ Yes to tineep ila lupuunj tonenen tiloonj saveenj tonene, le tisob matadi denja pa Stepanus, ve tighita nagho isul inimale anjela.

7

Stepanus isavia yes Yuda gabuadi: Muun ve inim, yes tizoor Maaron aliija

¹ Ghoru daba to watoonrau ighason Stepanus ighaze: “Laak, saveen to tisavia ne, nene onoon?”

Muun, Maaron ivot to Abaram izi taan suruvu to Mesopotamia

² Stepanus ipamuul aliija ighaze: *
 “Yam nditaman ve tonvetaz tiou, aloon saveen tiou tonene ve agham ngar pani pooi. Muun kat, sawa to timbuud Abaram ila ineep izi ndug Aran sone, ve inepneep izi taan suruvu to Mesopotamia, Maaron toit to iza tiina pa tapiri ve poia toni ne ivot toni, ³ ve isaav pani ighaze:

‘Umundig, upul taan tiom toman sinj tiom, ve ula. You pale napatoon ghom pa taan to naghaze uneep pani.’ *Mbnp 11:31, 12:1*

⁴ “Tovenen Abaram ipul Mesopotamia to taan to yes Kaldia, ve ila ivot ndug Aran, ve ighur ina to nepoon tonowe. Tama Tera imaat, ve muri ghoru, Maaron ipamundigin Abaram muul ve ilaagh inim ivot taan to aazne iit tanepneep pani ne. *Mbnp 12:4+*

⁵ Maaron igham taan rita inim Abaram le kat ne maau. Eemoghon sawa to Abaram le natu eta

* **7:2:** Saveen to Stepanus mata ru. Eez, nene yes Yuda tigham ngar tiina kat pa taan todi ve rumai todi to iyoon izi Yerusalem. Yes tighaze ndug tonowen, nene Maaron ina kat. Eemoghon Stepanus isaav tovene: Maaron ineep ndug tonowen moghon maau. Ndug sine to tamtooghon toni tineep pani, ye ineep toman di. Ve saveen toni mata ite, nene vene: Muun ve inim, yes Yuda tizoor Maaron aliija.

sone, Maaron imbua saveen tomani ighaze ye pale igham taan tonene pani ve papaghu toni to muri pale tivot muri ne paam. Leso inim ledi kat. *Mbnp 12:7, 17:8; Hib 11:13*

⁶ Ve Maaron ipaghazonan Abaram pa mbeb pida to muri pale tivot ighaze:

‘Papaghu tiom pale tila tineep tinim loomba izi taan ite. Ve taan tonowen tamtoghona pale tigham di tinim mbesoonja sorok, ve tigham samin di irau ndaman 400. *Mbnp 15:13+; Igham 12:40*

⁷ Eemoghon muri, you pale naghur atia injarua taan tonowen tamtoghona pa ngar todi samia, ve naghama papaghu tiom tipul taan tonowen, ve timuul tinim. Leso tisun ve timbees payou izi sualen.’ *Igham 3:12*

⁸ “Ghoro Maaron isaav pa Abaram ighaze ngar to ziroon nditamoot pale inim ghilaloon pa saveen mbuaan to yesuru. Tovenen sawa to Abaram azuwa ipoop Isak, ve mboni inim liim ve tol, ghoro tama iziri. Muri ghoro, Isak yesuru azuwa tipoop Yakop, ve Yakop toman ndizuwa tipoop ndinatudi saangul ve ru to iit Israela tavot ila todi. *Mbnp 17:10+, 35:18*

Maaron ineep toman Yosep izi Isip

⁹ “Yakop ndinatu tighita tamandi lolo pa tazidi Yosep kat, le ireu lolodi. Tauto tigholia ila to tamtoghon pida, ve anadi tighami tila Isip, ve inim mbesoonja sorok izi tonowe. Eemoghon Maaron ineep tomani, *Mbnp 39:2,21+*

¹⁰ ve igham mulini pa patanani toni tisob. Sawa to tigham Yosep ila iyon ila kinik to Isip mata,

Maaron igham kinik lolo pani, ve ighilaala ighaze ye le njar tiina. Tauto ighuri inim nginiinj pa ruum toni toman mbeb toni tisob, ve taan isob to Isip paam. *Mbnp 41:37+*

¹¹ “Mala maau ve pitool tiina ivot irau taan isob to Isip ve Kanaan, ve igham di tineep sami kat. Iit Israela nditumbuud paam, tikaal adi aninj le maau. *Mbnp 41:54, 42:1+*

¹² Eemoghon sawa to Yakop iloon tighaze aninj wit inepneep izi Isip, ye imbaan ndinatu tila tighol adi aninj, ve timuul tinim to tamandi. Nene laghoon to tighami muun. ¹³ Tinepneep le aninj todi isob, ghoru tizila Isip muul inim pae ru. Sawa tonenen, Yosep ivotia tau pa nditogha ve tazi. Ve kinik to Isip paam iloon tighaze Yosep sinj toni pida to tinim tinepneep. *Mbnp 42:1+, 45:1+*

¹⁴ Ghoru Yosep imbaan ila pa tama Yakop ighaze yesja tamtoghon toni tisob tiyouyou, ve tizi tinim toni. Tamtoghon to timundig ve tizila Isip ne, yes irau tamoot tol saangul ve liim (75). *Mbnp 45:9+, 46:26+*

¹⁵ Tovenen Yakop toman tamtoghon toni tizila Isip, ve yesja ndinatu tisob timatmaat izi tonowe. *Mbnp 46:1+, 49:33*

¹⁶ Eemoghon titavia di izi Isip maau. Tigham patudi, ve timuul tila pa ndug Sekem, ghoru tighur di tiloon tila yaam saambu to Amor ndinatu to Abaram igholi pa yaam silva pida. *Mbnp 23:3+, 33:18+, 50:7+*

Maaron ineep toman Mose izi Isip ve Midian

¹⁷ “Saveenj to Maaron imbua toman Abaram, nene sawa inim igharau pa anonja ivot. Ve sawa

tonenen, nditimbuid to tineep izi Isip, timasa tinim ival le ival kat. *Igham 1:7*

¹⁸ Ghoru kinik paghu ana igham pooz pa Isip. Kinik tonowen iloon Yosep varu pa uraat toni rita maau. ¹⁹ Ye iwatombanon nditimbuid, ve igham samin di kat. Ve isaav ariana padi ighaze ndinatudi papaghu to ngaramus tipoop di, yes irau tipul di tineepledi. Leso timatmaat. *Igham 1:9+*

²⁰ “Sawa tonenen, Mose tina ipooa. Maaron ighita Mose ye pain paghuna kat ve lolo pani. Tina ve tama tingini izi ruum todi irau kaiyo tol, *Igham 2:2*

²¹ le pain tunja ve irau tingooza muul maau. Ghoru tighami tila, ve tipuli izi ya Nil pana. Eemoghon kinik natu liva ilaagh ila le ighita. Tauto ighami inim le, ve ingini inimale ye tau natu. ²² Mose itub inim olman, ve tipatooti pa Isipa ngar todi to naol ne. Ye ngeu ariana eez. Ve saveen toni paam, toman tapiri.

²³ “Ye inepneep le ndaman toni irau tamoot ru (40), ghoru igham ngar ighaze ila ingig yes Israela to tau sin toni. *Igham 2:11+; Hib 11:24+*

²⁴ Eemoghon sawa to ila ivot todi, ye ighita ngeu eez to Isip igham samin ngeu eez to Israel. Tovenen ilaan ila ivool to ngeu tonowen, ve irab Isip taamdi tonowen imaat inimale yatuun sosor toni.

²⁵ Mose mata ingal ighaze tamtoghon toni Israel avaat tighilaala tighaze Maaron ighuri pa igham mulin di pa patanani todi. Eemoghon ngar todi ivot pa mbeb tonenen sone.

²⁶ “Mbon ndugizau, ghoru Mose imuul ila le ighita Israela ru anadi tiparab. Tovenen itoova pa

isuul di pa malmal ve ilup di. Ve isaav padi ighaze: ‘Wai, yamru tonjvetaz! Awaghamun taumim pasa?’

²⁷ “Eemoghon ngeu to imuun pa malmal, ye imundig ve isipiir Mose ighau, ve isaav pani ighaze: ‘Ai, yom, sei ighur ghom ighaze unum nginiin payei, to ughaze ugharaat saveenj tiei?’
²⁸ Vena, yom ughaze urab ghou namaat nanimale Isip taamdi to noor urabi imaat ne?’
²⁹ Mose iloon saveenj tonene, ve imundig ve ighau ila ivot taan suruvu to yes Midiana. Ye ineep inim loom tonowe, le ivai, ve yesuru azuwa tipoop ndinatudi nditamoot ru.

³⁰ “Ndaman tamoot ru (40) paam inim ila, ghoro anela eez ila ivot toni izi ndug balim to ineep igharau lolooz Sinai. Ivot toni inimale yab to ighanghan izala ai kainanen eez.

³¹ Mose mata ila ighita mbbeb tonenen, le runja iza ve igham ngar naol. Tovenen ila igharau ai tonowen ighaze ighita poiani. Eemoghon iloon Ngeu Tiina aliija ivot ila yab tonowen ighaze:

³² ‘You Maaron to nditibum. You Maaron to Abaram, Isak, ve Yakop.’ *Igham 3:6*

Mose iloon saveenj tonene, le runja iza ve imbotoon naghо. Pasa, imatughez pa ighita Maaron.

³³ “Maaron isaav pani muul ighaze:

‘Upas duduunja to aghem izi. Pasa, taan to uyondyood izala ne, nene patabuanj.

³⁴ Uloonj. Tamtoghon tiou Israel to tineep Isip we, you naghita patanani todi wa. Yes Isipa tighamgham samin di, le tisami kat. Eemoghon tanjiiz todi, you naloonja wa. Tauto nazi nanim pa naghам mulin di pa patanani todi tonowen. Aazne, you naghaze

nambaan ghom umuul ula pa Isip. Tovenen
umundig ve ula.’ *Igham 3:5+*

*Sawa to yes Israela tineep izi ndug balim, tizor-
zoor Maaron aliŋa*

³⁵ “Aghita. Mose to muun tizuruni ve tighaze: ‘Ai, sei ighur ghom unum ŋginiin, to ughaze ugharaat saveen tiei?’ Ngeu ee moghon tonenen, to Maaron imbaan aŋela ila ivot toni inimale yab to ighanghan izala ai kainaŋen. Ve ighuri pa iŋgin yes Israela, ve igham mulin di pa patanani todi.

³⁶ Ve ye to imuun padi ve igham di tipul taan to yes Isipa, ve igham mbeb gharatoonadi tintina tinim ghilaloon padi izi Isip, Te Kaviaaŋa, ve izi ndug balim paam irau ndaman tamoot ru (40). *Igham 7-11, 14-17; Mbo 105:27*

³⁷ Mose tonene, tauto isaav pa yes Israela ighaze: ‘Maaron pale ighur tamtoghon tiam eta inim propet, lesu ivotia Maaron aliŋa payam inimale you.’ *Lo 18:15; Mban 3:22*

³⁸ “Mose toman ival tiina to Israel tinim lupuun to Maaron izi ndug balim. Ve ye isavsav toman aŋela izi lolooz Sinai, ve igham saveen to nepoon mata yaryaara ila to Maaron, ve ipaesia pa nditimbuud. Saveen tonowen, tauto iit Israela takiskisi ve inim aazne. *Igham 19:1-20:17*

³⁹ “Eemoghon nditimbuud tipul muridi pani ve lolodi pa tiloon saveen toni maau. Ve tikausim muul ila pa nepoon todi to muun tineep izi Isip.

⁴⁰ Tovenen timundig ve tisaav pa Aron tighaze: ‘Ugharaat leed maaron pida! Lesu timuun pait ve tiŋgin ghiit. Pasa, ŋgeu to igham ghiit

tapul Isip ve tanim taneep to sualen, yei
nikankaan pani: Avaat mbeb eta ivot pani
wa.’ *Igham 32:1+, 32:23*

⁴¹ “Tauto tigharaat makau natu anunu inim
maaron kaarom, ve tigham watoonrau pani.
Aghita. Mbeb to taudi tigharaata pa nimadi,
yes tipaiti toman tinidi iza. *Mbo 106:19*

⁴² Tovenen muri, Maaron ipul muri padi, ve ipul di
titaghon taudi ngar todi. Tauto timbees pa mbeb
to tineep ila sambam paronjania inimale ndag,
kaiyo, ve pitum pida. Saveeŋja ineep ila rau to yes
propeta. Ighaze:

‘O yam Israela, ndaman tamoot ru (40)
to alaghlaagh izi ndug balim, yam
aghamgham watoonrau pa makau ve sipsip.
Watoonrau naol tonanan agham eta payou?
Maau kat! *Mbo 81:12; Yer 19:13*

⁴³ Ve sawa tonenen, yam ambaad mbeez
to Molek toman pitum Repan anunu to
maaron kaarom tiam, ve alaghlaagh toman
di.†

Maaron kaaromja tonanan, taumim
agharat di pa aput aghemim padi ve
apakur di.

Tovenen you pale nareu gham, ve nandiir
gham malmalimim ala aneep izi Babilon
dige ite ve ila.’ *Amos 5:26-27*

Muun, yes Israela ledi rumai tau maau

† **7:43:** Molek ve Repan, nene pitum tintina ru to muun antuata
tighur di tinim maaron padi. Molek, nene pitum Virae. Ve Repan,
nene pitum to yes antuata tiwaata tighaze ‘Saturn.’

44 “Sawa to nditimbuud tilaghlaagh izi ndug balim, yes tilaghlaagh toman mbeez patabuanj. Mbeez tonowen, saveeŋ mbuaanj todi toman Maaron ineep ilooŋ ila.‡

Sawa to tirei mbeez tonenen, Maaron isaav ariana pa Mose ighaze ye irau itaghon katin mboom to mbeez to ighita izala lolooz Sinai. *Igham 25:9,40; Hib 8:5*

45 Nditimbuud tilaagh toman mbeez tonenen ila ila le tighuri ivool to papaghu todi. Ghoru anadi tilaagh tomani tila tila le tivot taan Kanaan. Sawa tonenen, Maaron ireu yes ndug ndug to tineep izi Kanaan tighau, ve Yosua igham yes Israela tilooŋ tinim tigham taan tonene inim ledi. Mbeez patabuanj tonenen inepneep le sawa to kinik David. *Yos 3:14+, 18:1*

46 David, Maaron lolo pani kat. Tovenen ye ighason Maaron ighaze iyok pani, ghoru irei Maaron to Yakop le rumai tau. Leso inim ina to nepooŋ. *2Sam 7:1+; Mbo 132:1+*

47 Eemoghon David irei rumai eta maau. Natu Solomon to irei rumai. *1King 6:1+*

48 “Ve Maaron Tiina To Ilib Pa Ndimaronŋa Tisob Ne, ye ineep ilooŋ ila rumai eta to tamtoghon tireii pa nimadi ne maau. Pasa, propet eez ivotia Maaron aliŋa ighaze: *Mbanj 17:24*

49 ‘Sambam, nene you inag to ghamuunj pooz. Ve taan, nene ndug to naghur agheg izala.

‡ **7:44:** Muun, Maaron isaav pa Mose ve ighur yaam babaŋadi ru tilooŋ tila bokis to saveeŋ mbuaanj to ineep mbeez patabuanj lolo. Leso yes Israela matadi kisin saveeŋ mbuaanj todi toman Maaron. Ngara tovene: Ighaze titaghon katin tutuunj tonowen, nene pale Maaron ineep toman di, ve yesŋa tilup di tinim ee moghon.

Tovenen sa ruum muul to aghaze areii payou?
 Ve sa ndug muul to aghaze aghuri payou pa
 naneep pani? *Is 66:1-2; Mt 5:34+*
⁵⁰ Maau. Pasa, taug nimag nagharaat mbeb
 naol tonenen.’ ”

Stepanus isaav ghazoonja pa yes Yuda pa sosor todi

⁵¹ Ghoro Stepanus isaav pa yes to tipayoonda pa
 savsaveen ighaze: “Yam ndiran to zoraan saveen.
 Ngar tiam ariana kat animale yes to tiwatag
 Maaron maau! Ngar samia to ineep ila lolomim,
 Maaron iwaana ivot sone. Ve talinamim ivool
 kat. Sawa isob, yam azoroor Avuvu Patabuan
 ngar toni, inim muun nditimumim tighamhami.
Igham 32:9; Lo 10:16; Is 63:10

⁵² Aghita. Muun, nditimumim tipul propet eta
 ineep? Maau. Sawa naol, tighamham samin di.
 Ve yes to muun tivotia Maaron aliña tighaze ye
 pale imbaan Mesia inim, nene nditimumim tirab
 di tisob timatmaat. Ve sawa to ngeu denja tonowen
 tau inim, yam ataghon ngar raraate. Azi ve aghuri
 ila koia nimadi, ve tirabi imaat. *Mt 23:31+; Lu
 13:34; 1Tes 2:15*

⁵³ Onoon, tutuun to Maaron to anjela tinim ataam
 pani ve izi inim, yam aghami wa. Eemoghon
 ataghoni maau.” *Mban 7:38; Ga 3:19*

Tirab Stepanus imaat

⁵⁴ Tiloon Stepanus saveen toni tonenen, le atedi
 yabyab kat, ve tinjaan mareer pani tighaze tirabi
 imaat. ⁵⁵ Eemoghon Stepanus, Avuvu Patabuan
 izeev katini, ve mata izala pa sambam le ighita

Maaron nguruba, ve ighita Yesu iyondyood ila Tama Maaron nima waan. *Mk 16:19; Lu 22:69*

⁵⁶ Tovenen isaav padi ighaze: “Aloon. You naghita sambam ikaak, ve Tamtoghon Natu iyondyood ila Maaron nima waan!” *Mbo 110:1; Ro 8:34; Kol 3:1*

⁵⁷ Tiloon saveen tonene, le bobaan tiina iza, ve tipoon taliñadi, ve tilaan tinarua Stepanus tila, ⁵⁸ ve tighami ve tisasaara ivot ila ndug tiina dige, ghoru tikor yaam ve tirabi. Yes to tipariaan saveen tighaze Stepanus igham sosor, tiduduum nonogiina todi to monañaan tizi, ve tila tighur di tila ngeu paghu eez aghe pughu, iza Saul. *Mban 22:20; Hib 11:37*

⁵⁹ Tirabrab Stepanus pa yaam, ve ye isun ighaze: “O Tiina Yesu, ugham anunug.” *Mbo 31:5; Lu 23:46*

⁶⁰ Ghoru iput aghe izi taan, ve isaav aliña tiina ighaze: “O Tiina, sosor to tigham payou ne, uyati malep. Ureua padi.” Isaav tovene, ve itap izi imaat. *Mt 5:44; Lu 23:34*

8

Saul ighur patañani pa yes to tighur ila to Yesu

¹ Sawa to tirab Stepanus imaat, Saul ineep ve iyok pa ngar to tighami.

Sawa tonenen ve ila, yes Yuda timundig ve tighur patañani tiina kat inarua lupuun to Krisi to tineep izi Yerusalem. Tigham samin di kat. Tovenen tisob tiwaghaughau irau taan suruvu to Yudea ve Samaria. Ve yes mbanjoona moghon to tineep izi Yerusalem. *Mban 1:8, 11:19*

² Sawa to Stepanus imaat, tamtoghon pida to matadi ingalngal Maaron tigham paatu ve titavia

toman tanjiiz tiina. ³ Eemoghon Saul ighaze iwaghamun lupuun to Krisi ve ipasob di kat. Tovenen ilaghlaagh taghon ruum avo avo, ve isasaar Krisi tamtoghon toni, ve ighurghur di tiloonj tila ruum to yabyabuun. Yes nditamoot ve ndiliva paam. *1Kor 15:9; Ga 1:13,23; Pil 3:6; 1Tim 1:13*

Pilip igham uraat izi taan suruvu to Samaria

⁴ Yes to tiwaghaughau, tilaagh irau ndug naol. Ve ndug sine to tila tineep pani, nene tivotia varu poia padi. ⁵ Tauto Pilip paam izila ndug tiina eez to Samaria, ve ivotia Krisi varu izi tonowe. *Mbanj 6:5, 21:8*

⁶ Ival tiina tiloonj saveenj toni, ve tighita mbeb gharatoonjadi to ye ighamgham di tinim ghilaloonj padi, le tisob tighur talijadi pooi pa saveenj toni.

⁷ Pasa, avuvu samsamiadi tiyakyak, ve tighau pa tamtoghon katindi. Ve narapeja katindi tinidi popoia. *Mk 16:17+*

⁸ Tovenen tamtoghon to ndug tonowen tinidi iza ve lolodi poia kat.

Mur taamdi eez iza Simon ighaze ighol Maaron tapiri

⁹ Ndug tonowen, mur taamdi eez inepneep, iza Simon. Muunj ve inim, ye ipapait tau iza ighaze ye ngeu tiina eez. Ival tiina to Samaria tighita mur toni anonja le avodi ikaak. *Mbanj 13:6+*

¹⁰ Tovenen tamtoghon tisob tighaze le tilonjloonj saveenj toni. Yes to izadi tintina, ve yes to ledi izadi maau ne paam. Ve tisavsav tighaze: “Wai, ngeu tonene, tapiri tiina kat inimale Maaron tau.” ¹¹ Pasa, mur to moghon moghon ye ighamghami, tamtoghon tighita le avodi ikaak.

Tauto tighurghur talijadi pa saveen toni irau sawa isob. ¹² Eemoghon sawa to Pilip ivotia varu poia pa pooz to Maaron, ve ipatoot di pa Yesu Krisi, tamtoghon katindi tighur ila ve tigham ya. Yes nditamoot ve ndiliva paam. *Mbanj 2:38*

¹³ Simon paam ighur ila ve igham ya. Sawa tonenen ve ila, ye itataghon Pilip, ve ighita mbeb gharatoonjadi tintina to Pilip ighamgham di. Mbeb tonowen tipatoonja tighaze Maaron ineep tomani pa uraat toni. Tovenen Simon ighita di, le avo ikaak.

¹⁴ Yes mbanjoona to tinepneep Yerusalem, tiloon yes Samaria varudi tighaze tigham Maaron saveen toni ve tighur ila wa. Tovenen timbaan Petrus yesuru Yoan tizila, leso tighita di. ¹⁵ Yesuru tila tivot todi, ve tighason Maaron pa irei Avuvu Patabuan pa yes to Samaria to ngaramus tighur ila. ¹⁶ Pasa, tamtoghon todi eta igham Avuvu Patabuan sone. Yes tigham ya moghon ila Tiina toit Yesu iza. ¹⁷ Tovenen Petrus yesuru Yoan tighur nimadi izala poghodi ve tipalot di, ve tigham Avuvu Patabuan. *Mbanj 2:4, 19:1+*

¹⁸ Simon to mur taamdi, ye ighita yes mbanjoona tighur nimadi izala tamtoghon poghodi ve tigham Avuvu Patabuan. Tovenen izuzuun yaam pida ila padi, ve isaav ighaze: ¹⁹ “Aa, you naghaze yam agham leg tapirimim tonanan paam. Leso sei to ighaze naghur nimag izala pogho, nene pale igham Avuvu Patabuan.”

²⁰ Eemoghon Petrus ipamuul aliija ighaze: “Wai Simon, mbeb to Maaron ireii pait sorok, yom ughaze ugholi pa yaam? Yom pale ulalem toman yaam silva tiom tonanan! *Mt 10:8; Mbanj 2:38*

21 Yom irau itinja talup ghiit pa uraat tiei tonene maau. Pasa, lolom toman n̄gar tiom, nene denja ila Maaron mata maau. *Mbo 78:37; Ep 5:5*

22 Tovenen upul n̄gar tiom samia tonanan ineep, utoor n̄gar tiom ila pa Maaron, ve usuŋi ve ughasoni: Irau lolo isamin ghom ve ireu sosor tiom to ineep ila lolom, ma maau? 23 Pasa, you naghilaal ghom wa. N̄gar samia izeev ghom, ve lolom igham pa tapiri to ineep tiei ne. Tauto iwaghamun ghom inimale mbeb lili.” *1Tim 6:9; Hib 12:15*

24 Simon ilooŋ saveeŋ tonene, ve isaav padi ighaze: “Wai, ighaze venen, yamru aghason Maaron payou! Leso pataŋani to asavia ne, ivot payou sob.”

25 Petrus yesuru Yoan tivotia saveeŋ to Tiina toit pa yes Samaria, ve tipalot di pa tighur ila toni. Le isob, ghoru timuul tizala pa Yerusalem. Yesuru tilaghlaagh, ve tivovotia varu poia pa ndug pida to Samaria to tineep taghon ataam dige. Tighamgham tovene le tila tivot Yerusalem.

Pilip ivotia varu poia pa daba eez to Etiopia

26 Ghoru aŋela eez to N̄geu Tiina ila ivot to Pilip, ve isaav pani ighaze: “Umundig ve ulaagh uzila le uvot ataam tiina to Yerusalem to imbut ndug balim, ve ila peria ndug Gaza.” 27 Pilip ilooŋ saveeŋ tonene, ve imundig ila. Ila peria ataam luvuŋa, ghoru ivot to n̄geu eez to Etiopia. N̄geu tonowen, iza tiina pasa, ye in̄gin mbaliin̄ tisob to

garawaat tidi Kandake. Kandake, ye ingin taan suruvu to Etiopia.* *Mbo 68:31, 87:4*

²⁸ Ngeu tonowen izala Yerusalem pa sunuun, ve sunuun tonenen isob wa. Tovenen igham karis toni, ve ighaze imuul ila pa ndug toni. Karis ilan-daad, ve ye iwatawaat saveen to muun propet Isaia imbooda. ²⁹ Pilip ila le ighita, ve Avuvu Patabuan isaav pani ighaze: “Unjarua karis tonowen ula, ve ulaagh tomani.”

³⁰ Tovenen Pilip ilaan injarua ila. Ila igharui, ve iloon ngeu tonowen iwatawaat saveen to propet Isaia. Tovenen Pilip ighasoni ighaze: “Ou, saveen to uwatawaata ne, yom uwatag pughu, ma maau?”

³¹ Ye ipamuul aliija ighaze: “Wai, pale nawatag pughu vena? Tamtoghon eta ipaghazonan ghou pani, ghoru naghazonn pani.” Ghoru isaav pa Pilip ighaze: “Uza unum mbolem izi toman ghou.”

³² Saveen waaro to ngeu tonowen iwatawaata, nene isaav tovene:

“Ye inimale sipsip to tighami ila pa tirabi imaat.

Ve tunja moghon ve neneenja inimale sipsip paghu to tikapis oro. Isavia saveen eta maau.

³³ Tipamayanini, ve tipayoonda pa savsaveen. Eemoghon gabizoon todi denja maau.

Sei pale inim kamos pa papaghu toni? Maau. Pasa, nepoon toni izi taan, nene tingoora tuku moghon.” *Is 53:7+*

* **8:27:** Etiopia, nene taan suruvu eez to Aprika. Ineep mala kat pa Yerusalem. Yes Etiopia tiwaat ‘kwin’ tighaze kandake. Iit tasaav taghaze ‘garawaat tidi.’

³⁴ Daba to Etiopia iwaat saveeŋ tonene, ghoru isaav pa Pilip ighaze: “Naghason ghom pa saveeŋ waaro tonene. Propet to imbood saveeŋ tonene, ye isavia tau, ma isavia ngeu ite paam?”

³⁵ Tovenen Pilip ipamundigin saveeŋ toni itaghon saveeŋ waaro to ngeu tonowen iwaata, ve iseŋga pa saveeŋ pida, ve ivotia varu poia to Yesu pani.

³⁶ Yesuru titaghon ataam tila le peria ila ya eez. Tovenen daba tonenen imundig ve ighason Pilip ighaze: “Ughita. Ya eez tonene. Irau naghama ya, ma mbeb eta ipoon ataam payou?”† *Mbanj 2:38, 10:47*

³⁷ Pilip ipamuul aliŋa tovene: “Ighaze yom ughur ila to Yesu Krisi toman lolom, tau tonene. Yom irau ughama ya!”

Ye ipamuul Pilip aliŋa ighaze: “Vee, you naghur ila naghaze Yesu Krisi, ye Maaron Natu.”

³⁸ Tovenen isaav pa ngeu to indaloov karis ighaze: “Ukis karis iyoon.” Ghoru yesuru Pilip tizi pa karis ve tizila ya, ve Pilip irughuuzaa. ³⁹ Sawa to tipul ya ve tiza muul, Maaron Avuvu indae Pilip, le daba tonenen ighita muul maau. Daba tonenen ipamundigin laghoon toni muul, ve ilaagh taghon ataam ila toman lolo poia kat. ⁴⁰ Ve Pilip ila ivot ndug Asdot, ve ilaghlaagh irau ndug tisob to taan

† **8:36:** Ngeu tonene, tipaal lambe wa. Muun, yes nditamoot to tighamghama uraat ila kinik ruum toni, nene tipaal lambedi. Leso timogheer pa kinik azuwa ma ndinatu liva eta sob. Buk Lo 23:1 isaav tovene: Nditamoot tovene irau tilup toman Maaron tamtothon toni pa sunuun maau. Eemoghon mos waaro tonene ighama ghiit taghilaal taghaze Maaron lolo pa yes nditamoot tovene paam. Ughita Isaia Is 56:3-7.

suruvu tonowen, ve ivovotia varu poia padi le ila
ivot ndug Sisarea. *Mbanj 21:8*

9

*Yesu ivot to Saul
(Mbanj 22:3-16, 26:9-18)*

¹⁻² Sawa tonenen, Saul ipariaan uraat toni to ghuruun patañani inarua yes to titaghon Yesu. Ye isasavia saveen matughezaan padi, ve izuarua tau ighaze le irab di timatmaat. Ighamgham tovene ila, ghoru mata ingal ighaze ye irau ila ndug Damaskus paam, ve ikaal nditamoot ve ndiliva to titaghon ataam to Yesu izi tonowe. Leso ikis di ve ikau nimadi, ve igham di tila Yerusalem, ve ipayoon di pa savsaveen. Tovenen ila ighita daba to watoonrau, ve ighasoni ighaze imbood le rau pida tinim paesiin pa uraat toni. Leso ipatoon di pa lupuun to yes Yuda to tineep izi Damaskus we.

³⁻⁴ Tovenen Saul imundig toman tamtoghon toni pida, ve tipul Yerusalem, ve tila pa Damaskus. Tilaghlaagh tila le tigharau Damaskus, ghoru nguruba tiina ineep sambam ve izi inim isul luvutin Saul. Tovenen itap izi taan, ghoru iloon ngeu eez aliña. Isaav pani ighaze: “Saul, Saul, pughu vena to unoknok ghuruun patañani payou?”

⁵ Saul ighasoni ighaze: “Tiina, yom sei?”

Ngeu tonowen ipamuul aliña ighaze: “You Yesu. You taug to unoknok ghuruun patañani payou ne. *1Kor 15:8*

⁶ Umundig ve uloon ula ndug tiina. Ghoru tisaav payom pa sa ngar to yom irau ughami.”

⁷ Yes to tilaagh toman Saul, tiyoon ve avodi ikaak. Pasa, tilonloon ngeu eez aliña, eemoghon tighita tamtoghon eta maau.

⁸ Ghoru Saul imundig iyoon, ve mata pakia. Eemoghon irau ighita ndug maau. Tovenen tikis nima, ve tighami tiloon tila pa ndug Damaskus.

⁹ Saul mata ipis irau mbon tol. Sawa tonenen, ye ighan aniiñ maau, ve ighun ya maau.

¹⁰ Ndug Damaskus, ngeu eez to itaghon Yesu inepneep. Iza Ananias. Tiina toit Yesu ivot toni ila tandagiñ ve ipoi ighaze: “Ananias!”

Ananias iyok pani ighaze: “Tiina, taug to nene.”

¹¹ Ghoru Tiina toit isaav pani ighaze: “Umundig uvot ula, ve utaghon ataam to tiwaata tighaze ‘Ataam Denja,’ ve uloon ula ruum to Yudas. Ghoru ughason pa ngeu eez to ndug Tarsus, iza Saul. Pasa, ye inepneep tonowe, ve isunñsun. ¹² Ye paam itandag, ve ighita ngeu eez, iza Ananias, iloon ila toni, ve ighur nima izala pogho. Leso mata poia, ve ighita ndug muul.”

¹³ Ananias ipamuul aliña ighaze: “Wai Tiina, ngeu tonowen, ival tiina tisavia varu ve naloona wa. Tamtoghon tiom patabuana to tineep Yerusalem we, ye ighamgham ngar samsamia naol padi.

Mban 8:3

¹⁴ Ve aazne, yes daba to watoonrau tiyok pani pa igham ngar raraate izi ndug tonene paam. Yei to nisunñsun ve niwatwaat yom izam, ye ighaze ikis ghei nisob, ve igham ghei nila.”

¹⁵ Eemoghon Tiina toit isaav pani muul ighaze: “Maau. Ula. Pasa, ngeu tonowen, you taug nasia inim leg wa. Ye pale inim uraata tiou ariana eez,

ve ivotia varug ila ndug ndug matadi. Yes to Yuda maau ne, ve yes kinik, ve yes Israela paam. *Mbanj 26:16+; Ga 1:15+; 1Tim 1:12*

¹⁶ You taug pale napatoona pa patanani naol to ye pale imbaad di pa you izag.” *Lu 21:12+; Mbanj 20:23; 2Kor 11:23+; 2Tim 2:9*

¹⁷ Tovenen Ananias imundig, ve ilaagh ila ivot ruum to Yudas, ve iloon ila. Ila peria to Saul, ghoru ighur nima izala Saul pogho, ve isaav pani ighaze: “Tazig Saul, Tiina toit Yesu to ivot tiom izi ataam luvuna, ye ighaze yom ughita ndug muul, ve Avuvu Patabuanj izeev ghom. Tauto imbaan ghou nanim.”

¹⁸ Ye isaav tovene, ve rikia moghon mbeb ini-male iigh anuvu to ipoon Saul mata, nene itap izi, ve ighita ndug muul. Ghoru imundig ve igham ya pataghaan. *Mbanj 2:38*

¹⁹ Igham ya le isob, ghoru ighan aniin ve tapiri ivot muul, ve ineep mbonj pida izi Damaskus toman yes to titaghon Yesu.

Saul ivotia Yesu varu izi ndug Damaskus

²⁰ Saul isaan maau. Rikia moghon ve ipa-mundigin uraat toni to votiaan Yesu varu. Ye ilonloon ila rumai to yes Yuda, ve ivovotia Yesu varu padi ighaze ye Maaron Natu. ²¹ Yes to tiloonja, tisob runjadi iza pa saveen toni ve avodi ikaak. Ve tisaav tighaze: “Wai, nowe ngeu to ireureu yes to tisunsunj ila Yesu iza izi Yerusalem. Vena to aazne itoor ngar toni muul? Iit taghaze pa ye inim pa ikis yes to ndug tonene to titaghon Yesu. Leso igham di tila Yerusalem, ve ipayoon di pa savsaveen ila

yes daba to watoonrau matadi. Eemoghon maau.”
Mbanj 9:2+; Ga 1:23

²² Maaron ipapalot Saul, tovenen uraat toni to votiaan mos ilandaad toman tapiri le tapiri kat. Ye igham yes Yuda to tineep Damaskus tikankaan: Pale tipamuul saveen toni vena? Pasa, saveen toni ipaghazonan Yesu ighaze onoon kat, ye Mesia.
Mbanj 5:42, 17:3, 18:5

Yes Yuda tighaze tirab Saul imaat

²³ Yes Yuda tineep le mala ris, ghoru tilup di ve timbua saveen tighaze tirab Saul imaat.

²⁴ Tovenen mbon ve ndag, tisanan izi ataam to didiin ariana to iluvut Damaskus tighaze tirab Saul imaat. Eemoghon tamtoghon pida tipaes pani pa ngar todi tonowen. ²⁵ Tovenen mbon eez, Saul ndita pida tighuri iloon ila nakaral eez lolo, ve tipalibi ila ilib pa didiin to iluvut ndug ne dige, ve titugi izila, ve ighau ila. *2Kor 11:32+*

Saul izala pa Yerusalem

²⁶ Saul ilaagh ila ivot Yerusalem, ve itoova pa ilup toman yes to titaghon Yesu. Eemoghon yes tisob timatughez pani. Pasa, tighur ila tighaze ye itoor ngar toni ve itaghon Yesu nenen sone. *Ga 1:17+*

²⁷ Eemoghon Banabas, ye inim Saul ita ite, ve ighami ila to yes mbanjoonja, ve ipaes padi ighaze: “Saul ighita Tiina toit wa. Ye ivot toni izi ataam luvuna ve isavsaav tomani. Ghoru Saul ila Damaskus, ve iyon ariana pa votiaan Yesu varu izi tonowe. Imatughez maau.” *Mbanj 4:36*

²⁸ Yes tiloon saveen tonene, le lolodi poia pa Saul, ve tighami a yesna tilup di. Sawa tonenen, Saul

ilaghlaagh taghon Yerusalem lolo, ve ivovotia Yesu varu. Ye imatughez maau. Iyoon ariana kat. ²⁹ Yesna yes Yuda to tisavsaav Grika alinadi, tiwazoran di pa savsaveen paam. Tovenen tilup di, ve timbua saveen tighaze tirabi imaat. ³⁰ Eemoghon tonvetaz pida to Krisi tiloon saveen todi, ve tinguaaz Saul izila pa ndug Sisarea. Ghoru tipaghaua iza waan, ve irav ila pa ndug toni Tarsus.

³¹ Tovenen lupuun to Krisi to tineep irau taan suruvu to Yudea, Galilaia, ve Samaria, tineep pooli. Patanani ivot padi muul maau. Ve Maaron iseen ngar todi pa ngar popoia pida, ve Avuvu Patabuan ipapalot di. Tauto tiroron pa Tiina toit, ve titaghon ataam toni, ve lupuun todi ivot inim tiina.

Petrus igharaat narape eez izi ndug Lidda

³² Petrus ilaghlaagh, ve ingigig lupuun to Krisi to tineep irau ndug ndug. Sawa eez, ye izila ingig Maaron tamtoghon toni patabuana pida to tineep izi ndug Lidda. ³³ Ila peria le ivot to narape eez to aghe imaat, iza Aineas. Ye irau ilaagh maau. Ighengheen moghon. Moroghoon toni tonowen ikisi irau ndaman liim ve tol wa. ³⁴ Petrus ighita, ve isaav pani ighaze: “Aineas, aazne Yesu Krisi igharaat ghom tinim poia. Umundig ve uput moogh tiom.” Isaav tovene, ve rikia moghon Aineas imundig.

Mbanj 3:6, 14:8+, 28:8+

³⁵ Tamtoghon to ndug Lidda ve ndug Saron tighita Aineas tini poia muul, le tisob titoor ngar todi ila pa Tiina toit Yesu, ve tighur ila toni.

Petrus ipamundigin Tapita izi ndug Yoppa

³⁶ Liva eez to itaghon Yesu, inepneep izi ndug Yoppa. Iza Tapita. (Tiwaat iza ila Grika alinadi

tighaze ‘Dorkas.’) Sawa isob, ye ighamgham ngar popoia, ve iuluul yes mbolaanja. *1Tim 2:10, 5:10; Tit 3:8*

³⁷ Sawa tonenen, ye imoroonj le imaat. Tovenen tigharaat paatu, ve tisuri izala ruum lolo sala.

³⁸ Ndug Lidda igharau Yoppa. Tovenen yes to ndug Yoppa to titaghon Yesu ne tiloonj Petrus varu tighaze ye inim ineep izi ndug Lidda, ve timbaanj tamtoghon ru tilaan tila toni. Yesuru tila tivot, ve titañ rorani tighaze: “Olman, umundig rikia, ve itinja tala! Pasa, patanja tiina eez to ivot payei.”

³⁹ Tovenen Petrus imundig ve yesja tila. Tila peria ndug Yoppa, ve tigham Petrus malmali izala ruum lolo sala to olman tidi paatu igheen pani. Yes ndinaara tisob to ndug tonowen tila tiyoon tigharau Petrus, ve titañtañ, ve tipatoonj nonoginja to muunj Dorkas isai di ve igham padi. ⁴⁰ Petrus isaav padi tisob tivot tila pumuri, ghoru iput aghe ve isunj. Isunj le isob, ghoru itoora mata ila pa olman tidi paatu, ve isaav pani ighaze: “Tapita, umundig!” *Mbanj 20:9+*

Rikia moghon ve olman tidi mata pakia le ighita Petrus, ve imundig mbole izi. ⁴¹ Petrus ikis nima, ve indaea imundig iyoon. Ghoru ipoi yes ndinaara toman Maaron tamtoghon toni patabuanja tinim, ve ipatoonj Tapita padi. Leso tiwatag tighaze ye imundig pa mateej ve mata iyaryaar. ⁴² Mbeb gharatoonja tonenen varu ilaan irau ndug Yoppa. Tovenen tamtoghon katindi titoor ngar todi ila pa Tiina toit Yesu ve tighur ila toni. ⁴³ Petrus ineep mala ris izi Yoppa. Ye ineep toman Simon to ngeu to gharatoonj mbeb pida pa ngai uli.

10

Anjela ivot to Konili ila tandagiin

¹ Daba eez inepneep izi ndug Sisarea, iza Konili. Ye ingin ndaaba to Rom irau tamoot liim (100) to tinim pa taan Itali. Tauto tiwaat ndaaba tonowen tighaze ‘Rouŋ to Itali.’ ² Konili, ye Yuda maau. Eemoghon yesŋa tamtoghon tisob to tineep tomani ila ruum toni, matadi ingalŋgal Maaron, ve yesŋa yes Yuda tiluplup di pa suŋuuŋ. Ye iuluul yes Yuda to mbolaan igham di ne, ve isuŋsuŋ pa Maaron irau sawa isob.

³ Sawa eez, rabrab izi, ndag anunu igham tol ma venen, ve Konili itandag. Ye ighita anjela eez to Maaron ivot ghazooŋa kat, ve inarua ila, ve ipoi ighaze: “Konili.”

⁴ Konili mata denja pani, ve matughezaan tiina kat ighami. Ghoru ighason anjela tonowen ighaze: “Tiina tiou, vena?”

Anjela ipamuul aliŋa ighaze: “Suŋuuŋ tiom toman ulaan popoia to ughamgham pa yes mbolaanŋa, nene Maaron ighita ve lolo poia pani ini-male watoonrau poia. *Pil 4:18; Hib 13:16; Syg*

8:4

⁵ Ulooŋ. Ngeu eez inepneep izi ndug Yoppa, iza Simon Petrus. Umbaan tamtoghon pida tila tighami inim. ⁶ Ye inep to Simon ite to ngeu to gharatoon mbeb pa ŋgai uli ne. Ruum toni iyon igharau naari.”

⁷ Anjela isavsaav tomani le isob, ghoru ipuli ve ila. Konili ipoi mbesooŋa toni ru to tighamgham uraat ila ruum toni lolo, ve ndaaba toni eez to sawa naol inepneep tomani ve ighamgham uraat pani. Ndaaba tonowen mata ingalŋgal Maaron.

⁸ Konili ipaes padi pa mbeb tisob to tivot pani ne le isob, ghero imbaan di tila pa ndug Yoppa.

Petrus ighita tandagiin
(Mban 11:5-14)

⁹ Mboŋ ndugizau ve ndag iza inim bobodaan ma venen, ghero ndiran tol tonowen tila tigharau ndug Yoppa. Sawa tonenen, Petrus izala ruum pogho ighaze isun. ¹⁰ Isunsun ila le iyamaan tau ighaze pitoola. Sawa to tighagharaat aniiŋ pani, ye isasaan ila le tandagiin eez ivot pani. ¹¹ Mata izala le ighita sambam ikaak, ve mbeb eez ini-male uli tiina. Uli tonowen, timbit mata paan pa ravraav, ve titugi izi inim pa taan. ¹² Ve mbeb naol naol tineep ila uli tonowen lolo: Nŋai, ve mbeb to tindandarab ila taan, ve man naol naol to tirovroov ila tata paronania ne paam. ¹³ Mala maau ve Petrus iloon saveen inim pani ighaze: “Petrus, umundig, urab di, ve ughan.”

¹⁴ Petrus ipamuul aliŋa ighaze: “Wai Tiina, irau naghan di maau. Pasa, mbeb tonowen tŋgalaan ila matam maau, ve tutuun iŋgalsek pa ghaniin di. To muun ve inim, avog itut mbeb eta tovene maau.”

Wkp 11:1+

¹⁵ Ghero saveen inim pani muul ighaze: “Mbeb to Maaron ighami iŋgalaan wa, yom ughaze samia malep.”

Mk 7:14+; Ro 14:14+,20; 1Tim 4:3+

¹⁶ Mbeb tonenen ivot pae tol le isob, ghero rikia moghon ve tiyou mbeb tonowen imuul izala pa sambam.

¹⁷ Sawa to Petrus ighita tandagiin tonenen, ndiran tol to Konili imbaan di, tila tivot ndug Yoppa, ve tighason pa Simon ruum toni. Petrus

ighamgham ngar pa tandagiin tonenen pughu, ve ndiran tol tonenen tila tiyoon izi ruum nagho, ¹⁸ ve tighason pani toman aliñadi tiina tighaze: “Ou, Simon to iza ite Petrus, ye ineep to sualen, ma maau?”

¹⁹ Petrus ighamgham ngar pa tandagiin tonenen pughu sone, ve Maaron Avuvu isaav pani ighaze: “Simon, uloon. Ndiran tol tiyondyood pumuri we. Tighaze tighita ghom. ²⁰ Umundig uzila todi, ve yamña ala. Ugham ngar naol malep. Pasa, you taug to nambaaj di tinim.”

²¹ Tovenen Petrus izila todi, ve isaav padi ighaze: “You taug tonene. Anim akaal ghou pasa? Lemim savsaveej payou?”

²² Yes tipamuul aliña tighaze: “Daba tiei Konili to ingin ndaaba tamoot liim (100), ye imbaaj ghei payom, to ninim. Ye ngeu denja eez, ve iroron pa Maaron ve itaghon ngar toni. Tovenen Yuda tisob tipaiti. Noor moghon, tandagiin eez ivot pani. Ye ighita anela patabuan eez ivot toni, ve isaav pani ighaze ye irau imbaaj payom ula ruum toni. Leso igham saveej pida ila yom avom.” ²³ Petrus iloon saveej tonene, ve igham loomba tonenen tiloon tila ruum, ve yesja tineep pa mbonj.

Petrus ila ighita Konili

Ndugizau, ghoru Petrus yesja ndiran tol tonenen timundig ve tila. Tamtoghon pida to Krisi to tineep izi ndug Yoppa tila toman di paam. ²⁴ Tilaagh tila le tigheen izi ataam luvuña. Mbonjmaagh, ghoru tila tivot ndug Sisarea. Konili iyou sinj toni toman ndita pida tinim tilup di izi ruum toni, ve tisaanjan di. ²⁵ Sawa to Petrus ighaze iloon

ila pa ruum, Konili ilaagh narua ila, ve iput aghe izi Petrus aghe pughu ve ipakuri. ²⁶ Eemoghon Petrus ingalsekini ighaze: “Wai, ugham venen malep! Umundig uyoon! You tamtoghon to taan nanimale yom.” Ve indaea imundig. *Mbanj 14:15*

²⁷⁻²⁸ Ghoru yesuru tisavsaav, ve tiloon tila pa ruum lolo. Petrus ighita ival tiina to tilup di ve tinepneep, ve isaav padi ighaze: “Yam awatag. Yei Yuda, lemai tutuun ariana to ingalsekin ghei ighaze: Yes to Yuda maau ne, irau nila todi, ma nilup toman di ne maau. Yei irau nineep saganu padi. Eemoghon Maaron ipaghazonan ngar tiou, ve aazne naghilaal wa. Irau naghaze tamtoghon eta isami ila Maaron mata ne maau. *Mbanj 15:8+; Ep 2:11+*

²⁹ Tauto mbanjoon tiam inim, ve nayasiil pani maau. You namundig nanim. Yo, naghaze naghason gham. Pughu vena to ambaan payou?”

³⁰ Ghoru Konili ana isaav ighaze: “Wariiz, ndag anunu igham tol ma venen inimale aazne, ve you nasuusun izi ruum tiou. Mala maau ve naghita ngeu eez ivot. Nonogiina toni milmilia kat. Ye inim iyoon ila matag, ve isaav payou ighaze:

³¹ ‘Konili, sunuun tiom, Maaron iloonja wa. Ve ulaan to ughamgham pa yes mbolaana ne, ye mata ingalngali. *Hib 6:10*

³² Tovenen umbaan tamtoghon pida tila pa ndug Yoppa, ve tigham Simon to iza ite Petrus inim. Ye inepneep toman Simon ite to ngeu to gharatoon mbeb pa ngai uli ne. Ruum toni iyoon igharau naari.’

³³ Anjela isaav payou tovene, tauto rikia moghon ve nambaan uraata tiou tol tilat payom. Poia kat

pa uloon aliñag ve unum. Yei nisob ninim nilup ghei izi sualen ila Maaron mata nighaze niloon saveen isob to Ngeu Tiina isavia payom. Yo, uvotia payei ve niloonja.”

Maaron ikaak ataam pa yes to Yuda maau

³⁴ Petrus ipamundigin saveen toni ighaze: “Aa, ghara ngar tiou ighazoon. Onoon kat. Maaron ivool to tamtoghon eta maau. Ye igham ngar raraate pa tamtoghon tisob. *Ro 2:10+*

³⁵ Ye ighur lolo pa tamtoghon to ndug tisob. Tovenen sei to ighaze iroron pani ve itaghon ngar to denja ila mata, nene pale Maaron lolo poia pani. *Ep 3:6; Kol 3:11*

³⁶ Onoon, varu poia to isavia ataam to itiña Maaron talup ghiit tanim ee moghon ve luuma toni iza toit, nene Maaron ighuri inim to yei Israela muun. Ataam tonowen, nene uraat to Yesu Krisi. Ye Tiina to iit tasob. *Ro 10:12; Ep 2:14; Kol 1:20*

³⁷⁻³⁸ “Uraat tiina to ivot irau taan isob to yei Israela, yam avaat aloon varu rita wa. Sawa to Yoan ngeu rughuzaanja ivovotia saveen pa tamtoghon ighaze tigham ya, Yesu to Nasaret ipamundigin uraat toni izi Galilaia. Ye, Maaron in-eep tomani. Ye ighuri pa uraat toni, ve izeeva pa Avuvu Patabuan, ve igham le tapiri tiina. Tauto Yesu ilaagh irau ndug naol, ve igham uraat popoia, ve igharaat tamtoghon tisob to Ngeu Samia iwaghamun di. *Is 61:1*

³⁹ “Uraat naol to ye igham di izi taan suruvu to Yudea ve Yerusalem, yei mbanjoonja nighita katin di pa matamai. Tauto nivovotia saveen toni pa

tamtoghon, leso nipariaan di pa tighur ila toni. Uraat toni tonowen, tauto inim pughu pa tamtooghon atedi yabyab pani, ve tirabi izala ai pambaroon ve imaat. *Mbanj 2:32,*

5:30

⁴⁰ Eemoghon mbonji inim tol, ve Maaron ipamundigini pa mateen, ve ipatoon tau ivot ighazoon ila tamtooghon pida matadi. ⁴¹ Sawa to imundig pa mateen, ye ila ivot to ival maau. Yei moghon, to ivot tiei ve nighita. Ve yeiņa nilup ghei pa ghanghaniin. Pasa, Maaron isia ghei pataghaan pa nighita uraat toni ve nipariaan saveen toni. *Lu 24:36+*

⁴² Ve ighur uraat payei ighaze nivotia saveen pa tamtooghon tovene: Ye ighur Yesu pa ingabiiz tamtooghon tisob, ve ighur atia padi. Yes to matadi iyaryaar, ve yes mateenja paam. *Mbanj 17:31; Ro 14:9+; 2Kor 5:10*

⁴³ Propeta tisob tipariaan saveen toni tighaze tamtooghon tisob to tighur ila toni, ila ye iza, Maaron pale ireu sosor todi ilale.” *Is 53:5; Ro 10:9; 1Yo 2:2,12*

Yes to Yuda maau ne tigham Avuvu Patabuan

⁴⁴ Petrus ivovotia Maaron aliņa padi sone, ve Avuvu Patabuan izi inim ve izeev tamtooghon tisob to tilonloon saveen. ⁴⁵⁻⁴⁶ Yuda pida to tighur ila to Krisi, yesņa Petrus tinim. Tilonon ndiran tonowen tisavsaav ila ndug ndug aliņadi ve tipapait Maaron iza, le tisob runjadi iza ve avodi ikaak. Pasa, Maaron irei Avuvu Patabuan pa yes to Yuda maau ne. *Mk 16:17; Mbanj 2:4; Ga 3:14*

⁴⁷ Ghoru Petrus imundig ve isaav ighaze: “Sei irau ingalsekin ndiran tonene pa ghamuun ya?

Maau. Pasa, yes tigham Avuvu Patabuan wa raraate inimale iit.” *Mbanj 15:8+*

⁴⁸ Tovenen Petrus isaav ariana padi ighaze yes irau tigham ya ila Yesu Krisi iza. Tigham ya le isob, ghoru tɔnguruut Petrus, ve yesna tineep ris tonowe.

11

Petrus imuul izala Yerusalem ve ipaesia laghoon toni

¹ Mbanjoonja pida toman yes toɔvetaz to Krisi to tineep irau taan suruvu to Yudea, tiloon tighaze yes to Yuda maau ne tiloon Maaron saveen toni ve tighur ila wa. ² Tovenen sawa to Petrus imuul izala Yerusalem, yes to tiyoon ariana pa tutuun to Mose ve ngar to ziroon tamtohon, tiyou avodi pani tighaze: ³ “Petrus, niloon tighaze yom ula uneeɔ toman yes to Yuda maau ne, ve yamna alup gham pa ghanghaniin. Ugham venen pasa?”

⁴ Tovenen Petrus ipaes padi pool pa mbeb naol to tivot pani ne ighaze: ⁵ “Aloon. You naneep izi ndug Yoppa ve nasunɔun, ve tandagiiɔ eez ivot payou. Matag izala le naghita mbeb inimale uli tiina eez. Uli tonowen, timbit mata paan, ve titugi to sambam we ve izi inim. Izi izi le denja ila naghog. ⁶ Nangig iloon ila uli tonenen lolo, ve naghita mbeb naol naol. Ngai mata mata, ve mbeb pida to tindandarab ila taan, ve man to tirovroov ila tata paronania ne paam. ⁷ Ghoru naloon saveen inim payou ighaze: ‘Petrus, umundig, urab di, ve ughan.’

⁸ “You napamuul aliɔa naghaze: ‘Wai Tiina, irau naghan di maau. Pasa, mbeb pida tonowen

tingalaan ila matam maau, ve tutuun ingalsek pa ghaniin di. To muun ve inim, avog itut mbeb eta tovene maau.’ *Wkp 11:1+*

⁹ “Ghoro saveen ineep sambam ve izi inim payou muul ighaze: ‘Mbeb to Maaron ighami ingalaan wa, yom ughaze samia malep.’ *Mk 7:14+; Ro 14:14+,20*

¹⁰ Mbeb tonenen ivot payou irau pae tol le isob, ghoru tiyou mbeb tisob tonenen timuul tizala pa sambam.

¹¹ “Sawa tonenen kat, tamtoohon tol to ndug Sisarea to timbaan di payou, yes tinim tiyoon izi ruum to nanepneep pani ne nagho. ¹² Avuvu Patabuan isaav payou ighaze naghama ngar naol malep, ve nala toman di ve yeina nila. Tovenen yeina tonvetaz liim ve eez tonene, nimundig ve nila. Nilaagh nila nivot ndug Sisarea, ve malmal-imai niloon nila Konili ruum toni. ¹³ Ghoro ye ipaes payei ighaze ye ighita anela eez ivot ve iyon ila ruum toni lolo, ve isaav pani ighaze: ‘Umbaran tamtoohon pida tila pa ndug Yoppa, ve tigham Simon to iza ite Petrus inim. ¹⁴ Ye pale isavia lem savaaveen pida to pale inim ataam payom pa Maaron igham mulin ghom ve uneep pooli. Ve yom moghon maau. Tamtoohon tisob to tineep toman ghom ila ruum tiom ne paam, Maaron pale igham mulin di.’

¹⁵ “Ye ipaesia mbeb tonenen payou le isob, ghoru anag napamundigin saveen tiou. Mala maau ve Avuvu Patabuan izi inim, ve izeev di raraate inimale papazogi igham pait ila sawa to Pentekos. ¹⁶ Ghoro matag ingal imuul ila pa Tiina toit aliina to ighaze: ‘Yoan irughuuz tamtoohon pa

ya moghon. Eemoghon yam tonene, Maaron pale igham Avuvu Patabuanj payam.’ *Mt 3:11; Mbanj 1:5*

¹⁷ Aghita. Sawa to iit taghur ila to Tiina toit Yesu Krisi, Maaron irei Avuvu Patabuanj pait. Ve aazne, ye itaghon ngar raraate pa ndiran tonowen. Mbeb tonene inim pa Maaron tau. Tovenen you sei, to irau napoon Maaron uraat toni?” *Mbanj 10:47, 15:8+*

¹⁸ Tiloonj saveenj tonene, ghoru atedi izi, ve ledi saveenj muul maau. Ve tipait Maaron iza tighaze: “Onoon kat, aazne, Maaron ighaze igham poian yes to Yuda maau ne paam. Tauto ipamundigin di ve titoor ngar todi ila pani. Leso tigham nepoon poia ila toni.” *Ro 10:12+, 15:9*

Ataam to lupuunj to Krisi ivot inim tiina izi ndug Antiok

¹⁹ Sawa to tirab Stepanus imaat, tighur tighur patañani pa tamtoghon naol to titaghon ataam to Krisi. Tauto tiwaghaughau irau ndug ndug. Pida tila pa taan suruvu to Ponisia, pida tivot tila mutu Saiprus, ve pida tila ndug Antiok. Sawa to tilaghaagh, yes tivovotia Maaron aliña. Eemoghon tivotia pa tamtoghon tisob maau. Tinjarua yes Yuda moghon. *Mbanj 8:1,4*

²⁰ Eemoghon tamtoghon todi pida to mutu Saiprus ve taan suruvu to Sairini, yes tila tivot ndug tiina Antiok, ve tivotia Tiina toit Yesu Krisi varu pa yes Grika to tineep tonowe. ²¹ Ve Maaron tapiri inepneep toman di. Tovenen ival tiina to ndug Antiok titoor ngar todi ila pa Tiina toit, ve tighur ila toni. *Mbanj 13:1+, 14:26+*

²² Varudi ilaan ila ivot Yerusalem, ve lupuun to Krisi tiloona. Tauto timbaan Banabas ila ndug Antiok, leso ighita di. ²³ Ila ivot todi, ve ighita poia to Maaron ineep toman di, le ighami lolo poia kat. Ve ipalot di ighaze lolodi ikis Tiina toit tunja itaghoni taghoni gha ila. ²⁴ Banabas, ye ngeu poia. Ngar to Avuvu Patabuan ivon ila lolo, ve ghurla toni iyaryaan kat. Sawa tonenen, ival tiina kat titoor ngar todi ila pa Tiina toit Krisi ve tinim le.

²⁵ Tovenen Banabas ila ndug Tarsus pa ikaal Saul. Ila ivot toni, ghoru ighami ve yesuru timuul tila pa Antiok.

Mban 9:27

²⁶ Ndaman dodoli eez Banabas yesuru Saul tineep toman lupuun to Krisi izi tonowe, ve tipatoot ival tiina pa Krisi saveen toni. Yes Antioka to titaghon Krisi, tauto tamtoghon tipoi di tighaze 'Kristen' muun.

1Pe 4:16

²⁷ Sawa tonenen, propet pida tineep Yerusalem, ve tizila pa Antiok. ²⁸ Tamtoghon todi eez, iza Agabus. Maaron Avuvu ipamundigini ve ivotia Maaron alina padi ighaze pitoon tiina pale ivot irau taan isob. (Pitoon tonowen ivot indeen sawa to Klodias inim kinik tiina to Rom ve injin ndug.)

Mban 21:10

²⁹ Yes to titaghon Yesu tiloon saveen tonenen, ve timbua saveen tighaze tisaangoor ulaan pida ila to yes tonjetaz to Krisi to tineep izi Yudea we. Tighita sa mbep to irau tigham padi, nene tighuri ila moghon.

Ro 15:26; 1Kor 16:1; Ga 2:10

³⁰ Tilup mbep le isob, ghoru tighuri ila to Banabas yesuru Saul, ve tighami tila, ve tighuri ila to yes nginiina to tineep izi Yerusalem.

Mban 12:25

12

Kinik Erod irab Yakobus imaat, ve ighur Petrus iloonj ila ruum to yabyabuunj

¹ Sawa tonenen, kinik Erod imundig, ve ikis tamtoghon pida to tineep iloonj ila lupuunj to Krisi, leso ighur yabyabuunj padi. ² Ve isaav ve tigham Yakobus to Yoan togha, ve timbut motin lua pa buza ve imaat. *Mt 4:21, 20:22+*

³ Ye ighita ngar to ighami, nene igham yes Yuda lolodi poia. Tovenen ikis Petrus paam. Mbeb tonenen ivot pa sawa to lupuunj tiina to ghaniinj mberet to le yis maau. ⁴ Tovenen Erod ikis Petrus, ve ighuri iloonj ila ruum to yabyabuunj. Ve ighuri ila ndaaba saangul liim ve eez (16) nimadi pa tingini. Ndaaba tonowen tivalag di tinim rouñ paan, ve rouñ paan tonowen tirabol pa uraat to nginiinj Petrus. Tamtoghon paanj tineep ila rouñ enjaenja. Erod mata ingal ighaze sawa to lupuunj tiina to Pasova isob, ghoru igham Petrus, ve ipayoonda pa savsaveenj ila ival tiina matadi. ⁵ Tovenen tikis Petrus ineep ila ruum to yabyabuunj lolo. Eemoghon lupuunj to Krisi tisuñsuñ ariana tighaze Maaron iuuli. *Ro 15:30+; Ep 6:18*

Anjela inguaaz Petrus ivot pa ruum to yabyabuunj

⁶ Tinepneep le mbonj eez, Petrus ighengheen ila ndaaba ru sosodi. Ye, tikau pa sen ru. Ve ndaaba pida tiyondyood ila ataam avo, ve tinginngin ruum to yabyabuunj. Erod mata ingal ighaze mbonj tonenen le ndugizau, ghoru igham Petrus ivot pa ruum to yabyabuunj, ve ipayoonda pa savsaveenj.

⁷ Mala maau ve anjela to Maaron ivot le nguruba isul iloonj ila ruum to yabyabuunj lolo. Anjela ivaan

Petrus, ve isaav pani ighaze: “Ai, umundig rikia!” Ye isavsaav, ve sen to tikau Petrus nima pani, timazug tizi.

⁸ Anjela isaav pani muul ighaze: “Ugharaat ghom pa laghoon, ve ughur duduuna to aghem.” Petrus igharaat tau le isob, ghoru anjela isaav pani muul ighaze: “Utatab ghom pa nonogiina tiom to monjanan, ve utaghon ghou.” ⁹ Tovenen Petrus itaghooni ve yesuru tila. Eemoghon igham ngar ighaze mbef to anjela igham pani, nene ivot pani onoon maau. Ighaze pa ighita tandagiin moghon. ¹⁰ Yesuru tila tivot to ndaaba to rouj eez, ve tilaagh digedi tila tivot to rouj ite. Tilaagh digedi paam tila, ghoru tila tivot ataam ariana to ineep potla. Tilaagh narua tila, ve ataam tau ikaak sorok, ve yesuru malmalidi tivot tila. Tipul ruum to yabyabuun, ve titaghon ataam tila ris, ghoru anjela ipuli ve ila. *Mbo 34:7; Mban 5:19, 16:25+*

¹¹ Ghoru Petrus ngar toni ivot, ve isaav pa tau ighaze: “Ghara naghilaal! Maaron imbaan anjela toni inim pa inguaaz ghou ila Erod nima, ve ngar samsamia naol to yes Yuda tighaze tigham payou.”

¹² Petrus ighilaal mbef tonenen, ve malmali ila pa ruum to Maria, to Yoan Markus tina. Ruum tonowen, yes ival tila tilup di ila lolo, ve tisuusun. ¹³ Petrus ila ipit ataam, ve liva mbesoona eez, iza Roda, ila ighaze ikaak ataam. ¹⁴ Eemoghon sawa to ighilaal Petrus aliina, ye lolo poia le poia kat. Tovenen lolo imaagh pa kakoon ataam, ve ilaan muul iloon ila, ve ipaes pa ival tiina ighaze: “Ale, Petrus tau to iyondyood ila ataam avo we!”

15 Yes tipamuul aliŋa tighaze: “Wai, ŋgar tiom iwaghamgham!”

Eemoghon ye avo iyaryaan ighaze: “Maau, ye tau to iyondyood pumuri we.”

Tovenen yes tisaav pani tighaze: “Nowe avaat aŋela toni.”

16 Petrus iyondyood pumuri, ve inoknok pitiin ataam. Tovenen tila tikaak ataam, ve tighita le ruŋadi iza. 17 Eemoghon ye itatan nima padi, leso neneenadi. Ghoru ipaes padi pa ataam to Tiina toit Yesu iŋguaaza ivot pa ruum to yabyabuun. Ipaes padi le isob, ghoru isaav padi ighaze tila tipaes pa Yakobus*

ve tonvetaz pida to Kriŋi pa mbeb to ivot pani. Ghoru ipul di tineep, ve ila pa ndug ite.

18 Mboŋ tonenen le ndugizau, ve yes ndaaba ruŋadi iza ve tigham ŋgar naol pa ghaon to Petrus.

19 Erod iloon paesiin tighaze Petrus ineep ruum to yabyabuun lolo muul maau. Tovenen isaav pa ndaaba toni ighaze tila tikaala. Eemoghon tikaala le maau. Tovenen Erod ighason roran yes to tiŋgin Petrus. Ighason di le maau, ghoru isaav ve tigham di tila, ve tirab di timatmaat.

Muri ghoru, Erod imundig, ipul taan suruvu to Yudea, ve izila ndug Sisarea, ve ineep ris tonowe.

Maaron irab Erod imaat

* **12:17:** Yakobus tonene, ye Yesu tazi kat. Ye to imbood Rau to Yakobus (o Jems) to ineep ila Baibol lolo ne.

²⁰ Sawa tonenen, Erod[†] ate yabyab kat pa ndug tintina ru, Tiro ve Sidon. Ndug ru tonowen, sawa naol tighamgham aniin ila ndug to Erod. Tovenen tilup di, ve timbaan tamtoghon todi pida tila to Erod, leso tigharaat saveen pani. Tila tivot, ve malmalidi tila to Blastus to injin kinik ruum toni, ve tigham lolo, leso iuul di pa savsaveen. Ghoru tila to Erod tau, ve yesa tigharaat saveen, leso tilup di muul. Tisavsav tomani le isob, ghoru ye ighur sawa padi pa timuul tinim, ve isavia lolo padi.

²¹ Tisaan le sawa tonenen ivot, ghoru timuul tila to Erod. Ye indudi pa nonogiina toni to kinik, ve mbole izala watin to gharatoon saveen, ve ipamundigin saveen toni. ²² Yes to tiloon saveen toni, timboboob tighaze: “Tamtoghon eta to taan aliina tovene maau. Nowe avaat maaron eta!” ²³ Tipapait Erod tovene ila ila le anjela to Maaron irabi itap izi. Pasa, inimale Erod isaav padi pa tipait Maaron iza, tone poia. Eemoghon maau. Ye iyok pa paitoon todi tonowen. Tauto moroghoon tiina ighami, ve motmoot tighan lolo ve imaat.

²⁴ Sawa tonenen, Maaron saveen toni ilandaad

[†] **12:20:** Saveen to Maaron isavia tamtoghon naol to izadi Erod. Sawa to Maria ipoop Yesu, Erod to inim mata, injin yes Israela. Tiwaat iza tighaze ‘Erod To Ye Iza Tiina.’ Ye to irab ndipain to Betelem timatmaat. Erod tonene, to natu iza Erod Antipas. Ye to irab Yoan ngeu rughuzaana imaat, ve ilup toman Kaiapas ve Pontius Piladus, ve tirab Yesu imaat. Ngat tonene isavia Erod Antipas natu Erod Agripa. Ye to irab Yakobus imaat, ve muri motmoot tighani. Erod Agripa natu, iza Erod Agripa to inim ru pani. Ye to muri tipayoon Paulus pa savsaveen ila mata. Kamos toni ineep ila Mbanjoona 25:13 ila imuul 26:32.

toman tapiri tiina irau ndug ndug. *Mbanj 6:7, 19:20; Kol 1:6*

²⁵ Banabas yesuru Saul tighur sanjoor to yes Antioka ila yes Yerusalema nimadi le isob, ghoru tigham Yoan Markus ve yesja timuul tila pa Antiok. *Mbanj 11:29+,*

12:12

Laghoon to Paulus ighami muun

13

Lupuuñ to Antiok tighur Banabas yesuru Saul pa uraat

¹ Yes Antioka to titaghon Kriisi, propet pida toman patoñaan pida tineep iloon ila lupuuñ todi. Izadi tovene: Banabas, Simeon to tiwaata tighaze ‘Asosoonja,’ Lusius to Sairini, Manaen (ye yesuru Erod to igham pooz pa ndug ne tubuun todi ee moghon), ve Saul. ² Sawa eez, tingun taudi pa ghaniin aniiñ itaghon sunjuun ngara. Tisunjun ila le Avuvu Patabuan isaav padi ighaze: “Aghur Banabas yesuru Saul tivot, leso tigham uraat to napoi di pani ne.” *Mbanj 9:15; Ro 10:15; Ep 3:7+; 1Tim 2:7*

³ Tovenen tingun taudi pa ghaniin aniiñ ve tisun, ve tighur nimadi izala yesuru poghodi ve tipalot di, ghoru tighur di tila. *Mbanj 6:6, 14:26*

Saul yesuru Banabas tivotia varu poia izi mutu Saiprus

⁴ Nenen ataam to Avuvu Patabuan ighur Banabas ve Saul pa uraat. Yesuru tila tivot ndug Selusia, ve tigham waan tonowe, ve tiraav tila pa mutu Saiprus. ⁵ Tiloon izi ndug Salamis, ve tivotia

Maaron aliņa pa yes Yuda ila rumai todi lolodi. Yoan Markus ila toman di paam, leso iuul di.

⁶ Tilaagh taan tila tivot mutu dige ite, ve tila peria ndug tiina Papos, le tivot to mur taamdi eez tonowe, iza Bar-Yesu. Ye Yuda taamdi, ve ye propet kaarom eez. *Mban 8:9+*

⁷ Sawa naol, ye inepneep toman Sergius Paulus to inġin mutu tonowen. Sergius Paulus, ye ngeu ngara eez, ve ighaze le iloon Maaron aliņa. Tovenen imbaan ila pa Banabas yesuru Saul ighaze tinim toni. ⁸ Bar-Yesu iza ite Elimas. Pisis tonene, pughu tovene: ‘mur taamdi.’ Ye itovtoova pa itatan yesuru saveen todi, ve ileleel saveen pa Sergius Paulus, leso ighur ila to Kriši sob. ⁹ Eemoghon Avuvu Patabuan izeev Saul, to tiwaat iza ite Paulus, ve mata denja pa mur taamdi tonowen, ¹⁰ ve isaav ariana pani ighaze: “Ai, yom tonene, ngeu samia eez! Ngeu Samia natu yom! Yom ughurghur koi pa ngar denja to naol ne, ve lolom ivon pa ngar samsamia ve ngar kaarom naol! Neez o upul ngar tiom to ughamun tamtoġhon ngar todi ve upapaghau di pa ataam denja to Maaron? *Yo 8:44; 1Yo 3:8*

¹¹ Aazne, yom pale ughita katin Maaron nima. Ye pale igham matam ipis, ve irau ughita ndug muul maau. Ve pale uneep tovene mala ris!” Paulus isaav tovene, ve rikia moghon mbeg imale ghavurvuraan toman ndoroom ikau mur taamdi tonenen mata. Tovenen iwalaghlaagh ve ikaal tamtoġhon pida pa tiuuli, ighaze tikis nima ve tipatoġn ataam pani. ¹² Daba to mutu tonowen ighita mbeg gharatoonja to ivot ne, le avo ikaak, ve ighilaal ighaze saveen to Tiina toit le tapiri tiina.

Tovenen ighur ila kat.

*Paulus yesuru Banabas tila ndug Antiok to ineep
ila taan suruvu to Pisidia*

¹³ Paulus toman ndita tigham waan izi ndug Papos, ve tiraav tivool tila pa taan tiina. Ghoru tilaagh tila tivot ndug Perga to ineep ila taan suruvu to Pampilia. Tineep tonowe, ve Yoan Markus ipul di, ve ighau imuul ila pa Yerusalem. *Mbanj 13:5, 15:37+*

¹⁴ Paulus yesuru Banabas tipul ndug Perga, ve tizala pa ndug Antiok to ineep ila taan suruvu to Pisidia. Tinepneep tonowe le sawa to umbom patabuan, ghoru tiloon tila rumai to yes Yuda, ve mboledi izi toman di pa sunuun. ¹⁵ Tamtoghon pida to lupuun tonowen tiwaat saveen pida to ineep ila tutuun to Mose, ve saveen pida to yes propeta le isob, ghoru yes nginiina to lupuun tonenen tighason ila pa Paulus yesuru Banabas tighaze: “Yo, yam tonvetaz ru, ighaze lemim savaaveen pida pa apalot lupuun tonene, ghoru asaav.” *Lu 4:16+*

Mos to Paulus ivotia izi ndug Antiok

¹⁶ Paulus imundig iyoon, ve itatan nima padi, leso neneenadi ve tighur talinadi pani. Ghoru ipamundigin saveen toni ighaze: “Yam nditamoot to Israel, ve yam pida to aroron pa Maaron ve ataghon ngar toni ne, aghur talinamim payou pooli. ¹⁷ Iit Israela, muun Maaron toit isia nditimbuud tinim ye tau le. Ve sawa to tila tineep tinim loomba izi Isip, ye igham di timasa tinim naol. Ghoru ipatoon tapiri pa yes Isipa, ve ighereb nditimbuud tipul taan to yes Isipa ve tivot. *Igham 6:6+, 12:51*

¹⁸ Yes tineep izi ndug balim irau ndaman tamoot ru (40), ve sawa naol tizoroor Maaron aliņa ve tighamgham ngar to irau ye lolo maau. Eemoghon ye itatan tau, ve iņgin di pa laghoonj todi. *Nam 14:33+; Mbo 95:10*

¹⁹ Yes tilaagh tila tivot taan suruvu to Kanaan, ghoru ye ireu tamtoghon to ndug tintina liim ve ru, ve igham taan todi inim yes Israela ledi. *Lo 7:1; Mbo 78:55*

²⁰ Uraat isob tonenen igham ndaman 450.

“Muri ghoru, Maaron ighur ledi daba pida. Leso tiņgin di ve tigharaat saveeņ todi. Inim inim le indeeņ sawa to propet Samuel, ²¹ ghoru tighason Maaron pa igham ledi kinik eta. Tovenen ye ighur Kis natu Saul inim kinik padi. Saul pughu toni ivot ila to Benyamin. Ye iņgin Israel irau ndaman tamoot ru (40). *1Sam 8:4+, 10:17+*

²² Muri ghoru, Maaron izugua izi, ve ighur David ana inim kinik. Maaron ipaesia David ngar toni ighaze:

‘David to Yesi natu, you naghita wa. Yeru lolomai ee moghon. Ye pale itaghon katin ngar tiou pa mbeb tisob.’ *1Sam 13:14*

²³ “Aazne, Maaron ighur ngeu eez inim Volaana pa yes Israela itaghon saveeņ mbuaaņ toni. Iza Yesu, ve ivot ila siņ to David. *Mbo 132:11; Lu 1:32*

²⁴ Yesu ipamundigin uraat toni sone, ve Yoan ngeu rughuzaana imuunj pani, ve ivovotia saveeņ pa yes Israela ighaze tisob tipul ngar todi samsami-adi, ve titoor ngar todi ila pa Maaron, ve tigham ya. *Lu 3:3*

²⁵ Sawa igharau pa Yoan ipasob uraat toni, ghoru ighason tamtoghon ighaze: ‘Yam agham ngar ag-

haze you sei? Aghaze you Mesia to asasanjani ne? Maau. Ngeu eez pale inim muri payou. Ye ilib payou kat. Uraat sorok inimale polaan waar pa duduunja to aghe, nene you poiag irau to naghama pani maau.’ ” *Lu 3:16*

²⁶ Ghoro Paulus isaav padi ighaze: “Yam tonvetaz, yam to Abaram papaghu toni, ve yam pida to aroron pa Maaron ve ataghon ngar toni ne paam, aloonj. Maaron aliija to isavia ataam to ye igham mulin tamtoghon, nene injarua ghiit. *Lu 24:47; Mbanj 2:39, 3:26*

²⁷⁻²⁸ Eemoghon ival tiina to Yerusalem toman yes daba todi tighilaal Yesu maau. Onoon, umbom patabuanj to naol ne, yes tiwatwaat saveenj to yes propeta. Eemoghon tighilaal saveenj tonowen pughu maau. Yesu igham sosor eta irau to imaata pani ne maau. Eemoghon sawa to yes daba titiir saveenj toni, tighita tighaze ye igham sosor tiina, ve tighason Piladus pa irabi imaata. Ngar to tighami, nene denja pa Maaron aliija to muunj yes propeta tivotia. Saveenj todi tonowen, aazne anonja ivot wa. *Mt 27:20+; Lu 23:18+; Mbanj 3:14+*

²⁹ Saveenj to yes propeta timbooda iza to Yesu, nene yes Yuda titaghon suvuni le isob, ghorotamtoghon pida tighami izi pa ai pambaroonj. Yes tigham paatu tila, ve tighuri iloonj ila yaam saambu to tigharaata pataghaanj inim naal pa mateenja. *Lu 23:50+, 24:44; Yo 19:36+*

³⁰⁻³¹ Eemoghon Maaron ipamundigini pa mateenj,

ve ineep sawa mala ris izi taan.*

Sawa tonenen, ye ila ivotvot to yes to muun yesna tilaagh izi Galilaia ve tila tivot izi Yerusalem. Ndiran tonowen, tauto aazne tivovotia saveen toni pa ival tiina to iit Israela, ve tipariaan di pa tighur ila toni. *Mt 28:6; Mbanj 1:3*

³²⁻³³ “Yei ninim pa nivotia varu poia tonene payam: Maaron ipamundigin Yesu pa mateen wa. Tovenen saveen to muun ye imbua toman nditimbuud, tauto aazne anona ivot pa iit to papaghu todi ne! Saveena ineep ila mboun to sunuun to inim ru. Ighaze:

‘You natug yom.

Yom tamam to you.

Aazne, you naghur ghom pa uraat.’† *Mbo 2:7;*

Mt 3:17; Hib 5:5

³⁴ “Tovenen Yesu, Maaron ipamundigini pa mateen wa. Ve ye irau imuul izila naal ve imbuuz ne maau. Saveena ineep tovene:

‘You nambua saveen ariana toman gham naghaze you pale naghham lemim mbeb popoia ve patabuana inimale muun naghham pa David.’ *2Sam 7:8-16; Is 55:3*

³⁵ Ve saveen waaro ite isaav ighaze:

‘Yom irau upul mbesoona tiom patabuan imbuuz ila naal lolo ne maau.’ *Mbo 16:10*

* **13:30-31:** Yesu imundig pa mateen, ve ineep mbonj tamoot ru izi taan, ghero imuul iza ila pa sambam. Maaron saveen toni isavia sawa saangul to Yesu ivot to taghoniina toni. † **13:32-33:** Yes Israela matadi ingal tighaze sawa to tighur tamtoghon eta inim kinik padi, Maaron ighami inim ye natu. Tovenen saveen waaro tonene, pughu tovene: Sawa to Yesu imundig pa mateen, Tama Maaron ighuri inim kinik.

³⁶ “Iit tawatag: Sawa to kinik David ineep izi taan, ye imbesmbees pa Maaron itaghon Maaron ngar toni. Ve sawa to imaat, titavia toman nditimbu, ve paatu imbuuz ila naal lolo. *Mbanj 2:29*

³⁷ Eemoghon ngeu to Maaron ipamundigini pa mateen ne, paatu imbuuz maau.

³⁸⁻³⁹ “Tovenen yam tonjvetaz, aloonj! Yei nivotia saveen payam leso awatag kat tovene: Tutuunj to Mose, nene irau igham mulin ghiit kat pa patanani to sosor toit ne maau. Eemoghon ila Yesu uraat toni, Maaron ireu sosor toit kat. Tamtoghon tisob to tighur ila to Yesu, ye pale ipas di tivot pa samia tapiri, ve ireu sosor todi isob ilale, leso tineep denjadi ila Maaron mata. *Ro 3:28; Ga 2:16; 1Yo 2:2,12*

⁴⁰ “Tovenen yam apatum gham. Pa vene, mbeb to yes propeta tisavia ne ivot payam. Saveenja ineep tovene:

⁴¹ ‘Yam tamtoghon to velegiin Maaron, aloonj! Patanani to naghaze naghuri iza tiam pa sawa tonene, nene pale ite kat.

Yam pale aghita, le runamim iza pani ve ngar tiam isob, ve alalemim.

Ighaze mbeb tovene ivot pa tamtoghon pida ve aloonj varu moghon, nene irau aghur ila maau.’ ” *Hab 1:5*

⁴² Paulus isavsav le isob, ghoru yesuru Banabas tipul rumai, ve tivot tila pumuri. Tamtoghon to lupuun tonenen timundig, ve tighason di ariana tighaze umbom patabuanj ite ighaze ivot, ghoru yesuru timuul tinim, ve tila saveen tonenen lolo muul. ⁴³ Lupuun todi isob ve tamtoghon

tighaughau, ve ival tiina titaghon Banabas yesuru Paulus a yesna tila. Pida, yes Yuda kat. Ve pida, nene yes to titoor di tinim Yuda ve titaghon ataam to Maaron. Yesuru tisavsaav toman di, ve tipalot di tighaze tiyoon tunja ila poia to Maaron. *Mbanj 11:23, 14:22*

⁴⁴ Tinepneep le umbom patabuan ivot muul, ghoru tamtoohon tisob to ndug tonenen tila tilup di pa tiloon saveen to Tiina toit. ⁴⁵ Yes Yuda tighita ival tiina kat tiketkeet tila tighaze tiloon Paulus yesuru Banabas saveen todi. Tauto ireu lolodi, ve timundig ve yesna Paulus tiwazoran di, ve tipiyaav saveen velegiin naol pani. *1Tes 2:15+*

⁴⁶ Eemoghon Paulus yesuru Banabas timatughez maau. Tiyoon ariana, ve tisaav ghazoonja padi tighaze: “Maaron ighaze ipamuun gham pa saveen toni. Eemoghon yam azuruni. Ngar to aghami, nene inimale angabiiz taumim aghaze yam irau to agham nepoon to mataad iyaryaar maau. Tovenen aazne ve ila, yei pale nipul gham aneep lemim, ve nila to yes to Yuda maau ne. *Mt 21:41; Mbanj 18:6, Ro 1:16*

⁴⁷ Pasa, Ngeu Tiina isaav ariana payei ighaze:

‘You naghur ghom unum ghazoonja pa yes ndug ndug to Yuda maau ne.

Naghaze undaloov saveen tiou ila pa tamtoohon irau taan dige to naol, leso tiwatag ataam to naghams mulin di.’ ” *Is 42:6, 49:6; Lu 2:32*

⁴⁸ Yes to Yuda maau ne, tiloon saveen tonene, le lolodi poia kat, ve tipait Maaron pa saveen toni to tiloonja. Ve tamtoohon tisob to Maaron isia di pa

tigham nepoon to mataad iyaryaar, yes tighur ila.
Ro 8:29+

⁴⁹ Tovenen Maaron saveen toni ilaan toman tapiri irau taan suruvu tonowen. ⁵⁰ Eemoghon yes Yuda tileel saveen pa yes daba to ndug tonowen, toman ndiliva pida to izadi tintina ve titaghon yes Yuda pa sujuun todi. Tovenen yes daba ve ndiliva tonowen anadi tipazaagh ival tiina, ve tighur patajani pa yesuru, ve tinaan di tighau pa ndug todi. *2Tim 3:11*

⁵¹ Sawa to yesuru tipul ndug Antiok, titut aghedi ve ghavuur to ndug tonenen izi. Leso inim ghilaloon padi pa sosor todi. Ghoru tilaagh tila tivot ndug Ikonium. *Mt 10:14*

⁵² Ve yes Antioka to titaghon Yesu, Avuvu Patabuan izeev di tisob, ve tineep toman lolodi poia. *Mban 16:34; Ro 14:17; 1Pe 1:8*

14

Paulus yesuru Banabas tivotia Maaron aliŋa izi ndug Ikonium

¹ Paulus yesuru Banabas tila tivot izi Ikonium, ve titaghon ngar to tighami izi Antiok. Yesuru tiloon tila rumai to yes Yuda, ve tivotia mos padi. Saveen to yesuru, nene ila ingal ival tiina lolodi, le titoor ngar todi ve tighur ila to Yesu. Yes Yuda, ve yes Grika paam.

² Eemoghon yes Yuda to tighur ila to Kriŋi maau, tileel saveen pa yes to Yuda maau ne, le tighur koi pa yes tonvetaz to Kriŋi. ³ Tovenen Paulus yesuru Banabas tineep mala izi tonowe. Yesuru timatughez maau. Tinumeer Maaron, ve tiyoon ariana pa votiaan Tiina toit varu. Ve ye tau

ipalot di, ve igham mbeb gharatoonadi naol tivot ila yesuru nimadi tinim ghilaloon pa tamtoghon. Leso tighur ila saveen to yesuru tisavia pa poia toni.

Mk 16:20; Mban 5:12; 2Kor 12:12

⁴ Tamtoghon to ndug tonowen tighita yesuru uraat todi, le tivalag taudi tinim ru. Pida titaghon yes Yuda, ve pida tila tivool to mbanjoona ru tone-nen.

Lu 12:51+; Mban 28:25

⁵ Ghoro Yuda pida, ve yes to Yuda maau ne paam, toman daba todi, tilup ngar todi inim ee moghon, ve timbua saveen tighaze tighur patañani padi ila ival tiina matadi, ve tirab di pa yaam.

2Tim 3:11

⁶ Eemoghon yesuru tiloon saveen pa ngar to tighaze tigham padi. Tovenen tighau tila pa taan suruvu to Likonia, ve tineep izi ndug Listara ve ndug Derbe, ve ndug geegeu pida to tineep tigharau. *Mt 10:23*

⁷ Tovenen yesuru tineep izi tonowe, ve tivovotia varu poia padi.

Paulus igharaat narape eez izi ndug Listara

⁸ Ngeu narape eez ineep izi ndug Listara. Ye tina ipoopaa aghe samia. Tauto muun ve inim, ilaagh maau. ⁹ Paulus isavsav, ve ngeu tonowen ighurghur taliña pa saveen toni. Paulus imbatuti, ve ighilaala ighaze ghurla toni irau to Maaron ighami tini poia.

Mt 9:28+

¹⁰ Tovenen isaav pani toman aliña tiina ighaze: “Ai, umundig uyoon.” Ve ngeu tonenen purukia imundig ve ilaagh.

Yes Likonia tigham ngar tighaze Paulus ve Banabas, yesuru ndimaronja todi

¹¹ Ival tiina tighita Paulus igham mbbeb ghara-toonja tonenen, le timboob ila taudi alinadi Likonia tighaze: “Wai, aazne, maaron toit ru, tauto titoor di tinim tamtoghon, ve tizi tinim toit.” *Mbanj 28:6*

¹² Ghoru tiwaat Banabas tighaze ye Zeus, ve tiwaat Paulus tighaze ye Hermes. Pasa, yes tighita Paulus imunmuun pa savsaveen.*

¹³ Maaron todi eez, iza Zeus. Rumai toni iyondyood igharau ataam to didiin ariana to iluvut ndug. Tovenen ngeu to watoonrau to ingin rumai tonowen, yesna ival tiina tigham makau pida, ve tipabood di pa kananan, ghoru tila pa ataam tonenen, tighaze tirab makau tonowen tinim watoonrau pa yesuru.

¹⁴ Tipaesia ngar to tighaze tighami ne pa yesuru le irau lolodi maau kat. Tovenen tireep nonogiiņa todi, ve tilaan tiloonj tila ival tiina tonowen lolodi, ¹⁵ ve timboob tighaze: “Wai, ndiran tiei, agham vene malep! Yeru tamtoghon to taan ninimale yam. Yei ninim pa nivotia varu poia payam. Aloonj. Maaron tiam to ambesmbes padi ne, irau tigham anonja eta maau. Apul murimim padi, ve apul di tineepledi. Ve aghur ila to Maaron tau to ineep mata iyaryaar irau sawa isob. Pasa, ye to ighur sambam, taan, ve te, toman mbbeb tisob to tineep ila. *Mbnj 1:1+; Mbanj 10:26; 1Kor 8:4*

* **14:12:** Yes Grika ledi maaron katindi. Yes tighur ila tovene: Zeus, ye maaron to iza tiina kat ilib pa ndimaronja todi tisob. Ve Hermes, ye maaron ite to igham Zeus avo, ve ivovotia aliņa pa tamtoghon.

¹⁶ Muun, sawa to nditimbuud ve inim, ye ipul ndug ndug titaghon taudi ngar todi. *Mbanj 17:30*

¹⁷ Eemoghon Maaron tau, ye iyoon pait maau. Sawa isob, ye ighamgham poian ghiit, lesa tawatag taghaze ye inepneep. Ye ighamgham lemim uman to itap sambam ve izi inim, ve ighamgham sawa to taitain ivotvot. Lesa amim aniin katindi, ve lolomim poia.” *Mbo 104:27+, 147:8; Mt 5:45; Mbanj 17:27*

¹⁸ Yesuru tisavia saveen tonene inimale ngalsekiin ival tiina tonowen. Pasa, ival tiina ngar todi iyaryaan tighaze le tigham watoonrau eta pa yesuru, ve rismoghon tone tighami.

¹⁹ Yesuru tinepneep izi tonowe, ve Yuda pida to Ikonium ve Antiok tinim ve tileel saveen pa ival tiina. Tovenen titoor ngar todi, ve tighur koi pa Paulus, ve timundig tirabi pa yaam. Ghoru tisasaara ivot ila ndug dige, ve tipuli izi. Pasa, tighaze pa imaat wa. *2Kor 11:25; Ga 6:17; 2Tim 3:11*

²⁰ Eemoghon ndita pida to titaghon Yesu, tila tiyoon luvutini, ve ye imundig, ve yesna timuul tiloon tila pa paanu. Mbon ndugizau, ghoru yesuru Banabas timundig, ve tila pa ndug Derbe.

Paulus ve Banabas timuul tila pa ndug Antiok to inep ila taan suruvu to Siria

²¹ Paulus yesuru Banabas tila tivot ndug Derbe, ve tivotia varu poia tonowe, le tamtoghon katindi tighur ila to Yesu ve tinim taghoniina toni. Ghoru tipamuul laghoon todi, ve timuul tila pa ndug Listara, tila Ikonium, ve tila tivot ndug Antiok to Pisidia. ²² Yesuru tipapalot yes to titaghon

Yesu, ve tisaav ariana padi tighaze tikis ghurla todi tunja. Ve tisavsaav padi tighaze: “Iit irau tambaad patajani naol, ghero tataghon pooz to Maaron, ve taloon tala ndug toni sambam.” *Mt 7:14, 16:24; 1Tes 3:3+; 2Tim 3:12*

²³ Yesuru tighur tamtoghon pida tinim nginiina pa lupuuŋ to Krisi irau ndug ndug. Sawa to tighur di, tingun taudi pa ghaniin aniin ve tisuŋ, ghero tighur di tila Tiina Yesu to tighur ila toni ne nima, lesu inŋin di. *Mbanj 6:6, 13:1+; Tit 1:5*

²⁴ Ghero yesuru tilaagh timbut taan suruvu to Pisidia, ve tila peria taan suruvu to Pampilia.

²⁵ Tivotia Maaron aliŋa izi ndug Perga, ghero mal-malidi tizila ndug Atalia. ²⁶ Yesuru tigham waan tonowe, ve tiraav timuul tila pa ndug tiina Antiok to ineep izi taan suruvu to Siria. Pasa, sawa to tighaze tipamundigin laghoon todi, yes tonvetaz to Krisi to tineep izi tonowe, tauto tighur yesuru tila Maaron nima, lesu ighur poia toni iza todi ve ipalot di pa uraat. Tovenen sawa to tipasob uraat tonenen, yesuru timuul tila pa ghitoon di. *Mbanj 13:1+*

²⁷ Yesuru tila tivot Antiok, ghero tipoi lupuuŋ to Krisi tinim tilup di, ve tipaes padi pa uraat naol to Maaron igham di tivot ila nimadi. Ve tipaes padi tighaze Maaron igharaat ataam pa yes to Yuda maau ne, tauto tighur ila to Yesu wa. ²⁸ Ghero yesuru tineep mala ris toman nditadi to titaghon Yesu ne izi Antiok.

15

Yuda pida tighaze tamtoghon to Yuda maau ve titaghon Yesu, yes irau titaghon suvun tutuun to

Mose

¹ Muri ghoru, Yuda pida to tighur ila to Yesu, tineep Yudea, ve tizila pa Antiok, ve tisaav pa yes tonvetaz to Krisi tighaze: “Aloon. Yam to Yuda maau ne, tizir gham itaghon tutuun to Mose, ghoru poia. Ighaze maau, nene pale Maaron irau igham mulin gham maau.” *Mbnp 17:10-14*

² Paulus yesuru Banabas tiloon saveen todi, le irau lolodi maau kat. Tovenen yesna ndiran tonowen tiwazoran di. Tisavsav le maau, ghoru timbua saveen tighaze timbaan Paulus yesuru Banabas toman nditadi pida to Antiok tizala Yerusalem. Leso tighita yes mbanjoona pida toman yes nginiina tonowe, ve tigharaat saveen tonene.

³ Tovenen lupuun to Krisi tigharaat ataam padi, ve tighur di tila. Tilaagh taghon ataam to imbut taan suruvu to Ponisia ve Samaria, ve tipapaes pa tonvetaz to Krisi taghon ndug ndug tighaze: Yes to Yuda maau ne, katindi titoor ngar todi ve tighur ila to Yesu wa. Nditadi tiloon paesiin todi, le lolodi poia kat. ⁴ Tila tivot Yerusalem, ve lupuun to Krisi, toman nginiina todi ve yes mbanjoona, tigham di toman lolodi poia. Ghoru Paulus yesuru Banabas tipaes padi pa uraat naol to Maaron igham di tivot ila nimadi.

⁵ Eemoghon ndiran tutuuna pida to tighur ila to Yesu, tiloon saveen todi, ve timundig ve tisaav tighaze: “Yes to Yuda maau ne, ighaze tighur ila to Yesu, iit irau tazir di ve tapariaan di pa titaghon tutuun to Mose, ghoru poia.”

Lupuun tiina ivot izi Yerusalem, ve tiwasavon di pa yes to Yuda maau

⁶ Tovenen yes mbanjoona ve nginiina tilup di, ve titiir saveen to ndiran tutuuna tonowen.

⁷ Tiwasavon di ila ila, ghoru Petrus ana imundig ve isaav padi ighaze: “Yam tonvetaz, yam awatag. Muun, Maaron isia ghou ila lolomim, ve imbaan ghou nala to yes to Yuda maau ne. Tauto tiloon varu poia ila you avog, ve tighur ila. *Mbanj*

10:9-44

⁸ Maaron iwatag iit tamtoghon lolood. Tauto igham Avuvu Patabuan padi raraate inimale papazogi igham pait. Leso igham ghiit taghilaal taghaze ye lolo poia padi, ve ighaze igham di tinim ye le paam. ⁹ Ye igham ngar ite paam ite paam maau. Itaghon ngar raraate moghon pa iit, ve yes paam. Pasa, ye igham lolodi ingalaan itaghon ghurla todi. *Mbanj 10:43+; Ro 10:9+*

¹⁰ Tovenen pughu vena, to aazne yam aghaze atoov Maaron ve azoor ngar toni? Yes to Yuda maau ve titaghon Yesu ne, ighaze yam aghur patañani iza todi, nene pale agham Maaron ate yabyab. Aghita. Sawa to nditimbuud ve inim aazne, iit Yuda irau tataghon katin Mose tutuun toni ne maau. Pasa, nene ipatañan. *Lu 11:46; Ga 3:10*

¹¹ Yam awatag: Iit taghur ila taghaze poia to Tiina toit Yesu, tauto inim ataam pait ve Maaron igham mulin ghiit. Ve ye ighur ataam raraate moghon padi paam. Ataam ite paam maau.” *Ro 3:24+; Ga 2:16; Ep 2:5+; Tit 3:4*

¹² Petrus isavsaav le isob, ve ival tiina to lupuun tonenen neneenadi moghon. Ghoru tighur talinadi pa Banabas yesuru Paulus, ve anadi tipaesia mbeb gharatoonadi ve uraat tintina to Maaron

igham di tivot ila nimadi, sawa to tineep ila yes to Yuda maau ne lolodi.

¹³ Tisavsaav le isob, ghoru Yakobus ana imundig, ve isaav pa ival tiina ighaze: “Yam tonvetaz, aghur taliñamim payou, ve anag nasaav.

¹⁴ Maaron ighaze iyoun tamtoghon to ndug ndug tinim le, leso igham iza ivot inim tiina. Ngaramus, Simon ipaesia sawa inim mata to Maaron igham tamtoghon pida to Yuda maau ne tinim le. ¹⁵ Ve yes propeta tisavia ngar raraate moghon. Pasa, Maaron aliña pida to timbooda, isaav ighaze:

¹⁶ ‘Aazne, patañani tiina ivot pa sinj to David ve iwaghamun di.

Yes tinimale ruum to tireu mbirisani.

Eemoghon muri, you pale nauul di, leso tiyoon ariña ve tigham pooz muul. *Amos 9:11+*

¹⁷ Ve tamtoghon pida to ndug ndug tovene paam. You pale napamundigin yes to nasia di tinim leg, leso tizuaria di pa tiwatag katin ghou.

¹⁸ Saveen tonene, nene Maaron aliña. Ye tau ivotia alok wa.’ ” *Is 45:21*

¹⁹ Ghoru Yakobus iseen saveen toni muul ighaze: “You naghita naghaze yes to Yuda maau, ve aazne titoor ngar todi ve tighur ila to Maaron, iit irau tagham patañani padi malep. ²⁰ Tovenen iit irau tambood ledi rau eta, ve tasaav ghazoonja padi pa sa tutuun to pale titaghon di. Tutuun tovene: Aniiñ to tipakur maaron kaaromña pani, nene yes tighani malep. Pasa, aniiñ tovene pale igham di tisami ila Maaron mata. Ve tighur maat malep. Ve tighun mbeb sinjidi malep, ve tighan

mbeb mindadi to siŋ ineep ila malep. *Mbnp 9:4; Igham 20:3+; Wkp 17:13; 1Kor 6:18, 8:7+, 10:14*

²¹ Tovenen yes irau titaghon tutuun tonene. Leso tireu yes Yuda lolodi sob. Pasa, muun ve inim, tivovotia tutuun to Mose irau ndug ndug. Ve umbom patabuan to naol ne, tiwatwaat tutuun tonowen ila Yuda rumai todi lolodi.”

Rau to timbooda ila to yes to Yuda maau

²² Yes mbanjoona toman yes nginiina ve nditadi tisob to tineep iloon ila lupuun to Krisi, tiloon Yakobus saveen toni, ve tighita tighaze poia pa titaghoni. Tovenen tighur tamtoghon todi ru to timuunmuun pa lupuun todi, Yudas to iza ite Barsabas, ve Silas. Leso tigham naghodi, ve yesna Paulus ve Banabas tila pa Antiok. ²³ Ve timbood saveen tonowen ila rau, ve tighuri ila todi, lesa tikisi ve tila tomani. Rau todi isaav tovene:

“Yei mbanjoona ve nginiina, nimbood rau tonene ilat to yam tonvetaz to Krisi to Yuda maau, ve aneep izi ndug Antiok, ve taan suruvu to Siria ve Silisia. Yam tonvetaz, ndag poia tiei ilat pa yam asob.

²⁴ “Yei niloon tighaze tamtoghon tiei pida tilat, ve tisavia saveen pida to igham gham lolomim ipatanan ve agham ngar naol. Eemoghon yei nimbaan ndiran tonowen maau. Yes titaghon taudi ngar todi ve tilat. ²⁵ Tovenen yei nilup ghei, ve niwasavon ghei pa patanani tonene, le nivot pa ngar ee moghon. Tauto nighur tamtoghon tiei pida tigham naghomai, ve nimbaan di tilat. Ve Banabas yesuru Paulus, tamtoghon toit ru to lolomai padi kat ne, tilat toman di paam. ²⁶ Yesuru

timatughez maau, ve tirei taudi pa uraat to vottiaan Tiina toit Yesu Kresi varu. ²⁷ Tovenen yei nighur rau tonene ila to Yudas yesuru Silas, ve nimbaan di tilat. Ve yesuru pale tipaesia alinamai ila avodi paam. ²⁸ Avuvu Patabuan igham pooz payei le nighita nighaze irau nighur tutuun naol payam maau. Pa vene, igham patañani payam. Tovenen yei pale nisavia mbeb tintina moghon to nighaze ataghon di. ²⁹ Aniin to tipakur maaron kaaromña pani, yam aghani malep. Ve aghun mbeb sinidi malep. Ve aghur maat malep. Ve aghan mbeb mindadi to sin ineep ila malep. Ighaze aneep sagan pa ngar tovene, nene pale ataghon ngar poia. Saveen tiei inim imuul sualen. Yam aneep toman lolomim poia.” *Syg 2:14,20*

Yes Antioka lolodi poia pa rau to yes mbanjoona

³⁰ Ndiran paan to timbaan di, tila tivot Antiok, ghoru tipoi tamtoghon to Kresi tinim tilup di, ve tighur rau tonenen ila todi. ³¹ Yes Antioka tiwaata, ve tiloon saveen palotiin to ineep ila rau lolo ne, le lolodi poia kat. ³² Yudas ve Silas, yesuru propet paam. Tovenen tisavia saveen popoia naol pa yes Antioka pa tipalot ghurla todi, lesu tiyoon ariana. ³³⁻³⁴ Yesuru tineep toman di mala ris, ghoru yes Antioka tighur di tila toman lolodi poia, ve timuul tila pa nditadi to timbaan di tinim.*

* **15:33-34:** Baibol munginadi pida ledi saveen pida paam to ineep ila waaro tonene. Saveen tovene: “Eemoghon Silas igham ngar ighaze poia pa ineep toman di ris muul. Tovenen izi ineep ve Yudas enjeni imuul izala pa Yerusalem.”

³⁵ Paulus yesuru Banabas tineep mala ris izi Antiok. Ve yesna ndiran pida tivovotia saveen to Tiina toit pa tamtoghon, ve tipatoot di pani.

Laghoon to Paulus ighami inim ru

Paulus ve Banabas tiwazoran di ve tiwapulin taudi

³⁶ Sawa pida inim ila, ghoru Paulus isaav pa Banabas ighaze: “Yo, ituru tataghon agheed ina muul, ve tala ndug ndug to tavotia saveen to Tiina toit Yesu padi, ve tanjig yes tonvetaz to Krisi. Leso taghita nepoon todi vena.” ³⁷ Sawa tonenen, Banabas ighaze igham Yoan Markus ve yesna tila.

Mbanj 13:5

³⁸ Eemoghon Paulus lolo pa Markus ilaagh toman di muul malep. Pasa muun, sawa to tilaagh pa uraat to votiaan varu poia, Yoan Markus ila toman di paam. Eemoghon ye ipul di tineep izi Pampilia, ve ighau padi, ve yesna tilaagh pa uraat muul maau.

Mbanj 13:13; 2Tim 4:11

³⁹ Yesuru tiwazoran di ila ila le tiwapulin taudi. Tovenen Banabas igham Yoan Markus, ve yesuru tigham waan, ve tiraav tila pa mutu Saiprus. ⁴⁰ Ve Paulus igham Silas ighaze yesuru tilaagh. Tovenen yes tonvetaz to Krisi tighur yesuru tila Tiina toit nima, ve tighason Maaron pa ighur poia toni iza todi. ⁴¹ Ghoru Paulus yesuru Silas timundig ve tilaagh irau taan suruvu to Siria ve Silisia, ve Paulus ipalot lupuun to Krisi irau ndug ndug izi tonowe.

16

Paulus igham Timoti lesu yesna tilaagh

¹ Paulus yesuru Silas tila tivot ndug Derbe, ghoru tisakia tila pa ndug Listara. Ndug tonowen, ngeu eez to itaghon Yesu inepneep. Iza Timoti. Tina, ye Yuda tidi to ighur ila to Yesu. Ve tama, ye Grik taamdi. *1Kor 4:17, 16:10; Pil 2:19+*

² Yes tonvetaz to Krisi to tineep ndug Listara ve ndug Ikonium, tisob tipait Timoti varu tighaze ye ngeu poia. ³ Tovenen Paulus ighaze ighami, leso yesna tilaagh pa uraat. Eemoghon Yuda katindi to tineep tonowe, tiwatag tighaze Timoti tama, ye Grik taamdi. Tovenen Paulus izir Timoti, leso yes Yuda tiyou avodi pani sob. *1Kor 9:20*

⁴ Ghoru Paulus yesuru Silas, ve Timoti tipa-mundigin laghoon todi muul, ve tilaagh irau ndug ndug, ve tipaesia yes mbanjoonja ve nginiina to tineep izi Yerusalem ne aliñadi padi. Leso tiwatag sa ngar to daba tonowen tighuri pa yes to Yuda maau ne pa titaghoni. *Mbanj 15:28+*

⁵ Saveen todi ipalot lupuun to Krisi irau ndug ndug le ghurla todi iyaryaan le iyaryaan kat. Ve sawa isob tamtoghon papaghu tilonloon tila toman di. Tauto lupuun to Krisi tivot tinim tintinadi irau ndug ndug.

Maaron ipoi Paulus ighaze ila ivotia varu poia izi Masedonia

⁶ Paulus toman ndita tilaagh timbut taan suruvu to Galesia ve Pirigia. Eemoghon tila pa taan suruvu to Asia maau. Pasa, Avuvu Patabuan ipoon di ighaze tivotia Maaron aliña izi tonowe malep.

⁷ Tilaagh tila tivot taan to Misia dige, ve tighaze

tivool pa taan suruvu to Bitinia. Eemoghon Yesu Avuvu* iyok padi pa tila ndug tonowen maau. ⁸ Tovenen tilaagh timbut taan suruvu to Misia, ve tizila tivot ndug Troas to ineep izi naari.

⁹ Mbon, tandagiin eez ivot pa Paulus. Ye ighita ngeu eez to Masedonia iyondyood, ve ipoipoi ighaze: “Paulus, uraav uvol unum pa Masedonia, leso uul ghei.” ¹⁰ Paulus ighita tandagiin tonene le isob, ghororikia moghon yeina nimundig, ve nikaal ataam pa nivool nila pa taan suruvu to Masedonia.† Pasa, nighilaal mbeb to ivot ne nighaze nene Maaron tau ipoi ghei pa nivotia varu poia pa tamtooghon tonowe.

Paulus toman ndita tila tivot ndug Pilipai

¹¹ Tovenen yei niza waan izi Troas, ve nighau denja nila nivot mutu Samotres. Mbon ndugizau, ghoror niraav muul nila, le niloon izi ndug Neapolis to ineep taan tiina. ¹² Ghoror nilaagh taan, ve niloon nila pa Pilipai. Pilipai, nene ndug tiina eez to taan suruvu to Masedonia. Yes Roma tipamundigin ndug tonowen ila taan to yes Grika.‡

* **16:7:** Saveen waaro katindi tisavia Maaron Avuvu Patabuan. Eemoghon saveen waaro tonene iwaat Avuvu Patabuan ighaze ‘Yesu Avuvu.’ † **16:10:** Saveen ‘yeina’ ipatoon ghiit ighaze sawa to Paulus toman ndita tineep izi ndug Troas, Lukas ila toman di ve yesna tila. Masedonia, nene ineep taan suruvu to Yurop dige. Tovenen sawa to Paulus ila ivotia Maaron aliina padi, nene sawa to mbanjoona to Krisi tivotia varu poia izi Yurop muun. ‡ **16:12:** Ndug Pilipai ineep izi taan to yes Grika, eemoghon titaghon yes Roma gabuadi ve tutuun todi. Ve ndaaba munjinadi katindi to Rom to tisob pa uraat tizi tineep tonowe.

Nila nivot tonowe, ve nineep irau mbon pida le isob, ¹³ghoro umbom patabuan to Maaron ivot.

Tovenen nipul ndug tiina, ve nivot nila ya to ineep ndug dige. Pasa, yei nigham ngar nighaze yes Yuda avaat tiluplup di pa sunuun izi tonowe. Le onoon. Nila peria, ve nighita ndiliva pida tilup di tonowe. Ghoru mbolemayi izi, ve yeina niwasavon ghei pa Maaron aliya. ¹⁴Yes ndiliva tonowen, todi eez, iza Lidia. Ye to ndug Tiatira. Ve irauraukol pa uli popoiadi to bodeenadi inimale aindan. Ye Yuda tidi maau. Eemoghon ighur ila to Maaron ve itaghon ataam toni, ve yesya Yuda tiluplup di pa sunuun. Sawa to ye iloon Paulus saveen toni, Maaron igham uraat ila lolo le ighur ila Paulus aliya. *Lu 24:45; Yo 6:44; Mban 13:48*

¹⁵Tovenen ye tau ve yes to tineep tomani ila ruum toni, tigham ya. Le isob, ghoru ye isaav payei tovene: “Ighaze yam aghita ghou aghaze you naghur ila kat to Tiina toit, ghoru anim ruum tiou, ve aneep toman ghou.” Ye izoorndug payei, tovenen niloon aliya, ve nila ruum toni. *Mban 16:33, 18:8; 1Kor 1:16*

Yes Pilipai tighur Paulus yesuru Silas tiloon tila ruum to yabyabuun

¹⁶Sawa eez, yei nighaze nimuul nila pa sunuun ina to ineep ya pana. Nila le nivot to liva mbesoonja eez. Ye, avuvu samia izeeva le irau ivotia mbep pida to muri pale tivot. Tovenen yes daba toni tiyouyou yaam tiina ila uraat toni tonowen. ¹⁷Ye ighita yeina Paulus, tovenen itaghon ghei ve imboboob ighaze: “Ai, aghita. Ndiran tonene, yes mbesoonja to Maaron Tiina To Ilib Pa Ndimaronja

Tisob. Yes tinim pa tivotia ataam to Maaron igham mulin gham, ve aneep pooli.” *Mk 1:24,34*

¹⁸ Ndag to naol ne, ye inoknok bobaan moghon le Paulus tini imum pani kat. Tauto sawa eez, itoora, ve iyaan avuvu samia tonowen ighaze: “Ai! You nasaav ariana payom ila Yesu Krisi iza: Upul liva tonanan, ve ughau ula!” Sawa tonenen kat, avuvu samia ipul liva tonowen, ve ighau. *Mk 16:17; Mbanj 5:16, 8:7*

¹⁹ Tovenen yes daba to liva tonenen atedi yabyab kat pa Paulus yesuru Silas. Pasa, yes tighita ataam todi to ghamuun yaam, nene ivool wa. Tovenen tikis yesuru, ve tisasaar di tila maran, leso tipayoon di pa savsaveen ila yes pooza to ndug matadi. *Mbanj 19:25+*

²⁰ Tigham di tila, ve tipayoon di ila yes pooza matadi, ghoru tingal saveen padi tighaze: “Ndiran tonene, yes Yuda. Tinim ndug toit, ve tighereb patañani naol tivotvot ila ndug lolo. *Mbanj 17:6*

²¹ Ve yesuru timalaan pa tutuun toit Roma paam. Pasa, tipapazaagh tamtoghon pa ghamuun ngar pida to tutuun toit ingalsekin ghiit pani.”

²² Ival tiina to tinim pa lupuun, tiloon saveen todi, le anadi atedi yabyab pa yesuru, ve tingal saveen padi paam. Tovenen yes pooza to ndug tireep yesuru nonogiina todi tizi, ve tisaav pa tamtoghon pida ve tilos di. ²³ Tilos katin di le naghodi isami. Ghoru tigham di tila, ve tighur di tiloon tila ruum to yabyabuun lolo, ve tisaav ariana pa ngeu to ingin ruum to yabyabuun tighaze ye irau ingin katin di. *2Kor 6:5, 11:23+; 1Tes 2:2*

²⁴ Ngeu tonowen iloon alinadi, ve isasaar di tiloon tila ruum lolo to ineep loonja kat. Ghoru ikapis

agheti pa ai tintina ru, ve ikau ai tonowen matadi le tunja.

²⁵ Paulus yesuru Silas tinepneep le mboŋ anoŋa. Yesuru tisunŋun ve timboumbou mbouŋ pa tipait Maaron, ve ndiran pida to tineep toman di ila ruum to yabyabuunŋ lolo, tighurghur taliŋadi padi. *Mbo 119:62; Ep 5:19*

²⁶ Mala maau ve yonŋyoog tiina kat itok taan le iwatokin ruum to yabyabuunŋ tonowen, ve ataam tisob tikaak. Ve sen to tikau tamtoghon pani, tisob timazug tizi. *Mban 5:19, 12:7+*

²⁷ Ngeu to inŋin ruum to yabyabuunŋ ne, ruŋa iza ve imundig, mata ila le ighita ataam tisob tikaak. Tovenen ighaze pa tamtoghon tisob tighau tila wa. Tauto ipas buza toni, ve ighaze inŋeer tau imaat. ²⁸ Eemoghon rikia moghon Paulus imboob ila pani ighaze: “Ai, ukaria taum malep! Yei nisob ninepneep ne. Tiei eta ighau maau.”

²⁹ Ngeu tonenen imboob ila, ve tigham yaryaroonŋa inim. Ghoru ilaan iloonŋ ila toman matughezaanŋ tiina, ve itap izi Paulus ve Silas agheti pughu. ³⁰ Ghoru, imundig muul, ve igham di tivot tila pumuri, ve ighason di ighaze: “Ndolman tiou ru, pale naghama vena, leso Maaron igham mulin ghau ve naneep pooi?” *Lu 3:10, 10:25; Mban 2:37*

³¹ Yesuru tipamuul aliŋa tighaze: “Ughur ila to Tiina tiei Yesu, leso igham mulin ghom toman yes to tineep ila ruum tiom ne paam.” *Yo 3:16,36, 6:47*

³² Ghoru, ngeu tonenen iyou yes to tineep tomani ila ruum toni tinim, ve Paulus yesuru Silas tivotia saveenŋ to Tiina toit padi. ³³ Mboŋ ee moghon tone-

nen, ye igham yesuru tila, ve imen mbotadi. Le isob, ghoru rikia moghon ye toman yes to tineep tomani ila ruum toni, tisob tigham ya. *Mbanj 2:41, 16:15, 18:8*

³⁴ Ghoru igham Paulus yesuru Silas tiloon tila ruum toni lolo, ve igham adi aniiñ. Ye lolo poia kat. Pasa, yesña ndita tisob to tineep tomani ila ruum toni, tighur ila to Maaron wa. *Mbanj 13:52; Ro 14:17; 1Pe 1:8*

³⁵ Ndugizau, ghoru yes pooza to ndug timbaan kukud pida tila to ñgeu to ingin ruum to yabyabuñ, ve tisaav pani tighaze: “Ndiran ru tonowen, upul di tila.”

³⁶ Tovenen ye ila ve ipaesia yes kukud alinadi pa Paulus ighaze: “Yes pooza timbaan ghou nanim tighaze you napul gham ala. Tovenen yamru avot ala toman lolomim poia.”

³⁷ Eemoghon Paulus isaav pani ighaze: “Maau kat! Yes pooza to ndug tonene timalaan pa tuuñ to Rom wa. Pasa, yeru tamtoghon to Rom. Eemoghon yes titiir poian saveen tiei maau, ve tilos sorokin ghei ila ival tiina matadi, ve tizeev ghei niloon nila ruum to yabyabuñ lolo. Ve aazne, tighaze tizurun ghei inimale yongaan? Maau! Taudi tinim, ve tigham ghei nivot nila.”

³⁸ Tovenen yes kukud timuul tila, ve tipaesia Paulus alina pa yes pooza. Sawa to yes pooza tiloon tighaze Paulus ve Silas, yesuru tamtoghon to Rom, matughezaan tiina igham di. ³⁹ Tovenen taudi tila, ve tirab yesuru atedi, ve tighason di pa tipul sosor todi. Ghoru tigham di tivot tila pumuri, ve tighason di pa tipul ndug todi ve tila.

⁴⁰ Yesuru tipul ruum to yabyabuun, ve tinjarua Lidia ruum toni tila. Tila peria ve yesnja yes tonvetaz to Krisi tilup di tonowe. Tipalot di pa savsaveen pida le isob, ghoru tipul di, ve tila.

17

Paulus yesuru Silas tivotia varu poia izi ndug Tesalonika

¹ Paulus toman ndita tilaagh tila tivot ndug Ampipolis, ve tisakia muul tila ndug Apolonia. Ghoru tilaagh muul tila tivot ndug Tesalonika. Ndug tonowen, yes Yuda rumai todi eez inepneep.

² Paulus yesnja yes Yuda tiluplup di pa sunjuun titaghon ngar to moghon moghon ighamghami. Tovenen umbom patabuan tol, ye ila rumai tonowen, ve yesnja yes Yuda tiwasavon di pa Maaron alina to timbooda. ³ Ye ipatoot di pa Maaron alina, lesu tighilaal tighaze Mesia, ye irau iyamaan yabyabuun ve imaat, ghoru imundig pa mateen itaghon Maaron ngar toni. Ve isaav padi ighaze: “Yesu to navovotia varu payam ne, tauto Mesia.”

Lu 24:26,46; Mbanj 3:18, 18:28

⁴ Yuda pida tiloon saveen tonene, ve tighur ila. Tovenen tila tilup di toman Paulus yesuru Silas. Ve yes moghon maau. Yes Grika ival to matadi ingalngal Maaron ve yesnja yes Yuda tiluplup di pa sunjuun, toman ndiliva pida to izadi tintina, yes paam tighur ila to Yesu, ve titaghon ataam toni.

⁵ Eemoghon yes Yuda tighita ival tiina titaghon Paulus yesuru Silas, le ireu lolodi. Tovenen tila maran, ve tiyou ndiran samsamiadi pida to tirourou sorok taghon maran, ve yesnja ndiran tonowen tilup di, ve tipazaagh ival tiina to ndug,

leso tipamundigin malmal injarua yesuru. Mala maau, oroor tiina imundig, ve tikeet injarua Yason ruum toni tila. Tila tivot ruum, ghoru tirab balagin ataam, ve tiloon tila tikaal Paulus yesuru Silas. Tighaze tigham di tivot, leso tipayoon di ila ival tiina matadi. *1Tes 2:16+*

⁶⁻⁷ Eemoghon tikaal di le maau. Tovenen tigham Yason toman tonvetaz pida to Krisi, ve tisaasar di tila, ve tipayoon di ila yes daba to ndug matadi. Ghoru timboob tighaze: “Ndiran to Yason igham di tila tineep ruum toni, tilaghlaagh irau taan isob, ve tipapazaagh tamtooghon pa ghamuun ngar samsamia naol. Ve aazne, tinim tivot ndug toit wa. Ndiran tonowen tizorzoor kinik tiina to Rom tutuun toni. Pasa, tisavsaav tighaze kinik ite inepneep, iza Yesu.” *Lu 23:2; Yo 19:12; Mbanj 16:20*

⁸ Ival tiina toman yes daba to ndug tiloon saveen tonene, le ireu lolodi ve oroor tiina imundig muul.

⁹ Tovenen yes daba to ndug tisaav pa Yason toman ndita tighaze tighur yaam pida izi tikisi. Leso timatughez, ve tigham patanani ivot pa ndug muul sob. Yaam tonowen, ngara tovene: Ighaze tigham sosor ite paam muul maau, nene muri pale tigham mulini. Yason toman ndita tighur yaam tonenen ila todi le isob, ghoru yes daba tipul di tila.

Paulus yesuru Silas tivotia Maaron alija izi ndug Berea

¹⁰ Paulus yesuru Silas tineep le mbon izi, ghoru yes tonvetaz to Krisi rikia moghon tipaghau di tila pa ndug Berea. Tila tivot tonowe, ve injarua yes Yuda rumai todi. ¹¹ Yes Yuda to ndug Berea, ngar todi poiawaat. Tilib pa yes Yuda to ndug

Tesalonika. Pasa, tighaze le tiloon katin saveen to Paulus ivovotia. Ve ndag to naol ne, tingabiiz saveen toni toman Maaron aliña to timbooda, leso tiwatag: Saveen toni denja, ma maau? *Yo 5:39*

¹² Tauto Yuda katindi titoor ngar todi ve tighur ila to Yesu. Ve Grika katindi to izadi tintina, yes tighur ila paam. Yes ndiliva ve nditamoot.

¹³ Eemoghon yes Yuda to ndug Tesalonika tiloon Paulus varu tighaze ye ivovotia Maaron aliña izi ndug Berea. Tovenen timundig titaghon di tila, ve tighamun ival tiina to Berea ngar todi ve tipazaagh di. Leso tigham malmal pani. ¹⁴ Tovenen yes tonvetaz to Krisi rikia moghon tinguaaz Paulus tizila naari, ve Silas yesuru Timoti moghon tineep izi Berea. ¹⁵ Yes to tinguaaz Paulus, tingini le tila tivot ndug tiina Atens.*

Tila peria, ghero Paulus isaav padi ighaze: “Amuul ala, ghero asaav pa Silas ve Timoti rikia moghon titaghon ghou tinim.” Tovenen tipul Atens ve timuul tila.

Paulus ineep izi ndug Atens

¹⁶ Sawa to Paulus isasaan Silas yesuru Timoti izi Atens, ye ilaghaagh taghon ndug lolo, ve ighita ndug ivon pa maaron kaaromña anunudi, le irau lolo maau kat. ¹⁷ Tovenen iloon ila yes Yuda rumai todi, ve yesña yes Yuda ve ndiran pida to matadi ingalngal Maaron ve yesña yes Yuda tiluplup di pa sunuun, tiwasavon di pa Maaron aliña. Ve ndag to naol ne, ye ilala maran ate, ve isavsaav toman yes to tineep izi tonowe.

* **17:15:** Ndug Atens iza tiina pasa, muun ve inim, ndiran ngara katindi tinepneep izi tonowe.

18 Tamtoghon katindi to ndug Atens titaghon ngar to yes ndiran ngara to muun. Lupuun todi tintina ru, tiwaat izadi tighaze ‘Epikurian,’ ve ‘Stoik.’†

Epikurian pida toman Stoik pida tiloon Paulus ivotia Yesu varu ve mundigiin to yes mateena, ve timundig ve yesna Paulus tiparזור pa savsaveen. Tamtoghon todi pida tisaav tighaze: “Aghita. Borou tonowen iyou avo pasa? Saveen to isasavia we, ye tau ighazoon pani maau. Avaat ighami ila ndiran pida avodi.”

Ve tamtoghon pida tisaav tighaze: “Maau. Ye avaat isavia ndug pida maaron todi, lesa ighereb ghiit pa tataghon di.”

19 Tovenen tighami tila pa lupuun tiina to yes daba to tiluplup di izala ndug mbuona Areopagus, ve tisaav pani tighaze: “Laak, ngar paghu to yom uvovotia pa tamtoghon, usavia payei ve niloona. Leso nighazoon pani. 20 Pasa, ngar to yom usasavia ne, yei niloona inimale paghu payei. Tovenen nighaze usavia muul. Leso nighazoon kat pa pughu.” 21 Tisaav tovene pasa, tamtoghon

† **17:18:** Yes Epikurian titaghon ngar to ngeu eez, iza Epikurus. Ve yes Stoik titaghon ngar to ngeu ite, iza Zeno. Sawa to Paulus ineep izi Atens, Epikurus ve Zeno timaat alok wa, irau ndaman 300 ma venen. Eemoghon tamtoghon titataghon ngar todi sone. Epikurus isavsav pa ataam to tamtoghon tineep toman lolodi poia. Ngar toni tovene: Sa ngar to ighaze igham ghom lolom poia, nene utaghoni tovene le irau isoon matin ghom. Ula pa naghom moghon. Ve Zeno ngar toni, nene vene: Iit irau tatatan tauud, takaal ataam pa ngar toit ivot inim tiina, ve tauud tagham uraat. Ve sa mbeb to ighaze ivot pait, poia ma samia, nene tayok pani moghon. Tagham ngar naol malep. Leso taneep pooli.

tisob to Atens toman yes loomba to tila tineep toman di, ledi uraat ite paam maau. Tinepneep ve tighurghur talinadi pa sa ngar ma saveen paghu to tamtoghon tisavia ivot, ghoru tiwasavon di pani.

Mos to Paulus ivotia izi ndug Atens

²² Paulus imundig ve iyoon ila bodbodaan to lupuun tiina tonowen, ve isaav padi ighaze: “Yam nditamoot to Atens, you nawatag: Yam azuaria gham aghaze le ambees kat pa ndimaronna tiam. Ngar tiam, you naghita wa. ²³ Pasa, sawa to nalaagh taghon ndug lolo, you naghita maaron tiam anunudi katindi to asunsun padi. Ve naghita artaal eez to timbood saveen izala pogho tovene: ‘Artaal tonene, nene to maaron to yei niwatagi maau.’ Laak, Maaron to yam awatagi maau ve ambesmbes pani, tauto aazne naghaze navotia payam.

²⁴ “Ye Maaron to ighur sambam ve taan, toman mbeb tisob. Ve ye Tiina to ingin sambam ve taan. Ye ineep iloon ila rumai to sunuun to tamtoghon tirei di pa nimadi ne maau. *Mbnp 1:1+; Mban 7:48+*

²⁵ Ve imbool pa mbeb eta, leso iit tamtoghon taghur nimaad pa ulaani ne maau. Ye tau to igham yaghuraad pa iit tasob, ve igham ghiit taneep mataad iyaryaar. Ve mbeb toit to naol ne, ye to igham di pait. *Mbo 50:10+*

²⁶ “Muun kat, ye ighur tamtoghon ee moghon. Ve igham ghiit ndug ndug to taan tasob tavot ila to tamtoghon ee moghon tonowen, ve ighur ghiit taneep irau taan isob. Ye tau ighur tamtoghon tineep irau ndug todi todi, ve ighur mbut pa taan

todi. Ve ighur sawa padi pa tineep izi ndug todi todi. *Mbnp 2:7*

²⁷ “Maaron igham tovene, lesu ipamundigin ghiit pa tazuarua ghiit pa kalsoonji. Onoon, ye ineeep mala pait maau. Eemoghon sawa to takaala, iit tanimale yes matadi pisi to tindabdab pa mbeb.

²⁸ Nepoonj toiti, ve sa ngar to ighaze taghami, nene ye ineeep toman ghiit. Ve ye to ighur ghiit tovene. Nene inimale tamtoghon tiam ngara eez isavia ila mbounj toni alok wa. Ighaze: ‘Iit tasob Maaron ndinatu.’

²⁹ “Yo, ighaze Maaron ndinatu iit, nene irau tagham ngar taghaze Maaron, ye inimale mbeb anunudi to tamtoghon tigharaat di pa gol, silva, ve yaam pida ne maau. Pasa, Maaron tau, ye inimale maaron kaaromnja anunudi to tamtoghon tigharaat di pa nimadi titaghon taudi ngar todi ne maau. *Is 40:18+; Ro 1:22+; Mbanj 19:26*

³⁰ “Muun, tamtoghon tikankaan pa Maaron. Tauto lolo isamin di, ve mata ila pa sosor todi kat maau. Eemoghon aazne, ye isaav ariana pa tamtoghon tisob ighaze tipul ngar todi samsamia, ve titoor ngar todi ila pani. *Lu 24:47; Mbanj 14:16; Ro 3:25; Tit 2:11+*

³¹ Pasa, ye tau ighur sawa eez pataghaan wa. Sawa tonenen ighaze ivot, ye pale ingabiiz tamtoghon tisob to taan, ve ighur atia padi. Ve gabizoonj toni pale denja moghon. Uraat to gabizoonj tonowen, ye ipuli ila ngeu eez nima. Ngeu tonowen, Maaron ipamundigini pa mateen wa. Lesu iit tawatag taghaze ye iza pa uraat tonenen.” *Mbo 9:8, 96:13; Yo 5:22; Mbanj 10:42*

³² Sawa to tiloon Paulus avo ila pa mundigiin to Yesu pa mateen, tamtoghon todi pida tiin, ve tipiyaav saveen velegiin pani. Eemoghon pida tisaav pani tighaze: “Yei nighaze sawa ite paam, ghoru usavia saveen tonene payei ve niloonja muul.” ³³ Paulus isavsaav toman di le isob, ghoru ipul di, ve ila. ³⁴ Tamtoghon pida to tiloon saveen toni, tighur ila to Krisi ve tila tomani. Todi eez, iza Dionisis. Yes daba to tiluplup di izala ndug mbunja Areopagus, ye todi eez. Ve liva eez, iza Damaris, yesna tamtoghon pida tighur ila paam.

18

Paulus igham uraat izi ndug tiina Korin

¹ Muri ghoru, Paulus ipul Athens, ve ilaagh ila ivot ndug tiina Korin. ² Inepneep tonowe, ve ighita Yuda eez, iza Akwila. Ye to taan suruvu to Pontus, ve azuwa iza Prisila. Muun, yesuru tineep izi taan suruvu to Itali. Eemoghon Klodias to kinik to Rom, isaav ariana ighaze yes Yuda to tineep izi ndug tiina Rom, tisob tipul Rom, ve tighau tila. Tauto Akwila yesuru Prisila tighau tila, ve ngaramus tineep izi Korin. *Ro 16:3; 1Kor 16:19; 2Tim 4:19*

³ Paulus ila ineep toman di, ve yesna tilup di pa uraat. Pasa, uraat to yesuru tighamghami, nene uraat toni paam. Yes tighagharaa ngai uli ve tisaii, leso tamtoghon tidaada inim mbeez (o haus sel). *Mban 20:34; 1Kor 4:12*

⁴ Umbom patabuan to naol ne, Paulus iloon ila yes Yuda rumai todi, ve yesna yes Yuda ve yes Grika tiwasavon di pa Maaron alina. Pasa, ye ighaze ipamundigin ngar todi, leso tighur ila to Yesu.

⁵ Muri ghero, Silas yesuru Timoti tipul Masedonia, ve anadi tinim tivot Korin. Tila peria to Paulus, ghero ye ipul uraat toni to sainj ngai uli, ve ineep ila uraat to votiaan mos moghon. Ye ivovotia Yesu saveenj toni pa yes Yuda, leso tighur ila tighaze Yesu, ye Mesia. ⁶ Eemoghon yes tizoor Paulus aliija, ve tipiyaav saveenj velegiin naol pani. Tovenen itir nonogiiija toni inim ghilaloonj padi pa sosor todi, ve isaav padi ighaze: “Poia. Ighaze Maaron ighur atia payam ve alalemim, nene pughu to taumim. You maau. Aazne ve ila, you pale napul gham aneep, ve nala navotia Maaron aliija pa yes to Yuda maau ne.” *Ezek 33:7+; Mt 10:14+; Mbanj 13:46*

⁷ Tovenen Paulus ipul di, ve ila ineep toman ngeu eez, iza Titius Yastus. Ye Yuda maau. Eemoghon ighur ila to Maaron ve itaghon ataam toni, ve yesija yes Yuda tiluplup di pa sunuunj. Ruum toni igharau yes Yuda rumai todi. ⁸ Daba to injin rumai todi tonowen, iza Krispus. Yesija yes to tinepneep tomani ila ruum toni, tisob tighur ila to Tiina toit. Ve yes moghon maau. Ival tiina to Korin to tiloonj Paulus saveenj toni, tighur ila to Yesu ve tigham ya. *1Kor 1:14*

⁹ Mboj eez, Tiina toit Yesu ivot to Paulus ila tandagiiij, ve isaav pani ighaze: “Umatughez ve neneenjam malep. Uyoon ariana pa savsaveenj. *Mbanj 23:11*

¹⁰ Eta irau iwaghamun ghom maau. Pasa, you naneep toman ghom. Ve tamtoghon tiou katindi tineep izi ndug tonene.” *Mt 28:20; Yo 10:16*

¹¹ Tauto Paulus ineep izi Korin irau ndaman eez, kaiyo liim ve eez, ve ipatoot di pa Maaron aliija.

¹² Ighamgham tovene le sawa to Galio ingin taan suruvu to Akaia, ghero yes Yuda tilup lolodi inim ee moghon, ve tighaze tingalsekin Paulus pa savsaveen to ye ivovotia. Tovenen tighami tila ndug to gharatoon saveen, ve tipayoonda ila Galio mata, ¹³ ve tisaav pani tighaze: “Ngeu tonene ighamun tamtoghon ngar todi, ve iweu di ighaze tisun pa Maaron itaghon ataam paghu to iyel pa tutuun.”

¹⁴ Paulus ighaze isavia saveen toni, eemoghon Galio rikia moghon irab motin saveen toni, ve isaav pa yes Yuda ighaze: “Yam Yuda, aloon. Inimale ngeu tonene imalaan pa tutuun toit, ve igham sosor tiina eta, tone irau naloon gham ve itiina tagharaat saveen tiam. ¹⁵ Eemoghon aazne, yamna awazoran gham pa savsaveen pida, ve tamtoghon izadi, ve yam taumim tutuun tiam. Irau nagharaat saveen tovene ne maau. Taumim ala ve agharaata.” *Yo 18:31; Mban 23:29, 25:18+*
¹⁶ Ghero izurun di tivot tila. ¹⁷ Ival tiina tighita di, ve timundig tiki Sostenes izi ndug to gharatoon saveen tonowen, ve tirabi pataghaan. Pasa, ye to ingin yes Yuda to Korin rumai todi. Ival tiina tirabi le nagho isami, eemoghon Galio mata ila padi maau.

Paulus ighaze imuul ila pa ndug Antiok

¹⁸ Paulus ineep mala ris izi ndug Korin toman yes tonvetaz to Kriisi, ghero ikis nimadi, ve ipul di. Prisila yesuru Akwila tila tomani, le tila tivot ndug Kenkria. Tila tivot tonowe, ghero tikot Paulus

daba rau inim ghilaloon pa saveen to ye imbua toman Maaron.*

Ghoro yes tol tigham waan tighaze tiraav tila pa taan suruvu to Siria. *Nam 6:1-21; Mban 21:24*

¹⁹⁻²¹ Tiraav tila le tiloon izi ndug Epesus, ghoru Paulus ipul yesuru tizi tineep tonowe. Ye malmali iloon ila yes Yuda rumai todi, ve yesja Yuda tiwasavon di pa Maaron aliya. Yes Yuda tinguruuta tighaze ineep toman di ris. Eemoghon ye ipasul. Tovenen ikis nimadi, ve isaav padi tovene: “Ighaze Maaron lolo pa namuul, nene pale namuul nanim.” Ghoro ila iza waan, ve tipul Epesus ve tivot, ve tiraav tila pa Sisarea. *Yems 4:15*

²² Tiraav tila tiloon izi ndug Sisarea, ve Paulus malmali izala pa Yerusalem. Ila ingig lupuun to Krisi tonowe, ve yesja tisavsav ris, ghoru izila pa Antiok.

Paulus ipamundigin laghoon toni inim tol

²³ Paulus ineep mala ris izi Antiok, ghoru ipamundigin laghoon muul, ve ilaagh irau taan suruvu to Galesia ve Pirigia, ve ipapalot yes to titaghon Yesu.

Apolos ivotia Maaron aliya izi Epesus ve Korin

²⁴ Sawa tonenen, Yuda eez ila ivot ndug Epesus, iza Apolos. Ye ndug toni Aleksandria. Ye le ngar tiina, ve ye ngeu to savsaveen. Ve iwatag katin Maaron aliya to timbooda. ²⁵⁻²⁶ Ye, tipatooti pa

* **18:18:** Ngar to Paulus ighami, nene ngara tovene: Ye ighaze ighur tau inim Maaron le kat pa sawa pida. Sawa tonenen, ye irau ighun vaen maau, ve tikot daba maau le sawa tonenen isob. Ghoro tikot daba muul, ve ye igham watoonrau pa Maaron. Ngar tonene saveenja ineep ila Namba 6:1-21.

ataam to Tiina toit Yesu wa. Ve lolo ipazaagha pa votiaan Maaron aliŋa. Sawa to ipatoot tamtoghon pa Maaron aliŋa, saveeŋ toni iyel maau. Denja kat. Ye ilonjloŋ ila yes Yuda rumai todi, ve iyoon ariana pa votiaan Yesu varu. Imatughez maau. Eemoghon ataam to Yoan itaghoni pa ghamuun ya, tauto Apolos iwatagi. Ataam ite paam maau. Tovenen sawa to Prisila yesuru Akwila tilooŋa, tighami tila ruum todi, ve tipaghazonani pa ataam to Maaron, leso ighazon panii kat.

²⁷ Muri ghoru, Apolos mata inŋal ighaze irav ivool ila taan suruvu to Akaia, leso ivotia mos izi tonowe paam. Yes tonjetaz to Kriisi to tineep izi Epesus, tipaloti pa nŋar to ye ighaze ighami, ve timbood rau eez ila to yes to Akaia to titaghon Yesu. Leso sawa to Apolos ila peria todi, tighami toman lolodi poia. Tovenen Apolos ila ivot Akaia, ve iuul katin yes to Maaron igham di tighur ila to Kriisi itaghon tau poia toni. *1Kor 3:6*

²⁸ Pasa, ye iyoon ariana kat pa savaaveeŋ, ve ivovotia Maaron aliŋa to timbooda ne pughu pa tamtoghon, leso tighilaal tighaze Yesu, ye Mesia. Tauto ye itatan saveeŋ to yes Yuda ila ival tiina matadi. *Mbanj 9:22*

19

Paulus ivotia Maaron aliŋa izi ndug Epesus

¹ Sawa to Apolos inepneep izi ndug Korin, Paulus ilaghlaagh irau ndug ndug to tineep taghon lolooz. Le isob, ghoru indarir izila pa ndug Epesus. Inepneep tonowe, ve indeeŋ tamtoghon pida to titaghon Yesu. ² Ye ighason di ighaze:

“Vena, sawa to aghur ila to Yesu, yam agham Avuvu Patabuan, ma maau?”

Yes tipamuul aliña tighaze: “Maau. Avuvu Patabuan to yom usavia ne, yei niloon saveeña rita maau.” *Yo 7:39; Mban 2:38*

³ Paulus iloon saveeñ tonene, ve ighason di muul: “Ighaze venen, agham ya itaghon sa ataam?”

Yes tipamuul aliña tighaze: “Yei nigham ya itaghon ataam to Yoan ngeu rughuzaaña.” *Mk 1:4; Mban 1:5*

⁴ Paulus isaav padi muul ighaze: “Muun, Yoan irughuuz tamtoghon inim ghilaloon padi ighaze yes titoor ngar todi ve tighaze titaghon ngar paghu. Ve ye isaav padi ighaze tighur ila to ngeu to pale inim muri pani. Nene Yesu.” *Mt 3:11+*

⁵ Yes tiloon saveeñ tonene, ve rikia moghon tigham ya ila Tiina toit Yesu iza. ⁶ Ghoru Paulus ighur nima izala poghodi, ve Avuvu Patabuan izeev di tisob. Tovenen tisaav ila ndug ndug aliñadi, ve tivotia Maaron aliña tinimale propet. *Mban 2:4, 8:17, 10:44+*

⁷ Nditamoot tonowen irau saangul ve ru.

⁸ Paulus ineep izi Epesus irau kaiyo tol. Sawa tonenen, ye iloon ila yes Yuda rumai todi, ve yesña tiwasavon di pa pooz to Maaron. Ye imatughez maau. Avo iyaryaan, ve isavsaav ghazoonã padi. Pasa, ye ighaze igham di titoor ngar todi ve tighur ila to Yesu. ⁹ Eemoghon tamtoghon todi pida, ngar todi iyaryaan kat. Tauto tighur ila maau, ve tipiyaav saveeñ samsamiadi naol pa ataam to Tiina toit Yesu ila ival tiina matadi. Tovenen Paulus ipul di, ve igham yes to titaghon Yesu tila

saguan. Ve ndag to naol ne, yesja tiluplup di ila Tiranus ruum toni to ghamuun ngar, ve tiwasavon di pa Maaron aliña. *2Kor 6:14+*

¹⁰ Paulus itaghon ngar tonenen irau ndaman ru. Tauto saveen to Tiina toit ilaan irau tamtoghon tisob to taan suruvu to Asia ve tiloonja. Yes Yuda, ve Griika paam. *Kol 1:6*

Yuda pida titoova pa tindiir avuvu samsamiadi tighau pa tamtoghon ila Yesu iza

¹¹ Maaron ipatoon tapiri, ve igham mbef ghara-toonadi naol tivotvot ila Paulus nima. Mbef tonowen, tamtoghon tighita di le avodi ikaak. *Mbanj 14:3; 2Kor 12:12*

¹² Ighaze tigham mbef rita to Paulus inimale uli toni to musuun wadedeña, ma uli toni pida, ve tighuri izala yes moroghoona poghodi, nene rikia moghon tinidi popoia. Ve yes to avuvu samsamiadi tizeev di ne paam, avuvu samsamiadi tipul di, ve tighau tila. *Mk 16:17+; Mbanj 5:15-16*

¹³ Yuda pida tilaghlaagh irau ndug ndug, ve tindirndiir avuvu samsamiadi pa tamtoghon inim ledi uraat. Yes paam titoova pa tiwaat Yesu iza, leso ipalot di pa uraat to tighamghami. Tisavsaav pa avuvu samsamiadi tighaze: “Yesu to Paulus ivovotia varu ne, you nayoona ila ye iza, ve nasaav ariana payam naghaze aghau ala!” ¹⁴ Yuda eez, ye daba to watoonrau. Iza Skeva. Ndinatu nditamoot liim ve ru tighamgham tovene paam.

¹⁵ Sawa eez, titoova pa tindiir avuvu samia pa ngeu eez. Eemoghon avuvu samia tonowen ipamuul aliñadi ighaze: “Yesu, you nawatagi. Ve Paulus, nalonloon varu. Eemoghon yam sei

masin?” ¹⁶ Ghoru ngeu to avuvu samia izeeva, iyatova izala poghodi, ve irab di le naghodi isami kat, ve iwarepon nonoggiina todi paam. Pasa, tapiri ilib padi tisob. Tovenen tipul ruum lolo, ve tilaan kambañ moghon, ve tivot tila pumuri.

¹⁷ Mbeb tonenen varu ilaan irau tamtoghon tisob to Epesus. Yes Yuda ve yes Grika paam. Tovenen tamtoghon tisob ruñadi iza ve matughezaañ tiina igham di, ve tipait Tiina toit Yesu iza. ¹⁸ Ve tamtoghon katindi to tighur ila to Yesu, tinim ve tivotia ngar samsamia naol to muun tighamgham di ne, ila ival tiina matadi. ¹⁹ Yes mura katindi tinim paam toman rau todi to var ma mur saveeña ineep ila, ve tindou di ila ival tiina matadi, ve tighur yab padi. Rau tonowen, tinin atiadi le irau yaam silva 50,000.*

²⁰ Tauto saveeñ to Tiina toit Yesu ilaan irau ndug toman tapiri tiina.

²¹ Mbeb naol tonenen tivot le isob, ghoru Avuvu Patabuan ipazaagh Paulus, ve lolo ighur ighaze ilaagh irau taan suruvu to Masedonia ve Akaia. Le isob, ghoru ila pa Yerusalem. Ve mata ingal paam ighaze: “Nala navot Yerusalem, ghoru you pale nala pa Rom. [Leso navotia varu poia izi tonowe.]”

Ro 1:11+, 15:23

²² Tovenen imbaañ ulaaña toni ru, Timoti yesuru Erastus, timuun tila pa Masedonia. Ve ye tau ineep ris izi Asia.

Malmal tiina ivot izi Epesus

* **19:19:** Yaam silva 50,000, nene irau wan milion Kina ma venen.

²³ Sawa tonenen, ataam to Tiina toit Yesu inim pughu pa malmal tiina ivot izi ndug Epesus. *2Kor 1:8+*

²⁴ Ngeu eez inepneep izi Epesus, iza Demetrius. Ye ngeu to gharatoon mbeb pa silva. Yesna uraata toni tighagharaat mbeb geegeu katindi to ghi-tonjadi inimale Artemis†

rumai toni, leso tamtoghon tighol di. Uraat todi tonowen, yes tighamgham yaam tiina pani.

²⁵ Tovenen Demetrius ipoi uraata toni, toman tamtoghon pida to uraat todi ee moghon, tinim tilup di, ve isaav padi ighaze: “Aloon. Yam awatag: Uraat toit tonene, iit taghamgham katin yaam pani. ²⁶ Paulus tonowen, yam taumim aghita

ve aloon wa. Ye isavsaav ighaze ndimaronna anunudi to tamtoghon tigharaat di pa nimadi, nene Maaron tau maau. Tauto ighamun ival tiina to Epesus ngar todi, le tipul muridi pa ndimaronna toit wa. Ve iit Epesus moghon maau. Ival tiina tau tineep irau taan isob to Asia, tighur ila saveen toni wa.

Mbo 115:4; Mbanj 17:29; Syg 9:20

²⁷ Tovenen tapatum ghiit. Mala maau pale taneep ila patajani tiina lolo. Pasa, ngeu tonowen pale igham ival tiina matadi velegin uraat toit. Ve tonene moghon maau. Pale igham tamtoghon tiveleg maaron liva toit Artemis to iza tiina ne, rumai toni paam inimale mbeb sorok. Ve Artemis to aazne ival tiina to Asia ve taan tisob tisunsunj pani ne, saveen to ngeu tonowen pale itatan iza, ve tamtoghon matadi velegini tighaze ye Maaron tau maau.”

† **19:24:** Artemis, ye maaron liva to yes Epesus. Rumai toni nene tiina kat.

²⁸ Yes tiloon saveen toni tonene, le atedi yabyab kat. Tovenen tipamundigin bobaan tighaze: “Iit tamtoghon to Epesus, Maaron toit Artemis. Ye iza tiina kat!”

²⁹ Mala maau ve oroor tiina kat imundig irau ndug lolo. Yes Epesus atedi yabyab kat, ve tiparlanaad tila le tighita Gaius ve Aristarkus, ndiran ru to Masedonia to tilaghlaagh toman Paulus. Tovenen tikis di, ve tisasaar di tila pa ndug todi to lupuun. ³⁰ Paulus ighaze ivot ila ival tiina tonowen matadi paam, ve isavsaav padi. Eemoghon ndita pida to titaghon Yesu, tingalsekini tighaze ila malep. ³¹ Daba pida to Asia, nene Paulus ndita. Tovenen yes paam tisaav pani tighaze ila pa ndug to lupuun tonowen malep.

³² Ival tiina to tila tilup di, yes tiwatag oroor tonowen pughu maau. Tizeev di sorok tila toman di. Tovenen kankanon ivot padi, ve timbobob pa saveen naol naol. Pida tisaav pa mbeb eez, pida tisaav pa mbeb ite. ³³ Yes Yuda timatughez pa taudi, tovenen tisipiir tamtoghon todi eez, iza Aleksander, ila iyon ila ival tiina matadi. Leso igham avodi, ve ipaghazonan ival tiina ighaze yes Yuda tigham sosor eta maau. Eemoghon tamtoghon pida tighita, ve tighaze pa ye to ipamundigin oroor tonenen. Tovenen timbobob ila pani tighaze ipaesia oroor tonenen pughu padi. Aleksander itatan nima padi, lesa oroor imot, ve isaav. ³⁴ Eemoghon sawa to tighilaala tighaze ye Yuda, tilup avodi, ve tipamundigin bobaan muul tighaze: “Maaron to iit Epesus, nene Artemis. Ye iza tiina kat!” Tinoknok bobaan tovene le mala ris.

³⁵ Ghoru daba to Epesus to ingin uraat to bodeen

rau, imundig inaar di ighaze neneenadi, ve isaav padi ighaze: “Yam ndug tau to Epesus, aloon. Tamtoghon tisob tiwatag tighaze iit to ndug Epesus tanjin maaron Artemis to iza tiina ne rumai toni, toman anunu to itap sambam izi taan. ³⁶ Tamtoghon eta irau izoor ghiit pa mbbeb tonene maau. Tovenen lolomim ipazaagh gham rikia malep. Atemim izi, ve angabiiz poian saveen. ³⁷ Ndiran to agham di tinim ne, yes tiyub mbbeb eta ila rumai toit lolo maau. Ve tipiyaav saveen velegiin eta pa maaron liva toit Artemis maau. ³⁸ Ighaze Demitrius toman uraata toni ledi saveen pa ngeu eta, ndug to gharatoon saveen inepneep. Yes irau tila tonowe, ve yesna yes daba tigharaat saveen todi. ³⁹ Ve ighaze yam lemim saveen pida paam to aghaze asavia, yam irau ataghon tutuun toit, ve aghuri ila lupuun tiina to ndug nimadi. Leso tigharaata. ⁴⁰ Aazne, iit tasosor wa. Tovenen you namatughez. Ighaze gavman to Rom tiloon oroor tonene varu, nene pale tighita tighaze iit tagham malmal, ve tighur atia pait. Ighaze tighason ghiit pa oroor tonene pughu, pale tasaav vena? Pasa, oroor tonene le pughu maau.” ⁴¹ Ye isavsav le isob, ghoru izurun di tighau tila.

20

Paulus ila ighita yes Masedonia ve yes Grika

¹ Oroor tiina tonowen isob, ghoru Paulus ipoi yes to titaghon Yesu tinim tilup di, ve ipalot di pa savsav saveen pida. Le isob, ghoru ikis nimadi, ve imundig ila pa taan suruvu to Masedonia. ² Ilaagh

irau taan suruvu tonowen, ve ipapalot yes to titaghon Yesu, le ila ivot taan suruvu to yes Grika.*

³ Ye ineep izi tonowe irau kaiyo tol le isob, ghoru igham n̄gar ighaze igham waan, ve irav ivool ila pa taan suruvu to Siria. Eemoghon titig taliņa tighaze yes Yuda timbua saveen pa rabuunji imaat. Tovenen itoor n̄gar toni, ve imuul ila pa Masedonia.

2Kor 11:26; 1Tes

2:15+

⁴ Tamtoghon pida to yesna Paulus tila, nene Pirus natu Sopater, ye to ndug Berea, Aristarkus ve Sekundus, yesuru to ndug Tesalonika, Gaius, ye to ndug Derbe, Timoti, ve Tikikus ve Tropimus, yesuru to taan suruvu to Asia. ⁵ Yes timuun tila, ve tisaņan ghei izi ndug Troas. ⁶ Yei pida nineep izi ndug Pilipai le sawa to lupuun tiina to ghaniin mberet to le yis maau ne isob. Ghoru nizila naari, ve niza waan nila. Nineep te pogho irau mbon liim, ghoru niloon izi ndug Troas, ve nindeen nditamai liim ve ru tonowe. Yeina nineep izi Troas irau mbon liim ve ru.

Paulus ipamundigin Yutikus pa mateen

⁷⁻⁸ Wik tonenen, ndag to ivot muun, yeina nditamai to ndug Troas nilup ghei pa ghanghaniin ve sunuun iloon ila ruum eez lolo to ineep sala. Yes titun lam katindi, ve yesna Paulus tiwasavon di pa Maaron aliņa ila le mbon anona. Pasa, Paulus ighaze ndugizau, ghoru ipul di, ve ila.

⁹ Ngeu paghu eez inepneep toman di, iza Yutikus. Mbole izala marai saambu to ghamuun yaghur, ve ighurghur taliņa pa saveen. Paulus ikis

* **20:2:** Taan suruvu to yes Grika, iza ite Akaia.

saveen mala kat. Sawa to isavsaav, Yutikus igheen le lolo imaagh, ve itap pa muri. Itap ila ruum sosoor tol to sala we, le izila pumia ila taan. Tovenen rikia moghon tilaan tizila tighaze tighami. Tisuri iza, eemoghon maau. Imaat wa. ¹⁰Tovenen Paulus izila taan, itugi izi, ve isavag Yutikus, ghoru isaav padi ighaze: “Lolomim ipatanan malep. Ye mata imuul ve imundig wa.” *2King 4:32+; Mban 9:40*

¹¹ Paulus imuul izala pa ruum lolo to tinepneep pani ne, ve iteev mberet, ve yesja tighan. Isavsaav toman di le ndugizau, ghoru ipul di ve ila. *Lu 22:19*

¹² Ve ngeu paghu to imaath ve imundig muul, nene tighami tila pa ruum toni toman lolodi poia kat.

Paulus ipul ndug Troas ve ila pa Miletus

¹³ Paulus ighaze ilaagh taan. Tovenen isaav payei ighaze niza waan, ve nimuun nila nisanani izi ndug Asos le inim ivot, ghoru yeina niraav muul. Tauto yei niza waan ve niraav, ve ye ilaagh taan. ¹⁴ Ila peria izi Asos, ghoru iza tiei, ve yeina niraav nila niloon izi ndug Mitilene. ¹⁵ Nivot muul nila, ve nighaughau mbon mbon le ndugizau, ghoru matamai iloon pa mutu Kios ve malmalimai. Nighaughau mbon mbon le ndugizau muul, ghoru nivool nila mutu Samos. Nipot tonowe le ndugizau, ghoru malmalimai nila niloon taan tiina, ve nipot izi ndug Miletus. ¹⁶ Paulus ipasul ighaze rikia ila ivot Yerusalem. Leso ighita lupuun tiina to Pentekos izi tonowe. Tovenen lolo pa waan iloon ila ndug Epesus malep. Pasa, imatughez: Pale tikisi ineep mala muul izi taan suruvu to Asia.

Paulus ipalot yes nginiina to Epesus

¹⁷ Tovenen Paulus ineep izi ndug Miletus, ve imbaan ila pa lupuun to Kresi to tineep izi Epesus ighaze nginiina todi tinim toni. ¹⁸ Yes tila tivot toni, ve ye isaav padi ighaze: “Aloon. Ndag inim mata kat to you nanim navot taan suruvu to Asia, ve inim aazne, ngar to you naghamsami ila lolomim, yam aghita ve awatagi wa. ¹⁹ Sawa naol, lolog ipatanan ve natan. Pasa, sawa naol, yes Yuda tikalkaal ataam pa titatan ghou, ve tighurghur patanani naol tizaza tiou. Eemoghon you nayoon ariana pa badoon patanani, ve naghamsami ngar pa izag maau, ve nambesmbes pa Tiina toit Yesu. ²⁰ Ve yam awatag: Saveen isob to irau iuul gham, tauto nasavia payam le isob. You namatughez maau, ve nangooz saveen eta payam maau. Nasavsav ghazoonna payam ila ival tiina matadi, ve ila ruum tiam tiam paam. *Mbo 40:10*

²¹ Ve nasavsav ariana pa yes Yuda ve yes Griika paam naghaze tipul ngar todi samsamiadi, ve titoor ngar todi ila pa Maaron, ve tighur ila to Tiina toit Yesu. *Lu 24:47*

²² “Eemoghon aazne, Avuvu Patabuan ipamundigin ghou ighaze you nala pa Yerusalem. Ve nakakaan: Pale sa mbeb ivot payou izi tonowe? ²³ Eemoghon ndug tisob to nala padi, Avuvu Patabuan isavsav payou ighaze ruum to yabyabuun toman patanani naol tisaanan ghou tonowe. *Mban 9:16*

²⁴ Ve you naghita naghaze nepoon tiou to taan, nene mbeb tiina maau. Ighaze tirab ghou namaat, nene mbeb sorok. Eemoghon you irau nataghon katin ataam to Tiina toit Yesu Kresi ighuri payou le

napasobi. Ve uraat to ye tau ighuri inim nimag ne paam, naghaze napasobi le isob kat. Uraat tovene: You irau nayoon ariana ve napariaan saveen to varu poia. Leso tamtoghon tiwatag ataam to poia to Maaron izaza to iit tamtoghon samsamiaad. *2Kor 4:1; Ga 1:1; Pil 1:20; 2Tim 4:7; Syg 12:11*

²⁵ “Aghita. Muun, you naneep ila lolomim, ve navovotia pooz to Maaron payam. Ve aazne, nawatag naghaze tiam eta irau ighita naghog muul maau. ²⁶ Tovenen aazne, nasaav ghazooona payam tovene: Mbon Muri, ighaze tiam eta ilale, nene you sosor tiou maau. *Ezek 3:17+; Mban 18:6*

²⁷ Pasa, you naroron payam maau, ve nangooz saveen eta payam maau. Ngar to Maaron ighaze yam ataghoni, tauto nasavia payam le isob.

²⁸ “Matamim imosmoos pa taumim, ve angin poian Maaron sipsip toni tisob to Avuvu Patabuan ighur gham anim nginiin padi. Yam irau angin poian lupuun to Maaron. Pasa, sin to tau Natu imalin padi, ve ye igham di tinim le wa. *1Tim 4:16; 1Pe 1:18+, 5:2+; Syg 5:9*

²⁹ You nawatag. Sawa to napul gham ve nala, nene pale ndiran kaaromna pida tinim toman gham sorok, ve tiwaghamun Maaron sipsip toni tinimale ngavuun sagsag. *Mt 7:15; Yo 10:12; 2Pe 2:1*

³⁰ Ve yam taumim paam, tamtoghon tiam pida pale timundig, ve tighamun saveen to Maaron. Leso tighereb yam to aazne ataghon Yesu ne, ve apul saveen onoon ineep, ve ataghon di pa ngar toti. *1Tim 1:3+, 19+; 1Yo 2:19*

³¹ Tovenen apatum gham padi. Matamim injal ndaman tol to itina tanepneep. Sawa tonenen, you

napul gham pa savsaveen maau. Mbon ve ndag, you napatoot gham asob. Lolog payam kat, tauto nasavsaav payam toman tanjiiz. *Mk 13:37; 1Tes 2:11*

³² “Aazne, naghur gham ala Maaron tau nima, ve nasaav payam naghaze: Matamim ingal Maaron aliña to isavia poia toni to izaza to iit tamtoghon samsamiaad. Pasa, saveen tonowen irau ipalot gham, ve iseen ngar tiam. Leso yamña ndiran toni patabuanña asob agham mbeb popoia tisob to Maaron ighaze igham di pait. *Mbanj 14:23; Kol 1:12; 1Pe 1:4+*

³³ Sawa to itinja tanepneep, lolog igham pa silva, gol, ma nonogiinja to tamtoghon eta maau. *1Kor 9:15; 2Kor 2:17, 7:2; 1Tes 2:5*

³⁴ Ve taumim awatag: Taug nimag iyaryaan pa uraat. Tauto nauul taug, ve nditag to tineep toman ghou ne paam. *Mbanj 18:3; 1Kor 4:12; 2Kor 12:14+; 1Tes 2:9*

³⁵ Nagham tovene pa napatoon gham pa ataam to tagham uraat ariña. Leso leed mbeb to tauul yes to tirau uraat maau. Iit irau mataad ingal Tiina toit Yesu aliña to isaav tovene: ‘Yes to matadi rein mbeb, nene pale poia tiina to Maaron iza todi, ve lolodi poia ilib pa yes to tamtoghon tigham ledi mbeb.’” *Ep 4:28; 1Tes 4:11+; 1Tim 6:18*

³⁶ Paulus isavsaav le isob, ghoru iput aghe izi taan, ve yesña tisuñ. ³⁷ Tisuñ le isob, ghoru timundig tila tisavagi, ve yesña titan tiina. ³⁸ Pasa, aliña ris to ighaze yes irau tighita nagho muul maau, tauto igham di lolodi isami. Titan le isob, ghoru tighami tila, lesu tighuri iza waan.

21

Paulus toman ndita tigham waan tighaze tila pa Yerusalem

¹ Yeija yes nginiija to Epesus niwakisin nima-mai le isob, ghero niza waan. Tiravia keel iza, ve niraav denja nila nivot mutu Kos. Mbon ndugizau, ghero niraav muul nila nivot mutu Rodos. Ghero niraav muul nila ve niloon izi ndug Patara. ² Niloon Patara, ve nindeen waan ite to ighaze imbuti ivool pa taan suruvu to Ponia. Tovenen niza waan tonowen, ve niraav muul. ³ Nighaughau nila le matamai iloon pa mutu Saiprus. Ineep pa nimamai nas. Nipuli pa murimai, ve nighau denja pa taan tiina Siria. Nila le niloon izi ndug Tiro. Pasa, tighaze tighur mburuguan pida tizi tonowe. ⁴ Nizi nineep tonowe, ve nila nighita tamtoghon pida to ndug tonowen to titaghon Yesu. Tovenen nila nineep toman di irau mbon liim ve ru. Patanani to pale ivot pa Paulus, Avuvu Patabuan ivotia padi wa. Tovenen tighaze tinguruuta, leso izala Yerusalem sob. Eemoghon Paulus iloon alinadi maau. ⁵ Yeija nineep le sawa to waan ighaze irav muul, ghero ndiran tonowen, toman ndizwadi ve ndinatudi tisob tighur ghei. Yeija nipul paanu, ve nizila peria naari, ghero niput aghemai izala magargaar pogho, ve nisun. *Mban 20:36*

⁶ Nisun le isob, ghero niwakisin nimamai, ve niza waan, ve yes timuul tila pa paanu.

⁷ Nipul Tiro, ve niraav muul nila ve niloon izi ndug Tolemais. Yei nila ningig tonvetaz pida to Kisi to tineep tonowe, ve nineep toman di pa

mboŋ ee moghon. ⁸ Ndugizau, ghoru nipul di, ve niraav muul nila le nilooŋ izi ndug Sisarea, ve malmalimai nila ruum to Pilip. Ye ngeu to votiaan varu poia pa yes to tighur ila to Krisi maau. Ndiran liim ve ru to muuŋ tighur di pa tiuul yes mbanjoonja pa uraat pida, ye todi eez. *Mbanj 6:5, 8:5*

⁹ Ye ndinatu liva paan to tivai sone. Maaron irei tapiri padi ve tivovotia aliŋa pa tamtoghon tinimale propet.

¹⁰ Yei nineep izi ndug Sisarea mboŋ pida, ghoru ngeu eez ineep Yudea ve izi inim, iza Agabus. Ye paam ivovotia Maaron aliŋa pa tamtoghon inimale propet. ¹¹ Inim peria tiei, ghoru ipool puus to Paulus pa ngali, ve ighami ve ikau ye tau nima ve aghe pani, ve isaav ighaze: “Avuvu Patabuan isaav tovene: Ngar raraate moghon pale ivot pa puus tonene tau. Pasa, yes Yuda to tineep Yerusalem we pale tikau nima ve aghe, ve tighuri ila yes to Yuda maau ne nimadi.” *Mbanj 20:23, 21:33*

¹² Yei nilooŋ saveeŋ toni, le yeiŋa nditamai to ndug tonowen lolomai ipataŋan, ve nitaŋ ro-ran Paulus nighaze iza ila Yerusalem malep.

¹³ Eemoghon ye isaav payei ighaze: “Tanjiz tiam tonene, ngara vena? Aghaze agham ghou lolog isamin gham, leso natoor ngar tiou ve nazi naneep? Nene pale maau. You nasaŋan moghon pa badooŋ pataŋani. Ighaze nala Yerusalem ve tikau nimag ve agheg, nene tikau ghou lak! Ve ighaze namaat izi Yerusalem, ve mateeŋ tiou ipait Tiina toit Yesu iza, nene poia. Tirab ghou lak!” *Lu 9:51; Mbanj 20:24*

¹⁴ Yei nisaav ariana pani, eemoghon ilooŋ ghei

maau. Pasa, ngar toni iyaryaan ighaze ila. Tovenen nipul saveen pani, ve nisaav nighaze: “Poia. Mbeb pale ivot itaghon Tiina toit lolo.”

Paulus ila ivot Yerusalem

¹⁵ Muri ghoru, nigharaat mbeb tiei pa laghoon, ve nimundig nizala pa Yerusalem. ¹⁶ Tamtoghon pida to ndug Sisarea to titaghon Yesu, yes tilaagh toman ghei paam. Yei nila peria Yerusalem, ve tigham ghei nila ruum to Nason, ve nineep tomani. Nason, ye to mutu Saiprus. Ndiran to titaghon Yesu muun, ye todi eez.

¹⁷ Sawa to nila nivot Yerusalem, yes tonvetaz to Krisi tigham ghei toman lolodi poia. ¹⁸ Nineep mbon ndugizau, ghoru yeina Paulus nila nighita Yakobus. Ve nginiina tisob to lupuun to Krisi tinim tineep toman ghei paam. ¹⁹ Paulus igham ndag poia padi, ghoru ipaes pa mbeb tisob to Maaron igham di tivot ila ye nima, sawa to igham uraat pa yes to Yuda maau.

²⁰ Yes tiloon saveen toni, le tipait Maaron iza pa tapiri ve poia toni. Ghoru tisaav pani tighaze: “Toghamai, paesiin tiom poia. Eemoghon ughita. Yes Yuda ival le ival kat tighur ila to Yesu wa. Ve yes tisob tizuarua di tighaze le titaghon katin tutuun to Mose. ²¹ Varum inim ve tiloona wa. Pasa, ndiran pida tighamun saveen tiom tighaze yes Yuda to tineep ila yes to Yuda maau ne lolodi, yom usavsav padi ughaze tipul muridi pa tutuun to Mose. Ve tighaze yom unghalsekin di pa ngar to ziroon tamtoghon, ve ughaze titaghon iit Yuda gabuaad muul sob. *1Kor 7:18+; Ga 5:2+, 6:15*

²² Tovenen pale tagham vena, leso tarab motin saveeñ todi tonowen? Pasa, tamtoghon avaat tiloon varum tighaze yom unum wa.

²³ “Tovenen, yom irau utaghon saveeñ tiei tonene. Tamtoghon tiei paan tinepneep. Yes timbua saveeñ toman Maaron wa. ²⁴ Ugham di, ve yamña ala agharaat taumim, leso anğalaan ila Maaron mata. Ghoru uul di, ve ughol ledi mbep pida, leso tigham watoonrau pani, ve tikot dabadi.*

Ighaze ugham tovene, nene pale tamtoghon ti-sob to ndug tonene tighilaal tighaze varum to tilonjoona ne, nene kaarom, ve tiwatag tighaze yom utaghon tutuun to Mose. *Mban 18:18; 1Kor 9:20*

²⁵ “Ve ndug ndug to Yuda maau ve tighur ila to Tiina toit, nene yei nisanğoor rau ila todi wa. Rau tonowen, nipaesia saveeñ to lupuun toit imbua. Nighaze: Aniin to tipakur maaron kaaromña pani, nene tighani malep. Ve tighun ngai sinji malep. Ve mbep to ighaze tipuleel lua imaat, nene paam tighani sob. Ve tighur maat malep.” *Mban 15:29*

²⁶ Tineep mbon ndugizau, ghoru Paulus igham ndiran paan tonowen, ve yesña tila ve tipamundi-gin uraat to gharatoon taudi, leso tinğalaan ila Maaron mata. Ye iloon ila sirsiir to Rumai Tiina lolo, ve ila ighita yes ndiran to watoonrau, ve isavtaran di pa sawa sine to pale tipasob uraat to gharatoon taudi ve tigham watoonrau todi todi.

* **21:24:** Yes Yuda tighamgham tovene: Ighaze tamtoghon eta imbua saveeñ ariana toman Maaron, nene irau tikot daba maau le igham saveeñ toni anona ivot. Ghoru irab mbep pida tinim watoonrau, ve tikot daba.

Yes Yuda tikis Paulus iloonj ila sirsiir to Rumai Tiina lolo

²⁷ Uraat to gharatoonj taudi leso tingalaanj ila Maaron mata, nene ikis di irau mbonj liim ve ru. Sawa tonenen igharau ighaze isob, ve Yuda pida to tineep Asia ve tinim Yerusalem, tighita Paulus inepneep iloonj ila sirsiir to Rumai Tiina lolo. Tovenen tila tikisi, ve tipazaagh ival tiina pa tighur koi pani. ²⁸ Timboboob tighaze: “Ai, yam ndiran to Israel, anim auul ghei! Ngeu tonene to alonjloonj varu tighaze ilaghlaagh irau ndug ndug, ve ivovotia saveenj pa tamtoghon tisob, leso tiveleg ghiit toman tutuunj toit, ve Rumai Patabuanj tonene paam. Ve aazne, ye igham sosor tiina ite paam muul. Pasa, igham Grika pida tiloonj tila sirsiir to Rumai Tiina lolo. Tauto tiwaghamun ndug patabuanj tonene, ve isami ila Maaron mata wa.”

Mbanj 6:13, 24:5+

²⁹ Yes tisaav tovene pasa, muunj tighita Tropimus to ndug Epesus yesuru Paulus tilaghlaagh izi Yerusalem lolo. Tovenen tigham njar sorok tighaze Paulus ighami, ve yesuru tiloonj tila sirsiir to Rumai Tiina lolo.

Mbanj 20:4

³⁰ Tamtoghon tiloonj saveenj tonene, le yes Yerusalema tisob timundig, tiparlandaad tiloonj tila sirsiir to Rumai Tiina lolo, ve tikis Paulus ve tisasaara tivot tila pumuri. Ghoru rikia moghon tipoon ataam to rumai ila ivool. ³¹ Tizuaria di tighaze le tirabi imaas. Eemoghon saveenj ilaan ila igham daba to ingin ndaaba tisob to Rom to tinepneep izi Yerusalem, tighaze: “Yes Yerusalema tisob tineep ila malmal tiina lolo!” ³² Tovenen daba tonowen rikia moghon iyou ndaaba pida toman

daba todi, ve tilaan tizila pa ndug to malmal imundig pani. Yes Yuda tirabrab Paulus le tighita daba tonenen toman ndaaba toni tinim peria, ghoru tipuli.

³³ Daba tonenen inim ivot todi, ve isaav pa ndaaba toni ve tikis Paulus, ve tikau nima pa sen ru. Ghoru ighason yes Yuda ighaze: “Ngeu tonene sei? Ye igham sa sosor to yam arabi ne?” *Mbanj 20:23, 21:11*

³⁴ Ival tiina to tinepneep ve timboboob, tisasavia saveen naol naol. Tovenen daba tonenen irau igham saveen ghazooona eta pa malmal tonenen pughu maau. Pasa, oroor tiina matini. Tovenen isaav ila pa yes ndaaba toni ighaze tinguaaz Paulus iloon ila ruum todi lolo. ³⁵ Yes ndaaba tigham Paulus ve tila ndeet pughu, ghoru tisuri iza timbaada. Pasa, tighita tighaze ival tiina tiyaryaan tighaze le tirab Paulus imaat. ³⁶ Ival tiina titaghon di tila, ve timboboob tighaze: “Ineep malep. Arabi imaat!” *Lu 23:18,21; Mbanj 22:22*

Paulus ighaze isavsaav pa ival tiina

³⁷ Yes ndaaba tigham Paulus tighaze tiloon tila pa ruum todi lolo, ve Paulus isaav ila pa daba todi ighaze: “Vena, irau nasavsaav toman ghom ris?”

Daba tonenen ipamuul aliija ighaze: “Wai! Yom uwatag Grika alijadi? ³⁸ You naghaze pa yom Isip taamdi to wariiz moghon ipazaagh tamtoghon ndinndin paan (4000) ve tigham malmal tiina, ve ighereb di tila ndug balim. Yes ndiran popoiadi maau. Tiyonyoon ila ival tiina lolodi, ve timbutm-but tamtoghon pa buza.”

³⁹ Paulus isaav pani ighaze: “Maau, you Yuda. Ndug tiou pughu, nene Tarsus to ndug tiina eez to Silisia. You naghason ghom: Irau uyok payou ve nasavsaav ris pa ival tiina tonowen?”

⁴⁰ Daba tonenen iyok pani, tovenen Paulus imundig iyoon izala ndeet, ve itatan nima padi. Leso oroor imot, ve isavia saveenj toni. Ival tiina tighita le neneenjadi. Ghoru Paulus ipamundigin saveenj toni ila taudi aliñadi Hibru.

22

Paulus ivotia pughu to ye ighur ila to Yesu

¹ Paulus isaav padi ighaze: “Yam nditamanj ve tonjetaz tiou, aghur talinamim payou. You naghaze nasavia pughu to nataghton ataam paghu tonene. Leso aghilaal aghaze you naghama sosor eta maau.”

² Yes tiloonj Paulus isaav padi ila taudi aliñadi Hibru, le neneenjadi kat.

³ Paulus isaav muul ighaze: “You Yuda. Tipoop ghou izi ndug Tarsus to ineep taan suruvu to Silisia. Sawa to you pain, tigham ghou nanim to sualen. Naneep izi ndug tonene le nanim olman. Tutuunj to nditimbuud, olman Gamaliel ipatoot ghou pani le isob. Ve you nazuaria ghou naghaze le nataghton katin njar isob to Maaron lolo pani, raraate inimale aazne yam asob azuaria gham pa taghoniñi. *Ga 1:13+; Pil 3:5+*

⁴ Yes to titaghton ataam paghu tonene, muunj you naghurghur patañani padi. You naghama samin di kat, le tamtothon todi pida timaat. Ve pida, nakis di ve naghur di tiloonj tila ruum to yabyabuun. Yes

nditamoot, ve ndiliva paam. *Mban 8:3; 1Kor 15:9; 1Tim 1:13*

⁵ Daba to watoonrau toman nginiina tisob to tineep ila lupuun tiina to pooza toit, yes tiwatag ngar to muun naghamsami. Yes irau tipariaan saveen tiou tonene. Sawa eez, you naghaze nakis yes to titaghon ataam paghu tonene izi ndug Damaskus, ve naghams di tinim Yerusalem, lesotighur yabyabuun padi. Tovenen naghason yes daba toit, ve timbood saveen yokiin payou ila rau pida. Leso naghams di nala, ve napatoon di pa yes tonvetaz toit to tineep izi Damaskus, ve tiwatag tighaze you izag pa uraat tovene.

*Paulus isavia sawa to Yesu ivot toni
(Mban 9:1-18, 26:9-18)*

⁶ “Tovenen namundig ve nala. Nalaagh nala le nagharau ndug Damaskus. Ndag iza inim bodaan ma venen. Mala maau ve nguruba tiina kat ineep sambam ve izi inim isul luvutin ghou.

⁷ Tovenen natap nazi taan, ve naloon saveen inim payou. Isaav payou ighaze: ‘Saul, Saul, pughu vena to unoknok ghuruun patanani payou?’

⁸ You napamuul alina naghaze: ‘Tiina, yom sei?’

Ve ye isaav payou ighaze: ‘You Yesu to Nasaret. You to yom ughurghur patanani payou ne.’ *1Kor 15:8-9; Ga 1:15-16*

⁹ Nditag to yeina nilaagh, tighita nguruba tonowen paam. Eemoghon tiloon ngeu to isavsav payou ne alina maau.

¹⁰ “You naghasoni naghaze: ‘Tiina, ughaze naghams vena?’

Ye ipamuul alinag ighaze: ‘Umundig ve uloon ula ndug Damaskus. Ghorotipaes payom pa uraat

tisob to naghaze naghur di tilat nimam.’ ¹¹ Nguruba tonenen isul tiina kat le igham matag ipis. Tovenen nditag tinim tikis nimag, ve tinjal mboig, ve niloon nila ndug Damaskus.

¹² “Ndug tonowen, ngeu eez inepneep, iza Ananias. Ye mata injalngal Maaron, ve izuarua tau ighaze le itaghon katin tutuun toni. Tovenen Yuda tisob to ndug Damaskus tipapait iza tighaze ye ngeu poia eez. ¹³ Ye inarua ghou inim, iyoon digeg, ve isaav payou ighaze: ‘Tazig Saul, matam poia ve ughita ndug!’ Sawa tonenen kat, matag poia, ve naghita Ananias iyondyood. ¹⁴ Ghoru isaav payou ighaze: ‘Maaron to nditimbuid, ye tau isia ghom wa. Leso igham ghom ughazoon pa lolo ve ngar toni. Tauto ughita katin Ngeu To Ngar Denja,* ve uloon saveen ila ye tau avo. *Ga 1:12+; Ep 3:2+*

¹⁵ Mbeb to uloona ve ughita pa taum matam, yom irau usavia irau ndug tisob. Leso upariaan Yesu saveen toni, ve tamtoghon tighur ila toni. *Mbanj 23:11, 26:16*

¹⁶ Tovenen usaan sa muul? Umundig to aazne, ugham ya, ve ughason Yesu pa iuul ghom. Leso ireu sosor tiom ilale, ve igham ghom ungalaa ila Maaron mata.’ *Ro 10:13; 1Pe 3:21*

Maaron imbaan Paulus ighaze ila payes to Yuda maau

¹⁷ “Muri ghoru, namuul nanim Yerusalem, ve nanepneep to sualen le sawa eez, naloon nala sirsiir to Rumai Tiina lolo, ve nasun. Nasunsun ila, le tandagiin eez ivot payou. ¹⁸ Naghita Yesu isaav payou ighaze: ‘Umundig rikia moghon, upul

* **22:14:** Ngeu To Ngar Denja, nene Yesu.

Yerusalem, ve ughau. Pasa ighaze yom upariaan saveen tiou izi sualen, yes irau tiloon ghom maau.’

¹⁹ “You nasaav pani naghaze: ‘Tiina, tamtoghon to ndug tonene tiwatag tighaze: Muun, you nalaghlaagh irau rumai todi, ve naghurghur yes to tighur ilat tiom tiloon tila ruum to yabyabuun, ve naloslos di. ²⁰ Ve sawa to Stepanus ivotia saveen tiom, ve tirabi imaat, you nayok pa ngar tonenen. Tauto nayoon toman yes to tirabi, ve nanjin nonogiina todi to monjeaan.’ *Mbanj 7:58, 8:1*

²¹ “Eemoghon Tiina tiou isaav payou ighaze: ‘Umundig ve ula. You naghaze nambaan ghom ula pa ndug mala. Leso ugham uraat pa yes to Yuda maau.’ ” *Mbanj 9:15, 26:17+; 1Tim 2:7*

Paulus ipaes pa yes ndaaba ighaze ye tamtoghon to Rom

²² Ival tiina tighur talinadi pa Paulus ila ila le tiloon alina ighaze Maaron imbaana ila to yes to Yuda maau. Ghoru timboob muul tighaze: “Ah, arabi imaat ila! Ineep ne, ye poia eta? Tamtoghon tovene ineep malep!” *Mbanj 21:36*

²³ Yes timboboob, ve tiduduum nonogiina todi to monjeaan, ve tisuruuv di tizi, ghoru tikor taan, ve tisuruuva izaza.†

²⁴ Tovenen tiina to yes ndaaba isaav pa ndaaba toni ighaze tigham Paulus ve tiloon tila ruum todi lolo, ghoru tiloslosi le irau ivotia pughu vena to ival tiina atedi yabyab kat ve timboboob pani tovene.

† **22:23:** Ighaze yes Yuda tiloon saveen eta to irau lolodi maau kat, nene tigham tovene.

²⁵ Tovenen tiloon tila ve tipagheena izi, ve tikau nima ila ai, leso tilosi. Eemoghon Paulus ighason daba to yes ndaaba to iyoon igharau ighaze: “Vena, ighaze tamtoghon eta, ye to Rom, ve yes daba titiir saveen toni sone ve yam alos sorokini, pale denja pa tutuun to Rom?” *Mbanj 16:37*

²⁶ Daba tonowen iloon saveen tonene, ve ila ipaes pa daba todi to ingin ndaaba tisob ighaze: “Uyamaan ghiit wa? Pasa, ngeu tonowen, ye to Rom. Pale ugham sa ngar pani?”

²⁷ Daba tonenen iloon paesiin toni, ghoru ye tau ila ighason Paulus ighaze: “Ai, usaav ghazoonja payou. Onoon kat, yom to Rom?”

Paulus ipamuul aliija ighaze: “Vee. You to Rom.”

²⁸ Daba tonenen isaav pani ighaze: “You napul yaam tiina kat, tauto nanim tamtoghon to Rom.”[‡]

Paulus isaav pani muul ighaze: “Nanan yom. Ve you napul yaam eta maau. Pasa, sawa to tipoop ghou, you to Rom.”

²⁹ Yes ndaaba to tighaze tilos Paulus tiloon saveen tonene, ve rikia moghon tipuli. Ve daba todi paam imatughez pa tau. Pasa, Paulus, ye tamtoghon to Rom. Eemoghon daba tonenen isaav ve tikau nima ve aghe sorok.

[‡] **22:28:** Tamtoghon ledi ataam naol pa tinim tamtoghon (o sitisen) to Rom. Ighaze ngeu eta, ye to Rom, nene pale ndinatu paam to Rom. Ve ighaze tamtoghon eta, ye to Rom maau, eemoghon kinik to Rom lolo poia pani ve ighaze igham poiani, nene irau ighami inim tamtoghon to Rom. Ndiran pida tighol yaam tiina pa gavman to Rom, leso tinim tamtoghon to Rom. Gavman to Rom irau tighur patanjani pa tamtoghon to Rom inimale tighamgham pa tamtoghon pida ne maau. Ve yes irau tingin poian di.

Tipayoon Paulus ila lupuun to yes pooza to tinjin yes Yuda ne matadi

³⁰ Daba to injin ndaaba tisob, ye ighaze iwatag kat: Paulus igham sa ngar to yes Yuda tighita tighaze isosor. Leso ighazoon pa saveen toni pughu. Tovenen tineep mbon ndugizau, ghoru isaav ve tipool sen to tikau Paulus pani, ve imbaan ila pa yes daba to watoonrau toman pooza tisob to yes Yuda ve tinim tilup di. Ghoru igham Paulus inim, ve ipayoonda ila matadi.

23

Paulus isavia pughu to ye itaghon Yesu

¹ Paulus mata denja pa yes daba to tineep ila lupuun tonowen, ve isaav padi ighaze: “Yam tonvetaz, you nayamaan taug naghaze to muun ve inim aazne, laghoon tiou, you nataghon ngar ngalaanja moghon ila Maaron mata.” *Mban 24:16; 2Kor 1:12; 2Tim 1:3*

² Daba to watoonrau, iza Ananias, iloon saveen tonene, ve isaav pa yes to tiyoon tigharau Paulus, ve tipambar Paulus avo. *Yo 18:22+*

³ Tovenen Paulus isaav pani ighaze: “Yom, Maaron pale irab ghom paam! Yom unumale didiin mbuuzo to tikumi pa ko, lesu tamtoghon tighita tighaze poia. Mbolem izi tonanan pa ungabiiz ghou itaghon tutuun toit. Eemoghon taum umalaan pa tutuun wa. Pasa, usaav padi ve tipambar sorokin ghou.” *Lo 25:1+; Mt 23:27+*

⁴ Tamtoghon pida to tiyoon tigharau Paulus, tisaav pani tighaze: “Wai, daba to watoonrau, ye

uraata to Maaron. Vena to uroron pani maau, ve uvelegi?”

⁵ Paulus ipamuul aliñadi ighaze: “Yam tonvetaz, you naghilaala naghaze ye daba to watoonrau maau. Inimale naghilaala, tone irau napiyaav saveen tovene pani maau. Pasa, Maaron aliña to timbooda, isaav ighaze:

‘Apiyaav saveen samia pa daba tiam eta malep.’ ” *Igham 22:28*

⁶ Paulus iwatag: Yes to tineep ila lupuun tone-nen, pida nene yes Sadusi, ve pida nene ndiran tutuunja. Tovenen isaav padi toman aliña tiina ighaze: “Yam tonvetaz, aloonj. You tonene, ngeu tutuunja eez paam. Ve taman yesuru tinañ, ve nditimbug paam, yes ndiran tutuunja. You naghur matag pa mundigiin to yes mateenja, tauto aazne tipayoon ghou pa savsaveen.” *Mbanj 24:21, 26:5+; Pil 3:5*

⁷⁻⁸ Paulus ipiyaav saveen tonene, le ireu di ve parzoraan tiina imundig ila lolodi. Pasa, yes Sadusi tighur ila tighaze yes mateenja irau timundig muul maau. Ve tighaze anjela eta ineep maau, ve avuvu eta ineep maau. Eemoghon yes ndiran tutuunja tighur ila mbeb tisob tonenen.

⁹ Tovenen oroor tiina imundig, ve tiwazoran di ila ila le tamtoghon ngara pida to yes ndiran tutuunja timundig tiyoon, ve tisaav ariana tighaze: “Yei nighita nighaze ngeu tonene, ye igham sosor eta maau. Takankaan. Avaat avuvu eta, ma anjela eta isavsaav pani.”

¹⁰ Daba to ingin ndaaba tisob to Rom, ighita saveen todi iparab kat. Tovenen imatughez: Ighaze tiwasasaron Paulus ila inim, nene pale

tireepa ve imaat. Tovenen isaav pa ndaaba toni, ve tila tinjuaaz Paulus ighau pa yes daba tonenen, ve tighami tilooŋ tila ruum todi lolo muul.

¹¹ Mboŋ tonenen, Tiina toit Yesu ivot to Paulus, ve iyoon igharai, ve isaav pani ighaze: “Paulus, umatughez malep. Uyoon ariana. Pasa, varug to uvotia izi Yerusalem, yom pale uvotia izi Rom paam.”

Mbanj 18:9, 27:23+

Yes Yuda timbua saveeŋ tighaze tirab Paulus imaat

¹² Tineep le ndugizau, ghero Yuda pida tilup di, ve tikaal ataam pa tirab Paulus imaat. Yes timbua saveeŋ ariana ila Maaron mata tighaze yes irau tighan aniiŋ maau, ve tighun ya maau, le irau tirab Paulus imaat. ¹³ Ndiran to timbua saveeŋ pa rabuun Paulus, yes irau tamoot ru avua.

¹⁴ Tovenen timundig tila to yes daba to watoonrau ve yes nginiina, ve tipaesia ngar todi padi tighaze: “Yei tonene nimbua saveeŋ ariana ila Maaron mata wa. Nighaze aazne ve ila, avomai irau itut aniiŋ eta maau, le irau nirab Paulus imaat.

¹⁵ Tovenen yamŋa daba toit pida ala to daba to inŋin yes ndaaba to Rom, ve atombaana tovene aghaze: ‘Yei nighaze ugham Paulus izi inim tiei. Leso nighason poiani pa saveeŋ toni pughu, ve nighazooŋ pani kat.’ Yam agham tovene, ve yei pale nisaŋani izi ataam luvuŋa. Sawa to inim peria tiei, ghero nirabi imaat. Leso ilat ivot tiam sob.”

¹⁶ Eemoghon Paulus waga taliŋa irab saveeŋ mbuaaŋ todi tonowen. Tovenen ila ivot ruum to yes ndaaba, ve ilooŋ ila ighita waga, ve ipaesia saveeŋ tonenen pani. ¹⁷ Paulus ilooŋ saveeŋ toni,

ve imbaan ila pa daba eez to yes ndaaba inim, ve isaav pani ighaze: “Ugham pain tonene ila to daba tiam to ingin yam ndaaba asob. Pasa, ye le saveen ris pani.” ¹⁸ Tovenen daba tonowen igham Paulus wagha ila to daba toni, ve isaav pani ighaze: “Paulus to nikisi inepneep toman ghei ne, imbaan payou, tauto nala toni. Ve ighason ghou ighaze naghama pain tonene inim ighita ghom. Pasa, ye le saveen ris payom.”

¹⁹ Tovenen daba toni ikis Paulus wagha nima, ve yesuru tila dige, ghoru ighasoni ighaze: “Yo, sa saveen to ughaze usavia payou ne?”

²⁰ Paulus wagha isaav pani ighaze: “Yes Yuda timbua saveen tighaze tinim tighason ghom, leso bozo, ghoru ugham Paulus, ve yamru azila pa daba to yes Yuda lupun todi. Sawa to tinim, yes pale tigham kaarom payom tighaze ye tau irau ila todi, leso tighason poianni pa saveen toni ve tighazon pa pughu.” ²¹ Eemoghon uloon di malep. Pasa, tamtooghon todi irau tamoot ru avua pale tisaan pa rabuunni izi ataam luvuna. Yes timbua saveen ariana ila Maaron mata tighaze yes irau tighan aniin maau, ve tighun ya maau, le irau tirab Paulus imaati. Yes tighurghur matadi payom ve tisaan. Ighaze uloon di, nene pale tigham ngar tonenen.”

²² Daba tonenen iloon saveen toni, ve ingalsekini ighaze: “Saveen to yom usavia payou ne, upaesia pa ngeu ite paam malep.” Isavsaav pani le isob, ghoru ipuli ila.

Yes Roma tipaghau Paulus izila pa ndug Sisarea

23-24 Daba tonenen ipoi daba ru to yes ndaaba tinim, ve isaav padi ighaze: “Ala ayou yes ndaaba irau 200, toman ndaaba tamoot tol saangul (70) to tilaan pa hos. Ve agham yes ndaaba to kisiin iiz paam irau 200. Ve agharaat hos pida pa Paulus paam. Mbonj aazne, ndag anunu ighaze igham liim ve paan, ghero agham Paulus, ve yamja amundig azila pa ndug Sisarea. Angin poiani le ila ivot to gavana toit Feliks.” ²⁵ Isavsaav toman di le isob, ghero imbood paesiin ila rau tovene:

²⁶ “O gavana Feliks, tiina tiou. You Klodias Lisius naghagham ndag poia payom.

²⁷ “Ngeu to ilat ne, yes Yuda tikisi ve rismoghon tone tirabi imaat. Eemoghon you naloon tighaze ye to Rom, tovenen nala toman ndaaba tiou, ve ningham mulini ve ninguaaza padi. *Mbanj 21:30+*

²⁸ You naghaze nawatag: Ye igham sa ngar to Yuda tighita tighaze isosor. Tovenen naghami ila, ve napayoonda ila daba to yes Yuda matadi. ²⁹ You naneep, ve naloon saveenj todi iparab ila inim, ve naghita naghaze ye igham sosor tiina eta irau to taghuri iloonj ila ruum to yabyabuun, ma tarabi imaat ne maau. Yes tiwazoran di pa taudi tutuunj todi moghon. *Lu 23:14+; Mbanj 18:14+, 25:25, 26:31*

³⁰ Muri ghero, tipaes payou tighaze Yuda pida tigham lilini tighaze tirabi imaat. Tauto rikia moghon napaghaua ilat. Leso anam utiir saveenj toni. Ve nasaav pa yes to tighaze tipayoonda pa savaaveenj naghaze tizilat tiom tonanan, ghero tivotia sosor toni ila matam. Yo, saveenj tiou, tauto inim imuul sualen. Uneep toman lolom poia.”

³¹ Tovenen mbonj tonenen, yes ndaaba titaghon saveenj to tiina todi, ve tigham Paulus ve yesja tila tivot ndug Antipatris. ³² Tineep tonowe le ndugizau, ghoru yes ndaaba to tilaagh taan, timuul tila pa inadi to Yerusalem we. ³³ Ve yes to tilaan pa hos, tigham Paulus ve malmalidi tila tivot ndug Sisarea. Tila peria, ghoru tizuzuun rau to Klodias ila to gavana Feliks, ve tighur Paulus ila nima. ³⁴ Feliks iwaat rau to Klodias imbooda le isob, ghoru ighason Paulus ighaze: “Ndug tiom ineep taan suruvu sine?”

Paulus ipaes pani ighaze “You nanim pa taan suruvu to Silisia.”

³⁵ Feliks isaav pani ighaze: “Poia. Uneep le yes to tighaze tipayoon ghom pa savsaveenj tinim tivot, ghoru naloonj saveenj tiam.” Ghoru isaav pa ndaaba pida ighaze tigham Paulus tila ruum tiina to muunj Erod ireii, ve tingini tonowe.

24

Yes Yuda tipayoon Paulus pa savsaveenj ila Feliks mata

¹ Mbonj liim inim ila, ghoru Ananias to daba to watoonjrau, yesja nginiinj pa pida to yes Yuda tizila pa Sisarea, pa tighaze tipayoon Paulus pa savsaveenj ila gavana Feliks mata. Ngeu ngara eez to iwatag katin tutuunj to Rom, ye ilaagh toman di paam, leso igham avodi ve iuul di pa savsaveenj. Iza Tertulus. ²⁻³ Tovenen timbaanj pa Paulus iloonj inim, ghoru Tertulus ipamundigin saveenj toni ighaze:

“O tiina tiei Feliks, yei lolomai poia kat payom. Pasa, nginiinj tiom, nene poia kat. Mbeb naol to muunj tisami, yom ugharaat di wa. Tovenen sawa

mala to ungin ghei, nepoon tiei poia kat. Tauto yei nisob irau ndug ndug lolomai poia payom ve nipapait ghom. ⁴ Eemoghon irau naseen saveen tiou ila mala kat maau. Pale uyasiil pa alinag. Yom ngeu poiam. Tovenen naghason ghom: Irau uloon saveen tiei tuku tonene?

⁵ “Yei nighita ngeu tonene nighaze ngar toni poia maau. Ye inimale moroghoon samia. Pasa, ipapamundigin parzoraan ve malmal tintina ila yes Yuda lolodi irau ndug tisob. Yom uwatag: Yes to titaghon Yesu to Nasaret ne, tipaghau taudi tila sagan pa yes Yuda, ve tipamundigin lupuun paghu wa. Tauto yes ival tirere padi. Ve ngeu tonene, ye imunmuun pa lupuun todi. *Mban* 16:20, 17:6, 21:28

⁶ Ve itoova pa iwaghamun Rumai Tiina paam, leso ighami isami ila Maaron mata. Tauto nikisi. Yei nighaze taumai nipayoonda ve nitiir saveen toni. ⁷ Eemoghon Lisius to ingin ndaaba tisob to Yerusalem, ye inim ireu ghei, ve isadi ila nimamai, ve inguaaza ila. Ghoru isaav payei ighaze ninim nighita ghom, ve nisaav ghazoonja payom pa sosor toni. ⁸ Tovenen poia pa taum ughason poian ngeu tonene pa saveen toni. Leso ughilaal ughaze saveen isob to nisavia pa sosor toni, nene onoon moghon.”

⁹ Tertulus isavia saveen tonene le isob, ghoru Yuda pida anadi timundig ve tipariaan saveen toni tighaze saveen isob to ye isavia, nene onoon moghon.

Paulus ipoon tau pa savaaveen ila Feliks mata

¹⁰ Ghoru Feliks ipatoon nima ila pa Paulus, lesu ana isaav. Tovenen Paulus ipamundigin saveen toni ighaze:

“O gavana Feliks, you nawatag: Ndaman ndaman to yom ukaria gharatoon yei Yuda saveen tiei wa. Tovenen lolog poia pa nayoon ila matam, ve navotia taug. Leso uwatag ughaze you naghamsosor eta maau. ¹¹ Saveen tonene, patajani maau. Ighaze ughason tamtoghon pani, nene pale tisaav payom tovene: Wariiz moghon, mbon saangul ve ru to ila wa, you nazala pa Yerusalem pa sunuuj. ¹² Yeru tamtoghon eta niparזור iloon ila sirsir to Rumai Tiina lolo maau. Ve napazaagh tamtoghon pa mbeb eta iloon ila yes Yuda rumai todi, ma ila ndug tiina lolo, nene paam maau. Yes to aazne tingal saveen poyou ne, todi eta ighita ghou naghamsosor tovene maau. ¹³ Tovenen saveen ngaliinj todi to injarua ghou, nene taudi tisaav. Eemoghon ledi mbeb eta to ipalot saveen todi ve ipatoona ighaze nene onoon ne maau. Tisaav sorok.

¹⁴ “Eemoghon saveen todi waaro eez, nene you nayok pani. You nasaav ghazoonja payom: You nambesmbes pa Maaron to nditimbumai itaghon ataam to Krisi to yes tirere pani. Eemoghon ngar isob to itaghon tutuuj to Mose, toman saveen isob to ineep ila rau to yes propeta, nene you naghur ila. *Mbanj 26:22, 28:23; 2Tim 1:3*

¹⁵ Yeija yes ndiran tonene, ngar tiei ee moghon. Pasa, nisob nighur matamai pa sawa to Maaron pale ipamundigin yes mateenja. Yes ndiran denjadi, ve yes samsamiadi paam. *Yo 5:28+; Mbanj 23:6, 26:6+; 2Kor 5:10*

¹⁶ Tauto sawa isob, you nazuaria ghou naghaze le lolog toman ngar tiou isob ingalaan moghon ila Maaron mata, ve tamtoghon matadi paam. *Mban 23:1; 2Kor 1:12; 2Tim 1:3*

¹⁷ “You nala naneep irau ndug ndug pa ndaman pida wa. Tauto namuul nanim taug ndug tiou, leso naghita tamtoghon tiou, ve naghur ulaan pida ila pa yes mbolaana. Ve naghaze naghham watoonrau pida pa Maaron paam. *Ro 15:25+; 2Kor 8:1+; Ga 2:10*

¹⁸ You naghaze naghham uraat pa mbeb tonenen, tauto naloon nala sirsiir to Rumai Tiina lolo. Sawa to tighita ghou izi tonowe, you nagharaat taug ve nangalaan ila Maaron mata wa. Ve ival tineep toman ghou maau, ve napamundigin oroor maau. *Mban 21:26+*

¹⁹ Eemoghon Yuda pida to tineep taan suruvu to Asia ve tinim, yes tighita ghou ve tipamundigin patajani tonene. Tauto ighaze ndiran tonowen tighita tighaze you naghham sosor eta, ghoru poia pa taudi tinim tiyoon ila matam, ve tisavia payom.

²⁰ Ve ighaze maau, nene yes to yeina niyondyood ne, taudi irau tisaav ghazoonja payom: Sawa to tipayoon ghou pa savsaveen ila daba to yes Yuda lupuun todi, tindeen sa sosor kat to you naghami? ²¹ Avaat saveen tiou waaro eez to ireu lolodi. Sawa to nayondyood ila lolodi, namboob naghaze: ‘You naghur matag pa mundigiin to yes mateena, tauto aazne tipayoon ghou pa savsaveen ila matamim!’ ” *Mban 23:6+*

²² Feliks, ye ighazoon kat pa ngar to yes to titaghon ataam to Yesu. Tovenen Paulus isavsaav le isob, ghoru Feliks irab motin saveen todi ighaze:

“Poia. Saveen imuul tovene, ve tasaan Lisius to daba to yes ndaaba to Yerusalem. Tau izi inim, ghero nangabiiz saveen tiam, ve nagharaata.”

²³ Ghero isaav pa daba to yes ndaaba ighaze ighur Paulus iloon ila ruum to yabyabuun ve ingin poiani. Eemoghon ighur pataani pani malep, ve ipuli ilaagh ve ineep sorok ila ruum to yabyabuun lolo. Ve ighaze Paulus ndita tinim ve tighaze tiuuli pa aniin ma mbeb pida, nene ingalsekin di malep. *Mt 25:36; Mbanj 27:3; Hib 10:24*

Paulus ipaghazonan Feliks pa ataam to Yesu

²⁴ Mbon pida inim ila, ghero Feliks yesuru azuwa Drusila tinim. Drusila, ye Yuda tidi. Feliks imbaan ila pa Paulus ighaze inim ve yesna ti-savsaav. Paulus inim ivot todi, ve avo ila pa ataam to taghur ila to Yesu Kresi, ve yesuru tilonloona.

²⁵ Paulus ipaghazonan Feliks pa ngar denja, ngar to nginiin tauud pooi, ve gabizoon ve ghuruun atia to pale ivot pa Mbon Muri. Feliks iloon saveen tonenen le imatughez. Tovenen irab motin saveen ighaze: “Poia. Imuul to sualen. Umuul ula, ve naghita sawa poia eta, ghero nambaan payom umuul unum, ve tawasavon ghiit muul.” ²⁶ Feliks ighur mata ighaze Paulus igham le yaam pida inim gholiinj, leso ipuli ila. Tovenen sawa naol, imbanbaan pani inimmim, ve yesuru tisavsaav.

²⁷ Ndaman ru isob, ghero Feliks isob pa uraat, ve Porsius Festus igham ina. Feliks ighaze igham yes Yuda lolodi poia, tovenen ipul Paulus ineep ila ruum to yabyabuun lolo.

25

Paulus iyoona ila Festus mata

¹ Festus to gavana paghu to Yudea, ila ivot ndug Sisarea, ve ipamundigin uraat toni. Ineep tonowe irau mbonjol, ghoroz izala pa Yerusalema.

² Yes daba to watoonraa yesna ndolmana pida to Yuda tila to Festus, ve tijaal saveen naol pa Paulus, ve tighason Festus ariana tighaze: ³“Vena, irau uul ghei, ve ugham Paulus imuul iza inim Yerusalema?” Tighasoni tovene pasa, yes timbua saveen tighaze tirabi imaati izi ataam luvuna.

⁴ Eemoghon Festus ipamuul aliñadi ighaze: “Paulus, tikisi ineep izi ndug Sisarea. Ve you, mala maau pale nazila. ⁵ Ighaze yam aghita aghaze ye igham sosor, ghoroz daba tiam pida timundig toman ghou, ve yeina nizila. Leso tipayoonda pa savaaveen izi tonowe.”

⁶ Festus ineep toman yes Yuda izi Yerusalema irau mbonjol liim ve tol ma saangul ma venen, ghoroz imundig ve imuul izila ndug Sisarea. Mbonjol ndugizau, ghoroz ila mbole izi ila ndug to ghara-ton saveen, ve imbaan ila ighaze tigham Paulus inim. ⁷ Paulus inim ivot, ghoroz yes Yuda to tineep Yerusalema ve tizi tinim, tiyoona luvutini, ve tijaal saveen naol pani. Tighaze ye ighamgham ngar samsamia kat. Eemoghon ledi mbeb eta to ipalot saveen todi ve ipatoona ighaze nene onoon ne maau. Tisaav sorok.

⁸ Tisavsaav le isob, ghoroz Paulus ana ipamuul saveen todi ighaze: “You namalaan pa tutuun eta to yes Yuda maau, ve naghama sosor eta pa Rumai

Tiina maau. Ve kinik tiina to Rom paam, naghamsosor eta pani maau.” *Mbanj 24:12, 28:17*

⁹ Festus ighaze igham yes Yuda lolodi poia. Tovenen ighason Paulus ighaze: “Vena, irau uzala Yerusalem, ve naloon saveen tonene muul izi tonowe?”

¹⁰ Eemoghon Paulus ipamuul aliņa ighaze: “Maau. Yom to kinik tiina to Rom ighur ghom pa uraat to gharatoon saveen. Tauto aazne, nayoon ila matam izi ndug tonene, leso ugharaat saveen tiou. Ve yom uwatag wa: You naghamsosor eta pa yes Yuda maau. ¹¹ Eemoghon ighaze ughita ghou ighaze naghamsosor tiina eta irau to namaat pani, ghorourab ghou namaat! You namatughez pa atia tiou maau. Eemoghon ighaze saveen ngaliin to tigham payou ne onoon maau, nene ngeu eta irau ighur ghou nala nimadi ne maau. Poia. Venen, you naghaze nala naghita kinik tiina to Rom, leso iloon saveen tiou.”

¹² Festus iloon saveen tonene, ve yesņa ndiran ngara toni pida tiwasavon di pani. Le isob, ghor isaav pa Paulus ighaze: “Yom ighaze kinik tiina to Rom iloon saveen tiom. Poia. Pale ula ughita.”

Festus ipaesia Paulus saveen toni pa Kinik Agripa

¹³ Festus, ye gavana paghu. Tovenen mbon pida inim ila, ghor kinik Agripa yesuru livu Benis tila tivot Sisarea tighaze tighita. ¹⁴ Yesuru tineep mala ris izi Sisarea, tovenen Festus ipaesia Paulus saveen toni pa Agripa ighaze: “Ngeu eez, Feliks ighuri iloon ila ruum to yabyabuun ve inepneep sone. Iza Paulus. ¹⁵ Sawa to nazala Yerusalem, yes

daba to watoonrau toman yes nginiina to yes Yuda tinim tighita ghou, ve tingal saveen naol pani. Ve tighason ghou ariana tighaze natiir saveen toni, ve naghur atia pani. ¹⁶ Eemoghon you napa-muul alinadi naghaze: ‘Yei Roma gabuamai tovene maau. Irau nighur tamtoghon eta ila koia nimadi sorok ne maau. Ighaze tamtoghon pida tingal saveen pa ngeu eta, ye yesna yes to tingal saveen pani, irau tilup di ila ndug ee moghon, ve nighur soso pa ngeu tonenen, leso ipoon tau pa saveen todi.’

¹⁷ “Nasaav padi tovene, ve muri ghoru, yeina ndiran tonowen nizi ninim Sisarea. Ninim nivot ve nanamnaam maau. Mbon ndugizau, ghoru yeina nila ve mbolegi izi ila inag to gharatoon saveen, ve nambaan ila pa Paulus ve inim. ¹⁸ Yes to tipayoonda pa savsaveen, timundig tiyoon ve tivotia sosor toni. You naghaze pa tisavia sosor tiina eta. ¹⁹ Eemoghon maau. Yesna tiwazoran di pa sunuun todi ngara, ve ngeu eez to imaat ila wa, iza Yesu. Paulus isaav ariana ighaze ngeu tonowen ineep mata iyaryaar. ²⁰ Naloon saveen todi le nakankaan. Nagham ngar naghaze: ‘Pale naghazoon pa saveen tonene pughu vena?’ Tovenen naghason Paulus naghaze: ‘Vena, irau uzala Yerusalem, ve naloon saveen tonene muul izi tonowe?’ ²¹ Eemoghon ye iyok maau. Ighason ghou ariana ighaze ila Rom, ve kinik tiina itiir saveen toni. Ve ighason paam ighaze yes ndaaba tingin poiani le ila ivot tonowe. Tovenen you nasaav pa yes ndaaba naghaze tikisi ineep to sualen le irau nandeen ataam eta, ghoru naghuri ila to kinik tiina to Rom.”

²² Kinik Agripa iloon saveen tonene, ve isaav pa Festus ighaze: “You naghaze taug naloon ngeu tonowen saveen toni paam.”

Festus isaav pani ighaze: “Poia. Bozo, ghoru uloona.”

Paulus iyoona ila kinik Agripa mata

²³ Mbon ndugizau, ghoru kinik Agripa yesuru livu Benis tila toman yes ndolman to ndug ve yes daba to yes ndaaba, ve tiloon tila ruum lolo to lupuun, ve tilup di tonowe. Tigham mogheraan pida pa tipakur Agripa yesuru Benis le isob, ghoru Festus imbaan ila ighaze tigham Paulus inim. *Lu 21:12+*

²⁴ Paulus inim ivot, ve Festus isaav ighaze: “Kinik Agripa, ve yam asob to anim aneep toman ghei ne, aghita ngeu tonene! Yes Yuda tisob tighason ghou pani izi Yerusalem ve sualen paam. Ve azedi iyaryaan pa bobaan tighaze ye ineep malep. Narabi imaat. *Mban 22:22*

²⁵ Eemoghon naloon saveen toni, ve naghita naghaze ye igham sosor tiina eta irau to tarabi imaat ne maau. Ve ye tau ighason ghou ighaze ila ighita kinik tiina to Rom, leso itiiir saveen toni. Tovenen you nayok pa aliya, ve pale naghuri ila. ²⁶ Eemoghon nakankaan pa sa saveen to pale nambooda ila rau inim paesiin pani, leso tiina toit ighazoon pa saveen toni pughu. Kinik Agripa, pughu tonene to naghami inim iyoona ila yom toman tamtooghon tisob tonene matamim. Naghaze tasob taloon saveen toni le isob, ghoru yam auul ghou pa ngar pida, ve nambooda ila rau.

²⁷ Pasa, ngar tiou tovene: Ighaze ngeu eta ineep ila

ruum to yabyabuun lolo, ve taghuri ila to kinik tiina to Rom, ye irau ila toman rau eta to ipaesia sosor toni, ghoru poia. Ighaze paesiin eta maau, ve taghur sorokini ila, nene ngar to borouja.”

26

Paulus ivotia tau ila kinik Agripa mata (Mbanj 9:1-18, 22:3-16)

¹ Tovenen kinik Agripa isaav pa Paulus ighaze: “Yo, yom anam usavia saveen tiom.”

Paulus izuzuun nima inarua di lesu tighur talijadi pani, ve ipamundigin saveen toni. Ighaze ivotia tau, lesu tighilaala tighaze ye le sosor maau: ²⁻³ “O kinik Agripa, yom uwatag katin yei Yuda gabuamai. Ve sa saveen to niwazoran ghei pani, nene yom ughazoon pani. Tovenen aazne, lolong poia pasa, nanim nayoona ila matam pa navotia taug. Lesu uwatag ughaze you naghama sosor eta maau, ve saveen naol to yes Yuda tingali payou, nene kaarom moghon. You naghason ghom: Irau ughur talijam pooi pa aliñag? Pasa, saveen tiou, nene mala ris. Pa vene, tinim imum.

⁴ “Ngar tiou ve gabuag to pain ghou ve inim aazne, nene Yuda tisob tiwatagi. Ngar to naghama izi taug ndug tiou Tarsus, ve izi Yerusalem paam, nene tikankaan pani maau. ⁵ Yes Yuda tiwatag katin ghou. Muun ve inim ne, you ngeu tutuunja eez. Lupuun tiei, nizuaria ghei kat nighaze le nitaghon katin tutuun tisob to Maaron. Mbesoon tiei ilib pa Yuda tisob. Ighaze nditag tonene lolodi pa tiuul ghou, nene irau taudi tipariaan saveen tiou tonene.

⁶ Saveen mbuaan to Maaron toman nditimbunai, you naghurghur matag pa sawa to anona toni ivot. Tauto aazne, tipayoon ghou pa savsaveen to sualen. *Mban 13:32+, 23:6, 28:20*

⁷ Yei Yuda rumai tiei saangul ve ru nighurghur matamai pa saveen mbuaan tonowen, ve sunuun tiei inajarua Maaron irau mbon ndag nighaze igham anona toni ivot. O kinik, you paam naghur matag pa saveen mbuaan tonenen, tauto yes Yuda tingal saveen naol payou. ⁸ Pughu vena to yam pida aghita aghaze Maaron irau ipamundigin yes mateena maau?

⁹ “Muun, ngar tiou iyaryaan naghaze you irau naghama ngar naol pa nawaghamun Yesu to Nasaret iza, ve natatan saveen toni. *Mban 8:3; 1Kor 15:9; Ga 1:13; 1Tim 1:13*

¹⁰ You naghama tapirig ila to yes daba to watoonrau, ve naghama tovene izi Yerusalem muun. Nakis Maaron tamtoghon toni patabuana katindi, ve naghur di tiloon tila ruum to yabyabuun. Ve sawa to yes daba timbua saveen pa rabuun di timatmaat, you paam nayok pa ngar todi ve naghaze nene poia pa tirab di. ¹¹ Sawa naol, you nalaghaagh irau yes Yuda rumai todi, ve naghurghur patajani padi. Ve naghama naghama ariana padi naghaze le tighur muridi pa Yesu, ve tipiyaav saveen samia pani, ghoru poia. You ateg yabyab padi kat. Tovenen nalaghaagh nala ndug ndug to mala we paam. Leso nakis tamtoghon todi to tighur ila to Yesu, ve naghama ngar raraate moghon padi.”

Paulus isavia sawa to Yesu ivot toni

¹² Paulus iseen saveen toni ighaze: “Tauto sawa eez, naghamb tapirig ila to yes daba to watoonrau, ve timbaan ghou nala ndug Damaskus, leso naghamb ngar raraate moghon izi tonowe.

¹³ “Nalaagh taghon ataam nala le ndag anunu iza inim bobodaan. Ghorog nguruba tiina kat ineep sambam ve izi inim isul luvutin ghou, ve yes to tilaagh toman ghou ne paam. Nguruba tonowen, tapiri ilib pa ndag mata. ¹⁴ Yei nisob nitap nizi taan, ve naloon ngeu eez aliya. Isaav payou ila saveen Hibru ighaze: ‘Saul, Saul, pughu vena to yom unoknok ghuruun patanani payou. Ngarg tiom to uzoroor ghou ne, tauto iwaghambun taum. Yom unumale bapolo to iyel pa ataam ve tingal dige pa ai mata, leso tipasalungani.’

¹⁵ “Tovenen you naghasoni naghaze: ‘Tiina, yom sei?’

“Ye ipamuul aliya gaghaze: ‘You Yesu. You to yom unoknok ghuruun patanani payou ne. ¹⁶ Umundig uyoon. You navot tiom pa naghur ghomb unum uraata tiou. Mbeb to aazne ughita, toman mbeb pida to muri pale navotia di payomb, yom irau uvotia di pa tamtoghomb, leso upariaan di pa tighur inim tiou. ¹⁷ Ighaze yes Yuda ve yes to Yuda maau ne, titooa pa tiwaghambun ghomb, you pale napas ghomb uvot pa nimadi. You pale nambaan ghomb pa yes to Yuda maau ne. ¹⁸ Ve yomb pale upaghazonan di payou. Leso titoor ngarg todi, ve tighur muridi pa Sadan tapiri ve ngarg sam-samia to ndoroom, ve tinjaria Maaron ve ghazona toni. Ighaze tighamb tovene, nene pale nareu sosor todi ilale. Ve sawa to Maaron irei mbeb popoia pa tamtoghomb toni patabuana, nene pale yes ledi

ndamodi paam. Pasa, tighur inim tiou ve tinim ye le wa.’ *Yo 8:12; Mbanj 2:38; Ep 1:18, 5:8; Kol 1:13*

Paulus isavia uraat toni

¹⁹ “O kinik Agripa, mbeb to you naghita, nene ilaagh sambam ve izi inim. Tovenen irau nazooraa maau. ²⁰ Tauto navotia saveeja izi ndug Damaskus muun, ghoru navotia izi Yerusalem, ve irau taan suruvu to Yudea. Muri ghoru, navotia pa yes to Yuda maau ne paam. You nasavsaav pa tamtoghon naghaze tipul ngar todi samsamia, ve titaghon Maaron ngar toni. Leso tipatoon taudi tighaze titoor ngar todi wa. *Mt 3:8; Mbanj 9:20+*

²¹ Pughu tonene to yes Yuda tikis ghou iloon ila sirsiir to Rumai Tiina lolo, ve tighaze tirab ghou namaat. ²² Eemoghon muun ve inim, Maaron iuluul ghou. Tauto aazne, naneep matag iyaryaar, ve nayoon ila matamim. You napariaan Yesu saveeja toni ila tamtoghon tisob matadi, lesu naghama di tighur ila to Yesu. Yes to ledi izadi maau, ve yes to izadi tintina ne paam. Ve saveeja to nasasavia ne, paghu maau. Mbeb to muun Mose ve yes propeta tisavia tighaze muri pale ivot, tauto nasavia. *Lu 24:27,44+; Mbanj 10:43; Ro 3:21*

²³ Pasa muun, tisaav tighaze Mesia pale iyaamaan yabyabuun ve imaat, ve imundig pa mateen muun. Ghoru ivotia ghazoonaa to Maaron pa tamtoghon. Yes Israela, ve ndug ndug to Yuda maau ne paam.” *1Kor 15:20,23; Kol 1:18*

Paulus ighaze le Agripa ighur ila to Yesu

²⁴ Paulus ipasob saveeja toni sone, ve Festus isaav pani toman aliija tiina ighaze: “Paulus, ngar tiom iwaghamgham! Tipatoot ghom pa ngar naol,

tauto dabam isami!” *Yo 10:20; 1Kor 2:14; 2Kor 5:13*

²⁵ Eemoghon Paulus ipamuul aliņa ighaze: “Ti-ina tiou Festus, dabag isami maau. You nasavia saveeņ onoon moghon toman nġar. ²⁶ Mbeb to nasavia di ne, kinik Agripa iwatag di tisob wa. Eta iyoon pa mata ma taliņa maau. Pasa, mbeb tonene nġozaaņa maau. Tauto namatughez maau, ve nasaav ghazooņa pani. ²⁷ O kinik Agripa, yom ughur ila saveeņ to yes propeta, ma maau? You nawatag naghaze yom ughur ila.”

²⁸ Kinik Agripa ipamuul aliņa ighaze: “Wai Paulus, nene vena? Ughaze rikia moghon ugham ghou nanim Krisi le to aazne?”

²⁹ Paulus isaav pani tovene: “Ighaze aazne, ma sawa ite paam, nene poia moghon. Ve you naghaze le Maaron igham ghom toman tamtoghon tisob to aazne tilonloon saveeņ tiou ne paam, atoor nġar tiam ve ataghon nġar to you nataghoni, ghero poia. Eemoghon tikau aghemim ma nimamim pa sen, ve tighur gham aloon ala ruum to yabyabuun animale you malep.”

³⁰⁻³¹ Paulus isavsaav le isob, ghero kinik Agripa toman gavana Festus, Benis, ve tamtoghon tisob to tineep toman di, timundig tivot tila pumuri, ve tiwasavon di tighaze: “Nġeu tonowen igham sosor eta irau to tarabi imaat, ma taghuri iloon ila ruum to yabyabuun ne maau.” *Lu 23:14+; Mban 23:9, 25:25*

³² Ve Agripa isaav pa Festus ighaze: “Nġeu tonowen izoorndug ighaze kinik tiina to Rom itiir saveeņ toni, tauto pale ila toni. Inimale maau, tone tapuli ila.” *Mban 25:11*

27

Paulus iza waan ıla pa Rom

¹ Yes timbua saveen pa tighur ghei niza waan, leso niraav nila pa Itali. Tovenen tigham Paulus yesna tamtoghon pida to tineep tomani ıla ruum to yabyabuun lolo, ve tighur di tila daba eez nima, iza Yulius. Ye ingin ndaaba to Rom irau tamoot liim (100). Toman ndaaba toni, yes tineep iloon ıla ndaaba 600 to kinik tiina to Rom tau ndaaba toni. ² Waan eez to ndug Adramitium ighaze irav ıla pa ndug pida to tineep taghon naari to Asia. Yei niza waan tonowen, ghoru tiravia keel iza ve nivot. Aristarkus paam iza toman ghei. Ye to ndug Tesalonika to ineep izi taan suruvu to Masedonia.

³ Mbon ndugizau, ve nighau niloon ndug Sidon. Yulius igham poian Paulus, ve ipuli ıla ingig ndita pida to tineep izi tonowe. Leso tiuuli pa aniin ve mbeb pida. *Mt 25:36; Mban 24:23, 28:16; Hib 10:24*

⁴ Yei nipul Sidon ve niraav muul, eemoghon yaghur isoop ghei. Tovenen nimbuti loonja, leso nipoon pa mutu Saiprus. ⁵ Nighau potla taghon naari to Silisia ve Pampilia, le malmalimai nila niloon ndug Mira to ineep taan suruvu to Lisia. ⁶ Niloon tonowe, ve Yulius to daba to yes ndaaba, ighita waan eez to ndug Aleksandria to ighaze irav ıla pa Itali. Tovenen isakia ghei nivool nila pa waan tonowen.

⁷ Yei nivot, ve yaghur irab pa naghomai inim. Tovenen irau nighau rikia maau. Yes uraata to waan tigham uraat ariana, ve nighau poipoi irau mbon pida le nila nigharau ndug Nidus. Eemoghon yaghur isoop ghei kat le irau nighau

denja muul maau. Tovenen titoor waan, ve naghomai ingal mutu Krit, lesu nipoon pa yaghur. Nighau nila le nigharau nornoor eez to Krit, iza Salmone. ⁸Yes uraata to waan tigham uraat ariana le nipalib ghei pa nornoor, ghero nighau poipoi taghon mutu dige, le nila niloon ndug kainanen eez, iza ‘Lambu Poia.’ Ineep igharau ndug tiina Lasea.

⁹Raveen tiei to niraav ninim, nene igham sawa mala. Sawa to niloon lambu tonowen, sawa to yes Yuda tingun taudi pa ghaniin aniiñ,* nene isob wa, ve sawa to karas ighaze ivot. Tovenen Paulus isaav padi ighaze: ¹⁰“Ndiran tiou, aloon. You naghita naghaze iit irau tapatum ghiit. Ighaze taraav muul, nene pale tandeen patani tiina ila te pogho. Pale waan imbiiris, ve mburuguun tisob tilaledi, ve iit paam pale tasob tamamaat.”

¹¹Eemoghon daba to yes ndaaba ighur ila Paulus aliña maau. Ye itaghon ngar to waan tama ve ngeu to ighamgham pooz pa waan. ¹²Yei nigham ngar nighaze sawa to yaghur tiina imundig, lambu tonowen pale poia pa potiin maau. Tovenen yes ival tiyok tighaze nisakia ghaon muul nila nilib pa lambu ite to ineep ila pa daudau, iza Finiks. Lesu nipot tonowe, ve nisanan yaghur itoora, ghero niraav muul. Pasa, lambu tonowen poia pa potiin.

Karas tiina imundig

* **27:9:** Sawa tiina to rewaan sosor ighaze ivot, nene yes Yuda tingunngun taudi pa ghaniin aniiñ itaghon sunuun ngara. Sawa tonenen ivotvot pa Septemba ma Oktoba. Muri pa tonene, sawa to ndug yauna ivot ve ndug isami.

¹³ Nineep tonowe le daudau suru inim. Tovenen yes uraata to waan tighaze pa sawa poia pa raveen. Yes tiyou badewaan iza, ghoru tiravia keel iza, ve nivot. Yei nighaughau taghon taan nila, ¹⁴ le mala maau ve kagu imundig toman tapiri, ve imalaan pa mutu inim, le izeev keel. ¹⁵ Tovenen uraata to waan titoova pa titoor waan nagho, lesu nimbul niloon nila. Eemoghon tiraua maau. Tovenen tipul waan ve ighau itaghon yaghur.

¹⁶ Nighau nila le nipoon pa mutu kainanen eez muri, iza Kauda. Ghoru nigham uraat ariana pa youn waan kainanen to niweua ne inim igharau waan tiina dige. ¹⁷ Waan kainanen inim ipaak, ghoru niyoui iza, ve yes uraata to waan tikau ila waan tiina le tunja. Le isob, ghoru tigham uraat pa waan tiina. Tigham ravraav pida ve tikau luvutin waan pani, ve tiliika le tunja. Lesu ipalot waan. Yes timatughez pa yaghur iviviir di tila, ghoru tizala maghat tiina to ineep igharau Aprika, iza Sirti. Tovenen tirab keel izi, ve titug mbep pida tizila te lolo, lesu tikis waan ve nighau poipoi.

¹⁸ Ndug isami le isami kat, ve dibom irongot waan ila inim. Tovenen ndugizau, ghoru tisuruuv mburuguun pida tila pa te. ¹⁹ Mbon ndugizau muul, ghoru matughezaan tiina igham yes uraata to waan le tisanen kat. Tovenen nimadi ila pa mbep pida to waan paam, ve tisuruuv di tila pa te. ²⁰ Yei nineep te pogho sawa mala ve nimomoghan. Mbon ve ndag, ndug isami kat le irau nighita ndag ve pitum maau. Ve dibom irab katin ghei. Tovenen nigham ngar nighaze yei irau nineep maau. Pale nisob nilalemai.

²¹ Sawa mala tonenen, tamtoghon tighan aniiñ maau. Tovenen Paulus imundig iyoon ila lolodi, ve isaav padi ighaze: “Yam ndiran tiou, ini-male aloon saveen tiou ve tapul Krit maau, tone patañani tonene irau ivot pait maau, ve mburuguun toit eta ilale maau. ²² Eemoghon tambaņa paam. You naghaze napalot gham tovene: Yam amatughez malep. Pasa, toit eta irau ilale maau. Waan moghon to pale imbiriis. ²³ Pasa, noor mboñ, Maaron tiou to nambesmbes pani ne, imbaan aņela toni eez inim iyoon izi digeg, ve isaav payou ighaze: ²⁴ ‘Paulus, umatughez malep. Yom pale ula uvot to kinik tiina to Rom itaghon Maaron nğar toni. Ve Maaron iloon suņuun tiom wa. Tovenen ye pale mata pa yes to yamņa araav ne, lesu todi eta ilale sob.”

²⁵ Ghoru Paulus iseen saveen toni muul ighaze: “Tovenen you nasaav payam: Amatughez malep. Lolomim poia. Pasa, you naghur ila to Maaron naghaze mbeb pale ivot inimale ye isavia payou.

²⁶ Eemoghon iit pale tazala maghat to mutu eta.”

Waan imbiriis

²⁷ Mboñ inim saangul ve paan, ve yaghur iviviir ghei ve nimomoghan ila mazovan to Te Mediterenian. Mboñ anoņa, ghoru yes uraata to waan tighilal tighaze nigharau taan wa. ²⁸ Tovenen tigham ravraav to tovaan maghat ve titugi izila, ve tighita soso to te pogho ve izila tunja ila magargaar, nene irau 40 mita. Nimomoghan nila, ghoru titoova muul, ve tighita maghat iza inim irau 30 mita wa. ²⁹ Yes timatughez tighaze waan pale izala yaam tintina to tineep ila te lolo. Tovenen tila waan

mbole, ve tinduur badewaanj tintina paanj tizila te. Leso tikis waan ve ipot tunja tonowe. Ve tipasul tighaze rikia ve ndugizau.

³⁰ Yes uraata to waan tikaal ataam tighaze tipul waan ve tighau. Tovenen tila waan nagho, ve titoom pa tipiyaav badewaanj. Ve maau. Tizugua waan kainanjen, ve titugi izila te, lesa tiza ve tighau. ³¹ Eemoghon Paulus ighita di, ve ighilaal ngar todi. Tovenen isaav pa yes ndaaba toman daba todi ighaze: “Aghita ghiit wa? Ighaze yes uraata to waan tonowen tipul ghiit ve tighau, tiam eta irau poia maau. Pale asob amatmaat.”

³² Tovenen yes ndaaba tila timbut motin ravraav pa waan kainanjen ve itap izila te, ve imoghan ilale.

³³ Mbonjmaagh, ndoromromaanja sone, ve Paulus ipalot di ighaze tighan aniij, ghero poia. Ye isaav padi ighaze: “Aghita. Iit taneep ila patanani tonene lolo, ve matughezaan igham gham le aneep toman apomim nginija irau mbonj saangul ve paan wa. ³⁴ You naghaze napalot gham. Agham aniij ve aghan, lesa ipalot gham ve amaata ila patanani tonene lolo sob. Agham ngar naol malep. Pasa, tiam eta irau igham samia maau. Iit tasob pale popoiaad moghon.” ³⁵ Isavsaav padi le isob, ghero igham mberet, ipait Maaron pani ila ival tiina matadi, ve iteev suruvu, ve ighan. *Mt 15:36*

³⁶ Ival tiina tighita Paulus ighan, tauto ipalot di ve anadi tighan paam. ³⁷ Yei to nineep ila waan ne, yei irau 276. ³⁸ Mburuguun tiina to waan, nene wit moghon. Tovenen tisob tighan le apodi isun, ghero tila tisuruuv wit isob izila pa te. Lesa waan pokia, ve imoghan iloonj ila pa taan.

³⁹ Ndugizau, ghero yes uraata to waan matadi iloon ila le tighita naari. Eemoghon tighilaal ndug maau. Ve tighita giluuñ eez to magargaara poia. Tovenen tigham ngar tighaze titoor waan, leso nighau denja niloon nila tunja ila papi tonowen.

⁴⁰ Yes timundig ve timbut motmotin ravraav pa badewaan tisob to tikis waan, ve titap tizi. Ve tipool ravraav pa waan pooza ru, ve tizeev di tizila te. Ghero tiravia keel tiina iza, ve yaghur izeeva, ve niraav niñarua lambu tonowen niloon nila. ⁴¹ Nighaughau nila le waan nagho korokia izala maghat, ve mbole moghon to kalkalia. Tauto dibom irabi irabi le imbiris. *2Kor 11:25*

⁴² Ndiran pida to yeiña niraav, yes ndaaba tikis di pa tighur di tila daba to gavman nimadi. Yes ndaaba timatughez tighaze ndiran tonowen pale tiwai tiloon tila taan, ghero tighau tila. Tovenen timundig, ve tighaze tirab di tisob timatmaat. ⁴³ Eemoghon daba to yes ndaaba ighaze iuul Paulus, leso imaat sob. Tovenen ingalsekin ndaaba toni ighaze tigham ngar tovene malep. Ghero isaav pa yes to tiwatag waen ighaze: “Yam ayatov gham muun azila, ve awai aloon ala.” ⁴⁴ Ve yes to tiwatag waen maau, ye isaav padi ighaze tighita ledi ndiu, ma waan pida pida, ghero tikis di ve tiwai pani tiloon tila pa naari. Yei nigham tovene, tauto nisob niloon nila naari. Eta igham samia maau.

28

Paulus ineep izi mutu Malta

¹ Yei niloon nila naari, ve tipaes payei tighaze mutu tonowen iza Malta. ² Yes paanu tau tigham

poian ghei kat. Sawa tonenen, uman izi le ndug iyaun. Tovenen titavun yab, ve tipoi ghei tighaze nila yab ilaav ghei.

³ Paulus ila ikor ai pida inim, ve ighaze indou di tizala yab. Eemoghon moot samia eez ineep ila ai tonowen sosodi. Sawa to iyamaan yab tuntunu, sekia ivot le injaan Paulus nima, ve livo kikikia pa nima. ⁴ Yes paanu tau tighita moot tonowen imonau ila Paulus nima, ve tiwasavon di tighaze: “Wai, ngeu tonene avaat irab tamtoghon eta imaat. Onoon, ye imaat ila te pogho maau. Eemoghon maaron liva toit to iyatyat ngar samsamia to tamtoghon,*

ye irau ipuli ineep mata yaryaara maau. Tauto patajan tonene ivot pani.” ⁵ Eemoghon Paulus itir nima le itapaar moot tonenen izala yab, ve mbeb eta ivot pani maau. *Mk 16:18; Lu 10:19*

⁶ Yes paanu tau tighur matadi tighaze pale Paulus nima isarsar, ma itap izi imaat. Eemoghon tinaam le mala, ve mbeb eta ivot pani maau. Tovenen titoor ngar todi, ve tisaav tighaze: “Wai, ye avaat maaron eta.” *Mbanj 14:11*

⁷ Daba to mutu tonowen, iza Publius. Taan toni ineep igharau ndug to yei niloon pani. Ye igham ghei toman lolo poia, ve nila nineep tomani ila ruum toni irau mbonj tol. Ye injin poian ghei kat. ⁸ Publius tama, moroghoonj tiina ighami ve inepneep. Tini ituntun, ve ibebeghaz sinj. Tovenen Paulus iloonj ila toni, ve ighason Maaron pa iuuli. Ghoru ighur nima izala pogho, ve tini poia muul.

* **28:4:** Ndiran to mutu Malta, yes Kristen maau. Maaron liva to tisavia, nene maaron todi eez.

Mk 16:18; Mban 9:34, 14:8+; Yems 5:14+

⁹ Yes paanu tau tighita mbeb gharatoona tonenen, le moroghoona todi tisob tinjarua Paulus tila, ve iuul di tisob tinidi popoia. ¹⁰ Tovenen yes tipakur ghei kat, ve tigham lemai mbeb katindi. Ve sawa to nitartar pa raveen muul, sa mbeb to nimbool pani, nene tiuul ghei pani.

Paulus ila ivot ndug tiina Rom

¹¹ Sawa to karas tiina imundig ve inim, yaghur ipoon waan eez to ndug Aleksandria le ipot izi mutu Malta. Waan tonowen nagho, tisap maaron todi Zeus ndinatu ru anunudi tineep ila. Yei nineep tonowe irau kaiyo tol, le sawa to yaghur ate izi, ghoru niza waan tonenen, ve niraav muul.

¹² Nighaughau nila le niloon izi ndug Sirakius, ve nipot tonowe irau mbon tol. ¹³ Ghoru nipul Sirakius ve nivot muul, ve niraav nila niloon izi ndug Regium. Nipot tonowe le mbon ndugizau, ghoru daudau imundig. Tovenen nipul Regium, ve niraav muul nila. Nighau irau mbon ru, ghoru niloon izi ndug Puteoli, ve raveen tiei isob.

¹⁴ Niloon tonowe, ve nindeen tonvetaz pida to Krisi. Yes tighita ghei, ve tigham ghei nila nineep toman di irau mbon liim ve ru. Ghoru nipamundigin laghoon tiei nighaze nila pa ndug tiina Rom.

¹⁵ Tonvetaz pida to Krisi to tineep izi Rom we tiloon varumai wa. Tovenen timundig tinim tighaze tighita ghei. Pida tindeen ghei izi maran to ndug Apius. Ve pida tindeen ghei izi ndug to tiwaat iza: 'Ruum tol to yes loomba.' Paulus ighita di tinim, le lolo poia ve ipait Maaron pa poia toni. Pasa, laghoon todi to tinim, nene ipaloti. ¹⁶ Yei

nilaagh nila le nivot ndug tiina Rom, ve tiyok pa Paulus enjeni ineep ila ruum eez, toman ndaaba eez to injini. *Mbanj 24:23, 27:3*

Paulus ivotia varu poia izi ndug tiina Rom

¹⁷ Mbonj tol inim ila, ghero Paulus imbaan ila pa nginiina to yes Yuda to tineep izi Rom ne ighaze tinim toni. Yes tinim tilup di, ve ye isaav padi ighaze: “Yam tonvetaz, aloonj. You naghama ngar eta to nawaghama tamtoghon toit Yuda maau, ve namalaan pa tutuun eta to nditimbuud maau. Eemoghon tikis ghou sorok izi Yerusalem, ve tighur ghou nala yes Roma nimadi. ¹⁸ Ve sawa to yes Roma titiir saveen tiou, yes tighita tighaze you naghama sosor eta irau to tirab ghou namaat ne maau. Tovenen tighaze tipul ghou nala. *Mbanj 26:31+*

¹⁹ Eemoghon yes Yuda tizoor di pa ngar tonenen, ve naghita naghaze leg ataam eta muul maau. Tauto nasaav padi naghaze: ‘You naghaze nala naghita kinik tiina to Rom, lesa itiiir saveen tiou.’ Eemoghon you nanim pa nangal saveen pa taug tamtoghon tiou ne maau. ²⁰ Pughu tonene to napoi gham anim. Lesa naghita gham, ve nasaav ghazoonja payam tovene: Aazne, tikau ghou pa sen tonene pasa, you nambesmbes pa Mesia to iit Israela tasob taghurghur mataad pani ne.” *Mbanj 26:6+; Ro 15:8*

²¹ Yes tisaav pani tighaze: “Saveen tiom poia. Eemoghon nditaad to tineep izi Yudea we, timbood rau eta pa tipaesia ghom payei ne maau. Ve tamtoghon eta ineep Yudea, ve inim isavia varum payei, ma ipiyaav aliina samia eta injarua ghom,

nene paam maau. ²² Ve poia pa taum unum peria wa. Leso niloon katin ngar tiom ila taum avom. Pasa, yei niwatag tovene: Ndug naol tiwayoun avodi pa lupuun tiam paghu tonene tighaze ngar tiam pida tisoror.” *Mbanj 17:6-7, 24:5*

²³ Ghoror tighur sawa ite pa yesna Paulus tilup di muul pa savsaveen. Tineep le sawa to lupuun tonenen ivot, ghoror mbonmaagh ve ival tiina kat tila pa ruum to Paulus inepneep ila. Ye ipagha-zonon di pa pooz to Maaron ngara, ve ipatoot di pa tutuun to Mose toman yes propeta alinadi, lesor igham di tighur ila to Yesu. Ye ikiskis saveen ila ila le mbon izi. *Lu 24:27+*

²⁴ Tamtoghon pida tiloon saveen toni, ve tighur ila tighaze nene onoon. Eemoghon pida, tighur ila maau. ²⁵ Tovenen tiwazoran di pa savsaveen ila le maau, ve tighaze tighau. Eemoghon Paulus ipiyaav alina ris padi ighaze: “Saveen waaro eez to Avuvu Patabuan ivotia pa nditimbud ila propet Isaia avo, nene denja kat pa ngar tiam. Pasa, ye isaav ighaze:

²⁶ ‘Ula to yes ndiran tonowen ve usaav padi tovene: “Yam pale alonoon saveen. Eemoghon irau aghazonon pani maau. Ve aghitghita mbeb. Eemoghon irau aghilaal pughu maau.”

²⁷ Pasa, ndiran tonowen, ngar todi iyaryaan kat.

Talinadi tilonoon saveen maau. Ve tiponpoon matadi paam, lesor tighita mbeb sob.

Ve inimale lolodi pa tighita mbeb ve tiloon saveen,

tone tighilaal, ve titoor ngar todi imuul inim tiou,

leso nauul di tineep pooi muul.’ ” *Is 6:9+; Mt 13:13+; Ro 11:18*

²⁸⁻²⁹ Paulus isaav padi muul ighaze: “Tovenen you naghaze yam awatag kat tovene: Yam Yuda azurun ataam to Maaron igham mulin iit tamtoghon pani. Tauto isakia varu ila irau ndug ndug to Yuda maau. Ve yes pale tiloona, ve tighur ila.”† *Mbo 67:2; Lu 3:6; Mbanj 13:46+; Ro 11:11*

³⁰ Paulus ineep izi Rom irau ndaman dodoli ru. Ruum to ineep pani, ye tau igholgholi ila to ruum tau. Tamtoghon tisob to tinim ve tingigi, ye igham di toman lolo poia. ³¹ Ye imatughez maau. Iyoon ariana pa votiaan pooz to Maaron, ve ipatoot tamtoghon pa Tiina toit Yesu Krisi saveen toni. Ve tamtoghon eta ingalsekini pa uraat toni tonowen maau.‡ *Ep 6:19*

† **28:28-29:** Baibol pida, tiseen saveen waaro tonene pa saveen tovene: ‘Paulus isavsav le isob, ghoru yes Yuda tiparzoor kat pa savsaveen, ve tivot tila pumuri.’ ‡ **28:31:** Saveen pida to sios histori mungina pida isaav tovene: Sawa to tipayoon Paulus pa savsaveen, mbeb ighur pooi pani, ve tipuli ila. Ghoru ilaagh muul pa uraat to votiaan varu poia, ve ila pa ndug pida inimale Spen (Ro 15:24,28), mutu Krit (Tit 1:5), Miletus (2Tim 4:20), Kolosi (Plm 1:22), Epesus (1Tim 1:3), Pilipai (Pil 2:23-24), ve Nikopolis Tit (3:12). Muri pa tonene, imuul ila pa Rom, ve yes Roma tikisi muul. Sawa tonenen, tipayoonda pa savsaveen, eemoghon ighur pooi pani maau (2Tim 4:6-8). Tauto tirabi imaat. Ve sios histori isaav tovene: Yesuru Petrus timaat pa ndag ee moghon. Paulus, timbut motin lua, ve Petrus, tirabi izala ai pambaroon. Daba izi ve aghe iza.

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 22 Feb 2024 from source files dated 31 Aug 2023

c7a45d99-91a2-564f-9c55-d2efc8be7fae